

ACCION 21 
PLAN DI
PARTIDO
2025 - 2029

#BanBibaMiho
WWW.ACCION21.COM

INTRODUCCION

Cu inmenso placer mi tin e honor di presenta ACCION21 su Plan di Partido 2025-2029. E plan ta un colaboracion entre hopi individuo y na tur mi ta increíblemente agradecido. Algun di e miho mentenan di nos pais a contribui na nos plan, specialmente den areanan di cultura, enseñansa y sostenibilidad. Como lider di partido mi kier expresa nos gratitud profundo pa boso aportacion, e ta inspira nos pa sigui lucha pa un Aruba caminda tur hende por Biba Miho.

Reflexionando riba e ultimo tres aña y pico, mi ta orguyoso di por declara cu ACCION21 a cumpli. Nos fraccion a introduci tres iniciativa di ley te cu awor, haci mas cu 776 pregunta na minister, coopera riba 11 amienda y 32 mocion. Ningun miembro di parlamento den historia di pais Aruba a introduci mas iniciativa di ley of haci mas pregunta den un periodo parlamentario. Parlamento su rol ta controla gobierno, aproba ley y representa pueblo y nos a cumpli. Nos a sostene gobierno riba leynan manera LNT, nos a opone presupuestonan irresponsabel, nos a opone un deal dudoso cu Eagle LNG y nos a vocifera fuertemente a base di nos principianan liberal progresivo pa derecho di tur ciudadano.

Nos iniciativa di ley pa reforma nos sistema electoral ta incorpora puntonan di nos plan di partido 2021-2025 incluyendo duna Arubano den exterior derecho di voto, reforma voto preferencial pa esnan cu mas voto riba un lista drenta parlamento, reforma nos sistema di reparti restzetels pa uno cu ta miho reflexiona con pueblo a vota, introduci limite di termino pa parlamentario y minister y finalmente introduci eleccion primaria pa sigura cu mas voto ta representa den parlamento. Nos iniciativa di ley pa expande ouderschapsverlof ta duna mayornan mas tempo cu nan recién naci y introduci un verlof pa tata, treciendo nos leyman den concordancia cu beneficianan ofreci na Hulanda y BES. Nos iniciativa di ley pa introduci matrimonio di mesun sexo tambe tabata den nos plan di partido 2021-2025 y niun partido a lucha mas fuerte y lo sigui lucha pa derecho igual pa tur ciudadano.

Nos a introduci un mocion pa regularisa e poblacion indocumenta cu permisonan temporal bao cierto condicionnan. ACCION21 a demostra di tuma paso y posicionnan decisivo y cu boso sosten esey lo sigui durante e proximo periodo di gobernacion. Plan di Partido 2025-2029 ta representa nos vision pa Aruba, actualmente un pais cu un economia di mas cu 7 bilyon pero caminda 27% di hogarnan ta biba cu gasto mas halto cu entrada. Elimina pobresa, atende cu e crisis ecologico, revitalisa San Nicolas y reforma fiscal comprensivo ta cuatro

puntonan cardinal pa e proximo periodo di gobernacion.

Introduci mas eficiencia den gobernacion, repriorisa gastonan na favor di enseñansa (100 mion adicional) y salubridad (112 mion adicional), mientras nos ta elimina inkomstenbelasting y hisa pensioen di nos grandinan y sigura nan cuida ta algun di e cambionan cu nos lo introduci durante e proximo cuatro añanan. Nos mester enfoca riba crea un pais cu ta dushi biba aden y cu hende kier bin bishita luga di un pais cu ta dushi bishita pero dificil biba aden. ACCION21 a demostra nos efectividad den parlamento y nos ta spera di crece riba e merito di nos trabaonan haci, pa logra un pais caminda tur ciudadano por **BIBA MIHO.**

CONTENIDO

<i>PARLAMENTO DI ARUBA</i>	6
<i>MINISTERIO DI ASUNTO GENERAL</i>	19
Modernisacion Gubernamental	19
<i>MINISTERIO DI FINANSAS</i>	26
<i>MINISTERIO DI HUSTICIA</i>	34
<i>MINISTERIO DI BIENESTAR HUMANO</i>	41
Enseñansa	42
Minister di Bienester Humano y Departamento di Enseñansa	47
Salubridad	53
Asunto Social	59
Labor	64
Cultura y Deporte - Yabinan pa un Aruba sano y sostenibel	67
Deporte	75
<i>MINISTERIO DI ECONOMIA, INFRASTRUCTURA Y MEDIO AMBIENTE</i>	81
Economia	81
Infraestructura y Deporte	88
Transporte Publico	91
Medio Ambiente	92
Bienestar di nos animalnan	98

#BanBibaMiho
WWW.ACCION21.COM

PARLAMENTO DI ARUBA

Independisa parlamento di ministerio di asunto general y transforma e instituto mas halto di nos orden constitucional den un berdadero representacion di pueblo su boluntad democratico. Durante e ultimo 38 aña cu Aruba ta existi como un pais constituyente di Reino Hulandes, parlamento a funciona como un simpel formalidad constitucional. Democracia no por funciona debidamente sin un organo legislativo capaz y ekipa pa eherce su tareanan di representa e electorado, aproba ley y supervisa gobernacion.

DEMOCRATISA AUTORIDAD DEN PARLAMENTO

Actualmente nos constitucion y reglamento di ordo di parlamento ta otorga demasiado poder na e presidente. Presidente di parlamento tin absoluto discrecion si y cua reunion ta wordo yama, den ki forma y na ki momento. Violacion di nos reglamento di ordo di parlamento a bira structural y historia ta demostra cu presidente su poder ta wordo abusa categoricamente pa faborece su partido.

Den parlamento su independisacion ta importante pa democratisa y comparti e poder cu actualmente presidente di parlamento ta goza di dje door di cambianan na constitucion y reglamento di ordo di parlamento. Siguiendo e ehempel di Spaña caminda un 'Mesa del Congreso' ta encarga cu e autoridad y responsabilidad di presidente di parlamento, nos ta propone reemplasa 'Commissie Huishoudelijke Aangelegenheden (CHA)' cu un presidium.

PRESIDIUM

Presidium lo ta e organo rector di parlamento y lo consisti di presidente, prome vice-presidente, segundo vice-presidente y secretarionan. E cantidad di miembro di presidium lo coresponde na e cantidad di fraccion presente durante un periodo parlamentario. Cada

fraccion lo tin derecho na un miembro di presidium, cada miembro lo conta cu un voto igual y presidente lo por unicamente vota den caso di empate. Miembronan independiente lo por participa den presidium como observador sin derecho di voto. Presidium lo reuni e prome dialuna di tur luna excluyendo periodo di reces y presidente lo dirigi y coordina accion.

Tareanan di presidium lo inclui:

- Adopta decision y medida rekeri pa e organizacion di trabao y funcionamiento interno di parlamento;
- Prepara e presupuesto di parlamento, dirigi y controla su ehecucion y presenta na un sesion plenario dentro di seis luna despues di cada aña presupuestario, un rapport riba su cumplimiento;
- Ordena gastonan di parlamento sin prehuicio na ningun subsidio di fraccion acorda;
- Programa lineanan di accion di parlamento, establece e calendario di actividadnan di plenario y reunionnan di comision pa cada periodo di sesion.

Adaptacion necesario di constitucion y reglamento di ordo di parlamento por ser modifica tras di articulonan 30-38 di 'Congreso de los Diputados (Reino de España) | Normas | Reglamento del Congreso | TITULO III. De la Organización del Congreso ¹'

¹ <https://www.congreso.es/es/cem/tit3cao1sec2>

INDEPENDISACION REAL

Actualmente minister president tin e autoridad pa disolve parlamento aunke esaki mester wordo aproba pa gobernador. Na 2015 a sosode un impasse constitucional na Sint Maarten cu a delinea un defecto den nos sistemanan constitucional. Parlamento di Sint Maarten a aproba un mocion di desconfiansa contra e gobierno y algun ora despues minister president a disolve parlamento. Gobernador a exige premier entrega retiro di su gabinete prome y ela nenga te ora parlamento ta disolvi. Diferente expertonan constitucional renombra a conclui na favor di e premier, cu consecuencia premier por exige disolucion di parlamento despues cu parlamento ya caba a pasa un mocion di desconfiansa y manda gobierno cas.

Primicia di parlamento no ta real si premier ta mantene autoridad pa disolve su existencia. Aruba su parlamento ta unicameral y pa garantiza su independencia di gobierno, ta importante pa elimina e menasa di disolucion pa minister president. Tambe ta importante pa bon maneho di un pais pa gobierno conta cu un mayoria den parlamento y si esey no ta posibel pa eleccion tuma luga dentro di un periodo cortico.

Constitucion di Noruega ta prohibi disolucion di parlamento prome cu ela

sirbi su termino completo y paisnan manera Indonesia a modifica nan constitucion pa kita posibilidad di disolve parlamento. Nos no kier bay asina leu pero kier haya un caminda intermedio cu ta garantiza seguridad di parlamento y gobernabilidad di pais. Siguiendo e ehempel di e 'Fixed-term Parliaments Act' di Reino Unido, nos kier modifica constitucion pa inclui cu un eleccion por unicamente sosode trempan si:

- Un mayoria cualifica di dos tercera parti di miembro vota na favor;
- Of si gobierno perde un mocion di desconfiansa y ningun formacion alternativo ser confirma pa parlamento dentro di tres siman.

PARLAMENTO CU TA CONTROLA GOBIERNO

Na Aruba nos conoce e fenomeno di stempel parlementcuta binta caracteriza nos pais desde cuminsamento. Ta custumber cu candidatonan politico cu mas voto ta procede pa bira minister y esnan cu resta ta keda parlamento, creando un desekilibrio di poder entre e ministernan di un partido y nan fraccion parlamentario. Fuera di esey, ser minister ta considera mas prestigioso, tin mas privilegio y ta miho paga, dus aunke candidatonan ta postula pa parlamento, esnan mas existoso kier bira minister. Esaki hopi biaha a resulta den ministernan sin conocimiento y preparacion suficiente den e cartera(nan)

di nan ministerio.

Stichting Deugdelijk Bestuur Aruba (SDBA) a yega di propone un simposio nacional pa discuti cambionan na nos sistema democratico. Nos ta apoya e iniciativa y lo percura pa gobierno organisa un evento caminda tur ciudadano, organizacion politico, gremio, sindicato etc. lo por bin cu proposicion pa discuti con pa adapta nos sistema democratico.

Den un simposio nacional nos lo kier discuti cambionan fundamental na nos democracia, incluyendo eleccion separa pa parlamento y gobierno. Elegi minister president y/of otro ministernan directamente lo por yuda kibra e partidismo divisivo cu ainda ta sigui existi mirando cu ta mas probabel cu lo tin mas partido representa den conseho di minister y tambe ofrece miho garantia cu esnan mas cualifica pa e funcion lo haya e puesto.

SEGUNDO GRIFFIER

Griffier ta conseha parlamento, presidente y presidium riba aspectonan constitucional y di procedura relaciona cu trabao di parlamento. Tambe e ta hefe di empleadonan publico di parlamento y su neutralidad politico ta esencial. Historia ta demostra cu no semper e empleado publico di mas halto a actua di un forma integro cu fondonan publico ni tampoco di un forma politicamente imparcial na momentonan di desacuerdo. Mirando e embergadura di e posicion, nos ta

propone busca un segundo griffier pa sostene parlamento den su totalidad. Practica ta muestra cu griffier hopi biaha sa identifica su rol como consehero legal di presidente, lubidando cu su prome responsabilidad ta na parlamento henter. Ta importante pa tur miembro tin acceso adecua na conseho legal y un solo persona no por brinda esey di un forma satisfactorio, specialmente ora e ta carece di imparcialidad politico suficiente.

MEHORA ADMINISTRACION Y OPERACION

Actualmente administracion y operacion di parlamento ta deficiente den hopi aspecto. Nos lo kier mira un estudio independiente pa actualisa parlamento su plan di formacion y percura cu personal di parlamento ta completo. E administracion y facilidadnan mester ta miho prepara pa oportunidad y retonan di siglo 21. Parlamento por haci mas uso di digitalizacion pa mehora eficiencia y aumenta transparencia. Facilidadnan mester ta apto pa necesidadnan actual di parlamento, no ta aceptabel p.e. cu no tin fractiekamer pa tur fraccion adhunto sala. Manera otro partinan di Reino, mester introduci un orientacion pa miembronan nobo hunto cu kennismaking pa personal. Reparticion di oficina, prioridad di peticion, acceso na notula y asistencia di personal mester sosode di un forma democratico y imparcial.

AUMENTA CANTIDAD DI WETGEVINGSJURIST

Actualmente parlamento tin unicamente un wetgevingsjurist y esey no ta su unico tarea. Miembronan no ta ricibi asistencia suficiente pa introduci, modifica y repasa proyectonan di ley. Mirando cu parlamento ta co-legislador, ta importante pa tin mas capacidad di wetgeving na parlamento mes. Nos lo kier mira por lo menos un wetgevingsjurist pa cada fraccion pa parlamento no mester depende riba Directie Wetgeving en Juridische Zaken (DWJZ) cu tambe ta sufri di un falta di capacidad y personal pa preparacion y adaptacion di leyman.

REDUCI GASTONAN DI BIAHE

Actualmente tin abuso di parti miembronan y gastonan di biahe di parlamento ta incrementa sin cu e gastonan mas halto ta trece beneficio pa pais Aruba. Manera tur otro parti di Reino (Corsou, Sint Maarten, Eerste Kamer y Tweede Kamer), nos lo kier mira limitacion di un delegado pa fraccion, presidente y griffier na reunionnan di IPKO, Tripartiet y InterExpo. Otro miembronan lo por asisti riba nan propio gasto of riba gasto di nan fraccion como observador manera ta e caso na tur otro parti di Reino.

Limita parlamentarionan na miembrecia den unicamente un comision fiho di Parlatino. Limita asistencia presencial na reunionnan di Parlatino na maximo dos

miembro pa cada comision, si tin mas cu dos miembro den un comision ta alterna segun prome letter di fam manera ta e caso na Sint Maarten. Limita asistencia na asamblea general di Parlatino na dos miembro di presidium, presidente y griffier. Mescos cu reunionnan di comision di Parlatino, ta alterna segun prome letter di fam.

Prohibi griffier di asisti biahenan caminda conseho legal no ta necesario manera p.e. celebracion dia di bandera di Corsou.

ELIMINA EXCESO

Presidente di parlamento, mescos cu minister, por haci uso di su propio vehiculo, ta cancela leasemento di auto pa presidente.

Ta elimina pidimento di cuminda durante reunion publico pa miembronan, ministernan y conseheronan. Trahadonan publico ta gana suficiente pa financia nan propio cuminda durante suspension pa come y asina ta elimina tambe e faboremiento di sostenedo di e partido na mando cu contract di catering.

TRANSPARENCIA

Siguiendo ehempel di Corsou, ta implementa hopi dierecomendacionnan di rapportnan existente pa mehora funcionamiento di parlamento y brinda mas transparencia. Nos ta propone haci

tur reunion di comision publico y ora ta trata un topico sensitivo dos tercera parti di miembronan di comision mester aproba pa haci e reunion secreto. Segun recomendacion di rapportnan haci, nos ta kere den rekeri un quorum pa reunionnan di comision central manera ta e caso na Corsou y haci nan publico.

COMISIONNAN

E miho garantia pa continuidad di maneho ta e comisionnan fiho di parlamento pero actualmente nan no ta funciona debidamente, tin cu nunca a reuni. Nos lo kier mira eleccion pa presidente y vice-presidente pa tur comision cu candidatonan splicando nan vision y plannan pa e comision prome cu ser elegi presidente y vice-presidente manera ta e caso na Corsou. Mescos cu presidium, nos ta propone pa tur comision tin un fecha fiho pa luna riba cual nan ta reuni cu posibilidad di agenda reunionnan extraordinario. Eligiendo presidente y vice-presidente di comisionnan a base di conocimiento y plannan lo mehora nan funcionamiento y percura pa nan opera di un forma proactivo.

COMUNICACION

E trabaonan di Parlamento di Aruba ta desconoci pa gran parti di nos poblacion, contrario na gobierno, no tin un maneho di comunicacion y no ta haci bon uso di e canal di television of radio di parlamento. Nos ta propone desaroya un maneho di

comunicacion structural cu ta haci miho uso di e recursonan di comunicacion di parlamento incluyendo su paginanan di media social. Parlamento ta e cas di pueblo y ta nos deber informa e votado kiko su representantenan eligi ta haciendo, pakiko e ta importante y con decisionnan tuma den parlamento lo afecta nan bida. Nos ta propone tambe pa fraccionnan haya acceso na canalnan di parlamento pa trece dilanti nan punto di bista riba leyman pendiente pa pueblo ta miho informa di e posicion cu su representantenan eligi ta tuma riba legislacion.

PUBLICACION DI NOTULA

Actualmente miembronan no tin acceso facil na notula di reunionnan di comision. Despues di nos proposicion pa haci reunionnan di comision publico, ta unicamente presidium lo depende riba notula di griffier. Nos ta propone cu na comienso di tur reunion di presidium, miembronan mester aproba e notula di e reunion anterior presenta pa griffier hunto cu publicacion di e opdracht pa reunion. Asina por garantiza cu notula claro y corecto ta existi y facilmente accesibel pa miembronan y nos lo kier mira nan comparti publicamente tambe. Actualmente cantidad di decision ta ser tuma den CHA pero nunca ta ser implementa of ehecuta y ora ta pidi notula esakinan nunca ta disponibel y esey no ta un administracion aceptabel di e organo mas halto.

LEGISLACION DI ACCION21

Ouderschapsverlof (Verlof pa embaraso y mayornan nobo) ta inclui e siguiente cambionan:

- Extende verlof pa mamanan nobo di 12 pa 16 siman (comparabel cu Hulanda y BES);
- Reduci e tempo di notificacion cu un empleado embarasa mester duna su dunado di trabao pa verlof prome cu nacemento pa 6 siman luga di dos luna actualmente, treciendo nos mas cerca di Hulanda y BES;
- Si un baby wordo hospitalisa durante e periodo di verlof, e dianan hospitalisa no ta conta den dianan di verlof (comparabel cu Hulanda y BES);
- Si e mama fayece durante parto, su tempo liber ta pasa pa su casa/pareha of e persona cu tabata biba cu e mama of cu a reconoce e baby como di nan. Esaki ta un innovacion cu Aruba lo ta e prome den Reino pa introduci;
- Verlof pa tata ta subi for di 2 dia te cu 5 dia pa parehanan registra y personanan cu ta bibando cu e mama, of persona cu a reconoce e baby como di nan. Esaki lo trece nos ley nan den concordancia cu e minimo recomienda pa International Labor Organization (ILO);
- Tatanan/parehanan ta haya oportunidad pa tuma cinco (5) siman adicional di verlof durante e prome seis lunanan despues di nacemento cu setena (70) porciento di nan salario sin cu esaki ta hisa gastonan

pa dunado di trabao (comparabel cu Hulanda y BES).

E iniciativa di ley a haya su conseho di Raad van Advies y awor ta pendiente cierto modificacionnan pa e ser presenta den sala di parlamento pa debate y votacion.

Kiesverordening (Ley electoral)

- Introduci derecho di voto pa Arubano bibando den exterior (comparabel cu Hulanda);
- Reforma sistema di restzetels, si un partido yega 75% di kiesdeler e por bin na remarca pa e prome restzetel y despues cu cada partido cu a logra un asiento haya un restzetel, e ora partidonan cu a yega 50% di kiesdeler por bin na remarca pa cualkier restzetel restando (comparabel cu BES);
- Reforma voto preferencial pa e candidatonan cu mas voto riba un lista procede pa parlamento (comparabel cu Sint Maarten);
- Introduci pre-eleccion/eleccion primario manera ta e caso na Corsou. Dos siman despues di entregamento di lista riba un dia sabray dia domingo lo tene eleccion primario pa partidonan no representa den parlamento. Durante dos dia e partidonan lo mester haya sosten di voto igual na un (1) porciento di cantidad di voto den eleccion anterior pa cualifica pa participa den eleccion parlamentario. Esaki ta reduci e cantidad di voto no

representa den parlamento y preveni cu partidonan ta mal usa nos leyman door di manda sostenedo ofrece sosten ficticio na partidonan cu no lo cualfica, pa aumenta e cantidad di restzetels;

- Introduci limite di termino pa parlamentario, minister y minister president. Nos ley di reforma electoral lo introduci un limite di termino di diesdos (12) aña pa parlamentario. Pa minister y minister president, lo introduci un limite di termino di ocho (8) aña respectivamente. Ta importante pa tin renobacion constante den politica y nos ta kere cu limite di termino ta un herment util pa garantisa esaki.


Estudionan científico a base di muestranan aleatoria (random sample) haci na 2021 y 2022 a conclui cu:

Setenta (70) porciento di residente di Aruba cu nacionalidad Hulandes y derecho di voto ta sostiene extende derecho di voto pa Arubanonan den exterior.

Duna Arubianonan den exterior derecho di vota.

70% di esnan entrevista ta na favor di duna derecho di voto na Arubianonan den exterior cu 3 di cada 10 ta pensa lo contrario.

Bo ta na favor di...?




n=1,200

Ochentitres (83) porciento di residente di Aruba cu nacionalidad Hulandes y derecho di voto ta sostene reforma e sistema di voto preferencial pa esnan cu mas voto riba un lista procede pa parlamento.

Sesentinuebe (69) porciento di residente di Aruba cu nacionalidad Hulandes y derecho di voto ta sostene limite di termino pa minister y parlamentario. Cincuentitres (53) porciento di residente di Aruba cu nacionalidad Hulandes y derecho di voto ta sostene reforma nos sistema di restzetels.

SITUACION - Na favor of contra
Bo ta na favor of contra di...?



ARUBA, JANUARI-FEBRUARI 2021. n=1,529

Eleccionnan regular, liber y husto ta e fundeshi di un democracia y ta brinda e votadonan un oportunidad pa influencia direccion di su pais y consecuentemente su bida. E iniciativa di ley ta na Raad van Advies y ta spera nan conseho pa por haci cualkier modificacion pa e ser presenta den sala di parlamento pa debate y votacion.

Codificacion cassatie arrest 12 jul 2024 Land Aruba vs Fundacion Orguyo (openstelling huwelijk)

ACCION21 lo procede cu codificacion di e cassatie arrest di Hoge Raad cu a habri

matrimonio pa parehanan di mesun sexo a base di e iniciativa di ley cu nos a presenta den parlamento. Actualmente parehanan di mesun sexo por casa y ta goza di tur derecho, mescos cu un pareha di sexo opuesto. Sinembargo tin parehanan cu a forma un union civil (geregistreerd partnerschap) prome cu matrimonio a bira legal y awor kier converti nan union civil den un matrimonio. Awor aki esaki ta unicamente posibel si e pareha divorcia y disolve nan union civil pa despues casa bek. Codificacion di e veredicto segun e iniciativa di ley presenta pa ACCION21 lo

permiti parehanan di mesun sexo den un union civil (geregistreerd partnerschap) cu a tuma luga prome cu matrimonio a bira legal, simplemente converti nan union den un matrimonio civil.

OTRO LEGISLACION PA INTRODUCI

Stabilisa LIM (landsverordening instelling ministeries)

Raad van Advies y otro instancia ta recomenda stabilisa e distribuimento di ministerio y portfolio conoci como e LIM, landsverordening instelling ministeries. Contrario na otro parti di Reino, Aruba a desaroya custumber di cambia distribuimento di ministerio y cartera cu cada gobernacion. Aunke parlamento a crea un comision pa hancra e LIM, nunca ela reuni. ACCION21 ta kere e ta importante pa hancra e LIM den nos constitucion pa haci'e mas permanente. Stabilisa e LIM lo hiba na un miho bista y control di carteranan/departamentonan y haci'e mas facil pa parlamento no solamente controla resultado di maneho pero tambe gastonan.

Raad van Advies tin un consejo pa dividi ministerionan den e siguiente manera: Asunto General; Finanzas; Desaroyo Teritorial, Vivienda y Medio Ambiente; Asunto Economico, Turismo y Transporte; Salubridad, Asunto Social y Labor; Husticia; Enseñasa y Cultura.

Nos a studia diferente modelo di gobernacion, di esnan mas eficiente manera Singapore y Monaco y di diferente small island developing states (SIDS). Directie Financien tambe a yega

di haci un estudio di con pa organisa gobierno di un forma mas eficiente y nan tambe ta conclui cu un gobierno di cinco minister ta optimal. Nos reparticion di ministerio y nan reponsabilidadnan ta lo siguiente:

- **Minister President y Minister di Asunto General**

Asunto di Reino y relacion internacional; Siguridad nacional; Maneho y informacion; Documentacion, automatizacion y digitalisacion; Integridad; Administracion y unidad di maneho; Organizacion gubernamental; Personal; Censo, HBK y MFA; Preveni desaster y responde; Funcionamento democratico; Representacion procedura legal; Otro asunto administrativo;

- **Minister di Finanzas**

Asunto financiero y fiscal; Entrada y gasto di pais; Transaccion debe publico; Integridad sector financiero; Participacion compania publico y semi-publico; Presupuesto y uzo eficiente di recurso; Patrimonio bienes movibel y inmovibel; Imposicion y recaudacion impuesto; Representacion pais accionista; Otro asunto financiero;

- **Minister di Husticia**

Orden publico y siguridad; Polis; Brandweer; Casino; Inmigracion y integracion; Cumplimento cu ley; Control di frontera; Corte; Prison;

Legislacion gobierno; Otro asunto ordo y siguridad;

- **Minister di Bienestar Humano**

Enseñasa; Ciencia; Innovacion; Reentrenamiento y enseñasa continuo; Cultura; Cuido di mucha y traimer dia; Biblioteca; Salubridad publico; Seguro social y nacional; Asunto social; Labor; Salud mental; Adicción; Tratamiento ortopedagogico; Famia; Monumento; Centro di barrio; Deporte; Adulto mayor incluyendo cuido; Cuido cronico; Recreacion; Proteccion social;

- **Minister di Economia, Infraestructura y Medio Ambiente**

Crece y diversifica economia; Turismo; Conservacion; Huur y consumidor; Desarrollo sostenibel; Estadística; Awa; Propiedad intelectual; Recurso natural; Comunicacion; Post; Aviacion; Navegacion; Transporte publico; Agricultura, pesca y ganado; Energia; Comercio; Desperdicio; Riool y Polucion; Biodiversidad; Naturalesa; Infraestructura; Vivienda; Inspeccion tecnico; Conservacion.

NOMBRAMIENTO DI MINISTER

Nos kier introduci un functie omschrijven, opleidingsvereisten y niveauvereisten pa minister cu por ser añadi na e LIM of den e ley di screening pa sigura profesionalismo, conocimiento y

capacidad di nos mandatarionan. Esaki lo trece un mihobalansa entre vision politico y obhetividad ora di nombramento pa minister cu parlamento por usa tambe pa guia su confirmacion.

MAXIMO CANTIDAD DI PERSONAL NA BUREAU DI MINISTER

Actualmente gobierno su maneho ta limita cantidad di personal na bureau di un minister te cu 25 persona pero e no ta hancra den ley. Un minister ya caba tin diferente departamento completo na su disposicion cu lo por yuda implementa su maneho. Nos ta pensa ta importante hancra den ley un cantidad maximo di personal cu un minister por tin den su bureau, ACCION21 lo kier mira un reduccion den cantidad di personal pa cada minister.

ADAPTA CON PRESUPUESTO TA SER CONTROLA

Segun constitucion presupuesto mester keda entrega tur aña cuminsamento di september y aproba prome cu fin di aña. Esaki ta pa duna parlamento tempo suficiente pa repasa e documento y reuni den comisionnan cu hefenan di departamento y ministernan concerni. Den practica parlamento no ta haya un presupuesto detaya suficiente pa por p.e. introduci un amienda y tampoco e comisionnan fiho di parlamento ta reuni riba presupuesto segun nan cartera p.e.

enseñansa cu Director di Departamento di Enseñansa. Ta importante pa hancra control y proceso di tratamiento di presupuesto di un forma mas formal y fiho cu ta garantiza cu parlamento den comisionnan fiho ta logra reuni cu tur hefe di departamento concerni pa discuti topiconan specifico relata na presupuesto.

INTRODUCI REFERENDUM CONSULTATIVO

Como un partido liberal progresivo nos ta kere den podera nos ciudadanonan, incluyendo introduccion di referendum consultativo. Actualmente tin un concepto di ley pa introduci referendum pero e concepto ta inclui referendum unicamente ora un mayoria den parlamento aproba. Nos kier introduci referendum cu por ser yama directamente pa pueblo, si p.e. dies (10) porciento di electorado den ultimo eleccion firma pa un referendum consultativo. Nos kier pa e tuma luga independiente di si un mayoria den parlamento aproba of no. Eventualmente nos kier adopta un sistema manera Suiza cu ta organisa referendum decisivo tambe y cu cuatro biaha pa aña ta tene referendum riba topiconan di importancia pa pueblo.

Ta importante nota cu un referendum consultativo manera actualmente proponi den e concepto entrega na parlamento pa fraccion MEP lo duna pueblo e oportunidad di opina pero NO dicidi si e keda aproba. Derechonan constitucional no por ser cambia a base

di un referendum y nos partido lo para firme contra manipulacion di pueblo cu engaño.

MEHORA LEY DI SCREENING PA MINISTER

Actualmente ta unicamente minister president ta repasa resultado di screening pa minister y screening di su persona ta ser repasa pa presidente di un colegio halto di estado. E resultado di screening ta ser warda na Gabinete di Gobernador y den pasado hopi nombramento dudoso a tuma luga. Ta importante pa democratiza e proceso y permiti lidernan di fraccion acceso na e screening di minister y trece cualkier preocupacion dilanti cu gobernador mientras ta salvaguardia privacidad di e candidatonan.

MEHORA LEY DI FINANCIAMENTO DI PARTIDO POLITICO

Actualmente nos ley di financiamiento di partido no ta funciona adecuadamente, rifa por ehempel no ta regula. Limite di 30.000,- pa partido y 20.000,- pa candidato por facilmente wordo supera door di haci donacion door di diferente compania (di mesun doño) of diferente miembro di mesun famia. Prestamo na partido politico no ta regula dus tanto un instituto financiero, un empresa of individuo por presta fondo na un partido superando e limitenan y den añanan venidero converti e prestamo den un donacion. ACCION21 lo kier mira eleccion financia completamente cu

fondonan publico, asina sacando placa priva fe politica y eliminando un conflicto di interes grandi. Parti di e fondonan aloca pa eleccion mester ser distribui igualmente entre partidonan y un otro parti segun sosten na ultimo eleccion.

INTRODUCI UN KLOKKENLUIDERSVERORDENING - 'WHISTLEBLOWER PROTECTION ACT'

Provee klokkenluiders cu proteccion fuerte contra persecucion vengativo ta importante pa curasha denuncia y fortifica efectividad di nos leyman.

INTRODUCI UN LEY DI ARCHIVO

Pa introduci digitalisacion di tur nos documentonan ta importante pa tin un ley cu ta determina ken ta encarga cu maneho di e documentonan y ken ta responsabel pa e documentonan. Mester introduci un ley di archivo pa por regula y defini e procesonan aki y pa sigura e.o. un transicion mas facil y completo di gobernacion.

INTRODUCI UN LEY PA PROTECCION DI DATO PERSONAL

Segun seccion H.9 di landspakket, paisnan di Reino lo traha hunto pa un nivel di proteccion harmonisa di dato personal den Reino den forma di un rijkswet, ley di Reino. Aunke tin un acuerdo gubernamental, nos fraccion a

pidi pa e ley ser diseña di un forma cu e datonan ta cumpli cu otro normanan manera e.o. pa transaccion financiero. Ta importante pa e dato ta util y accesibel unicamente cu e consentimiento di e ciudadano pa p.e. habri un cuenta di banco y otro transaccionnan cu mester cumpli cu compliance. E concepto actual, riba cual parlamento a haya un presentacion no a ser acopla na otro tratado y normanan pa haci bida di e ciudadano mas facil, un oportunidad perdi den opinion di nos partido cu ainda por wordo coregi.

INTRODUCI UN LEY DI TRANSPARENCIA - 'OPEN GOVERNMENT'

Ta importante introduci un ley cu ta obliga gobierno y parlamento publica y haci accesibel tur documento publico den un termino cortico via nan respectivo websitenan. Esaki no ta unicamente garantisamiho transparencia pero tambe aumenta confiansa den comunidad pa sector publico su operacion. Un ministerio di gobierno saliente a cuminsa publica via un website opera pa su ministerio pero sin hancra esaki den ley of door di sistemanan digital di gobierno dus su continuidad no ta sigura. Mester introduci un cuadro legal cu ta garantisamiho esaki pa tur ministerio y parlamento. Gobierno y parlamento mester actualisa nan website diariamente cu tur documentacion y grabacion pa mehora accesibilidad na informacion.

MINISTERIO DI ASUNTO GENERAL

MODERNISACION GUBERNAMENTAL

Costo di bida y nivelnan di pobresa inacceptabel ta e dos retonan mas grandi di e proximo gobierno. Gobiernonan di pasado a purba resolve e dos temanan aki door di haci aparato publico mas grandi y mas costoso, luga di yuda, nan ta haciendo e peor. Gastonan di gobierno na 2023 tabata 1.508 biyon florin, na 2025 gobierno tin planea di gasta 1.726 biyon florin, lubidando cu ta pueblo tin cu paga e aumento constante den gastonan di gobierno.

ALGO MESTER CAMBIA

Gobierno di Aruba ta mas cu sesenta (60) por ciento mas caro pa administra cu esun di Sint Maarten, despues di ahusta pa diferencia di tamaño di poblacion y nivelnan di debe. Aruba tin 2.000 ambtenaar mas cu Corsou, aunke nan tin un poblacion hopi mas grandi. Decadanan di nepotismo, nombramento politico y mal uso di recurso publico pa bentaha politico a resulta den un sector publico demasiado grandi. Un sector publico cu cada bes ta costa pueblo mas y mas placa y ta brinda un servicio deficiente den hopi area incluyendo mantencion y expansion di nos infraestructura, emiti permiso, regulacion excesivo, leyman laboral anticua y un sistema di impuesto acumulativo cu ta haci tur cos mas caro.

KERNTAKENANALYSE 2024

E acuerdo di pais entre Aruba y Hulanda (landspakket) ta un herment util pa asisti den reforma y restructura nos gobernacion. PWC a prepara un kerntakenanalyse 2024 cu ta identifica tareanan cu ta responsabilidad di gobierno, tareanan cu no ta responsabilidad di gobierno y tareanan cu ta mixto. Esaki ta un bon base pa reorganizacion di sector publico. Un recomendacion importante ta pa stabilisa e distribuimento di ministerio y portfolio conoci como e LIM, landsverordening instelling ministeries,

pero nos lo elabora mas ariba esaki den nos seccion, Parlamento di Aruba.

ELIMINA EXCESO

E crecimiento rapido den gastonan di gobierno ta inclui un crecimiento den exceso. ACCION21 lo elimina auto oficial 'dienstwagen' pa minister, presidente di parlamento y hefenan di departamento. Cada un di e personanan aki ta gana suficiente pa por usa nan auto personal pa transporte manera tabata den pasado. Lease auto di luho pa minister, presidente di parlamento y hefenan di departamento ta un gasto innecesario cu no por spera pueblo di Aruba sigui financia.

REVOCA AUTORIDAD DI MINISTER PA EMITI PERMISO

ACCION21 kier elimina posibilidad pa corrupcion, conflicto di interes y faboritismo door di revoca autoridad di un minister pa emiti permiso. Nos kier automatiza otorgamento di permiso pa nos no bay haya un situacion cu e corrupcion, conflicto di interes y faboritismo ta simplemente pasa pa un hefe di departamento. Introduciendo automatizacion por hisa eficiencia, transparencia, servicio na cliente (ciudadano) y integridad di procesonan. Den e minoria di casonan caminda procesamento manual ta necesario, Centrale Accountantsdienst (CAD) por

audit mas facilmente brindando miho servicio y integridad den procesonan gubernamental.

REDUCI DEPARTAMENTO

Gobernacion di Aruba ta consisti di mas cu 100 departamento, bureau etc., cada un cu un director cu ta cobra 25% toelage y den algun caso te hasta mas cu esey. Raad van Advies ta recomenda pa evalua existencia di cierto departamento y servicio y caminda posibel uni of reintegra den e departamento original p.e.

- Bureau High Commissioner Aruba Financial Center hunto cu Aruba Investment Agency (ARINA)
 - Bureau Relacion di Reino y EU hunto cu Bureau Representacion EU
 - Departamento di Progreso Laboral (DPL) hunto cu Departamento di Labor (DAO)
 - Bureau Traimerdia hunto cu Departamento pa Mucha y Hoben
 - Bureau City Inspector hunto cu Directie Natuur en Milieu (DNM)
- etc.

AMBTENAARS

Modernisacion di funcion y salario den sector publico ta un prioridad pa ACCION21, nos no por spera un aparato gubernamental eficiente y productivo cu un sistema di pago anticua. Aunke

oponentenan politico kier mal informa cu nos kier kita 1.500 ambtenaar, ta importante nota cu leyman di pais Aruba no ta permiti retiro di un trahado sin mas. Ambtenaarnan no por ser teni culpabel pa fracaso di parlamentonan di pasado den detene crecemento irresponsabel den tamaño y costo di sector publico. Retiro masal y convulsion social cu nan ta causa nota deseabel den un comunidad chikito. Sin embargo, reduccion gradual den cantidad di empleadonan publico y nan profesionalisacion continuo ta necesario si nos kier evita un avalancha continuo di medida cu pueblo Arubano no por carga mas. Esnan encarga cu maneho di pais Aruba tin un responsabilidad cu tur ciudadano, no unicamente esnan trahando den sector publico. Esey kier men ta keda necesario introduci incentivo pa transferi ambtenaar pa sector priva voluntariamente. Incentivo por varia dependiendo di condicion di mercado laboral pero por inclui pago mas halto y mantencion di beneficianan posiblemente financia pa gobierno.

PRODUCTIVIDAD

Sector publico na Aruba y otro partinan di mundo generalmente ta sufri di productividad mas abao cu sector priva. Nombramento di personanan clave a base di afiliacion politico luga di merito ta demoralisa trahadonan. ACCION21 lo reforma, restructura y depolitisa

Departamento di Recurso Humano (DRH). Modernisa y simplifica e sistema di salario hunto cu introduccion di pago y/of beneficio a base di productividad, performance-related pay, lo hiba na decentralisacion di tumamento di decision, identifica individuonan y nan logronan.

Inverti den automatizacion y digitalisacion di procesonan pa reduci e tempo den cual permiso y peticionnan ta wordo tramita na e maximo periodo stipuladen ley. Actualmente tin movernacion pa introduci loke ACCION21 a propone den su plan di partido 2021-2025 cual ta aprobacion ficticio, luga di negacion ficticio, si e peticion/permiso no ser trata durante e periodo stipula pa ley. Nos kier pasa responsabilidad pa sector publico cumpli dentro di e periodo stipula pa ley y gobierno mester responsabilisa su mes pa esaki sosode.

TRANSPARENCIA REAL

Nos kier publica agenda, documentonan y lista di decisionnan di conseho di minister, manera ta e caso na Hulanda, riba website di gobierno. Nos ta kere transparencia di berdad ta un manera di trece confiansa bek den gobernacion. ACCION21 lo haci esaki un prioridad pa garantiza mas transparencia y miho responsabilisacion di nos gobernantenan. Adicionalmente esaki

lo hiba na mehoracion di calidad y eficiencia di servicionan di gobierno y provee mas siguransa na e ciudadano cu topiconan importante pa nan, ta ser trata pa gobierno.

REGULA CONTRACTANT Y CONSEHERO

Maneho di e gobierno saliente ta limita tur minister na un maximo di binticinco (25) contractant, dienstverleningsovereenkomst (DVO). Nos kier regula nombramento y salario di esnan cu ta bin traha den gobierno temporalmente a base di contract. Actualmente na final di un periodo di gobernacion, ministernan ta purba aloca nan contractantnan den un trabao fiho como ambtenaar, esaki mester wordo restringi pa salvaguardia integridad y maneho di recurso humano di gobierno. Ta importante tambe pa contractantnan salario wordo schaleer mescos cu ambtenaar mientras modernisacion di salario y compensacion di ambtenaar ta pendiente.

PERSECUCION POLITICO

ACCION21 lo introduci un management team na DRH pa depolitisa e departamento y crea estructura y procesonan cu no por wordo abusa pa gobierno ni director. Mester introduci un Raad van Toezicht pa DRH cu ta controla e director y departamento. Nos a biba

cantidad di caso di persecucion politico y e suma di dwangsom cu gobierno mester paga ta mas halto cu nunca y ta rekeri accion inmediatamente.

PROMOCION 'BEVORDERING'

Modernisa e sistema di evaluacion (beoordelingssysteem) y reenforza cu ningun promocion por tuma luga sin un evaluacion cu ta considera productividad. Aplica un sistema di evaluacion structural a base di productividad lo elimina promocion di compinchi (voortrekkerij). Introduci un sistema di apelacion caminda un ambtenaar por apela un decision, posiblemente dilanti e Raad van Toezicht di DRH, pa evita cu lanta un caso den corte ta bira su unico recurso. Promocion di ambtenaar mester sosode pa un comision independiente manera e Raad van Toezicht di DRH pa garantiza obhetividad y depolitisacion.

SELECCION DI PERSONAL 'WERVING EN SELECTIE'

Nos kier introduci mas transparencia den e proceso di nombramento den sector publico. Sigura cu nombramento di un persona pa cualkier funcion mester ta a base di normanan obhetivo mara na e funcion incluyendo diploma, experiencia, conocimiento y capacidad. Independisa seleccion/nombramento di personal di gobierno pa un comision independiente manera e Raad van

Toezicht di DRH. Notifica parlamento ora un nombramento tuma luga contra conseho di DRH/Raad van Toezicht di DRH y laga e minister y/of director encarga responsabilisa su mes na parlamento.

ELIMINA NEPOTISMO 'FRIENDS & FAMILY'

Recientemente nos a mira con tolera conflicto di interes ta hiba na corrupcion. Gobierno saliente tin cuatro ex-minister bao investigacion y un minister a wordo manda cas pa parlamento y tin varios consehero di minister bao investigacion. Esaki ta sacudi confiansa den nos gobernacion, tur funcionario publico tin e honor y privilegio di sirbi su pais, confiansa di pueblo mester ser respeta. Fondonan publico ta sagrado y e practica di nombra campañado y pegado di bandera como contractant (cu no ta pasa via DRH) den departamento bao un ministerio mester no solamente caba pero wordo haci ilegal. ACCION21 kier introduci ley y maneho pa elimina e fenomeno di friends and family cu ta caracteriza gobernacion ultimo tempo. Evita conflicto di interes ta primordial pa garantiza un miho administracion di sector publico, famianan di gobernantenan no por ser tuma den funcion caminda e ta crea conflicto di interes.

MODERNISACION DI LMA Y BRA 1986

Nos kier modernisa nos leyman pa empleado publico, landsverordening materieel ambtenarenrecht, ta regla e posicion huridico di e ambtenaar y ta den necesidad di wordo modernisa. Ta importante pa e ley wordo simplifica, crea un comision independiente na cual ambtenaar por acudi pa evita cu tur caso mester caba den corte y sigura cu e ley ta wordo aplica debidamente cual no ta e caso actualmente. Tambe nos kier modernisa e BRA 1986 cu ta e ley cu ta regla e salario di ambtenaar, ta importante pa trahado den sector publico ser paga un salario comparabel cu sector priva y a base di productividad.

ACADEMIA DI MANEHO 'BESTUURSACADEMIE'

Mester expande Land Academy y introduci mas posibilidad pa profesionalisacion continuo di empleadonan publico den un academia di maneho cu ta certifica y cu bo por brinda nan un reconocimiento academico y/of profesional reconoci internacionalmente. Gobierno mescos cu companianan priva mester inverti den su personal y haci progreso profesional mas accesibel y provee compensacion adecua.

HOTLINE PA DENUNCIA CORUPCION

Nos kier introduci un hotline pa denuncia corrupcion di cualkier forma, incluso di un manera anonimo. Esaki lo por sosode via telefon, internet of via un meldpunt. Hunto cu e klokkenluidersverordening cu nos kier introduci (seccion Parlamento di Aruba), nos kier pa tur empleado publico y ciudadano denuncia cualkier acto corruptivo y pa esaki keda investiga rigurosamente di un forma obhetivo y sigur.

BUREAU DI INTEGRIDAD (BIA)

Nos kier fortifica Bureau di Integridad (BIA) door di haci e departamento independiente di minister y parlamentarionan cu un presupuesto separa manera ta e caso pa Raad van Advies y Algemene Rekenkamer. Sin garantisa su independencia, ta imposibel pa BIA funciona debidamente. BIA por opera e hotline pa denuncia corrupcion y investiga denuncianan di un forma obhetivo una bes nan ta independiente di gobierno. E departamento lo por brinda conseho tambe riba cambionan den maneho y/of ley. Nombraemento pa BIA lo mester sosode pa un comision consistiendo di presidentenan di HOF, Raad van Advies y Algemene Rekenkamer, manera tabata e caso pa ombudsman pero cu parlamento mester respeta e secuencia di preferencia contrario na loke a sosode pa e ombudsman.

DESTAHO PUBLICO

Nos kier mehora e sistema di destaho publico pa haci'e uno mas eficiente y lihe mientras nos ta expande su aplicacion. Esaki lo rekeri adaptacion di nos ley di destaho publico aanbestedingsverordening y nos ley di compatibilidad-compatibiliteitsverordening. Mester sigura cu companianan cu gana un proyecto publico ta solido, tin e financiamiento y ekipo necesario pa ehecuta e trabao y si nan no entrega segun contract mester tin consecuencia manera boet y exclusion di futuro contractnan publico pa un tempo. Tambe ta importante pa destahonan ser propaganda mas publicamente siguiendo e ehempel di Hulanda cu www.tenderned.nl. Nos kier mira mas transparencia den e proceso y bekendmaking pa publico conoce e proceso y ganadonan.

***MINISTERIO DI
FINANSAS***

BAHA COSTO DI BIDA

Rediseña nos sistema di impuesto

Costo di bida ta keda e reto mas grandi enfrentando e proximo gobierno. Nos sistema di impuesto acumulativo ta hisa costo innecesariamente. Mirando cu nos ta importa practicamente casi tur loke ta wordo consumi localmente, nos residentenan ta paga gastonan exageradamente halto.

Ehempel: un producto di balor AWG 100,- ta ser importa

AWG 100,-	Balor di producto
AWG 4,90	CIF (Cost, Insurance, Freight)- promedio 4,9%
AWG 1,36	1,3% Impuesto riba divisa pa compra y importa e producto
AWG 12,59	Invoerrechten (promedio 12%)
AWG 7,34	BBO na frontera 7%
AWG 8,32	BBO 7%
AWG 134,51	Costo pa consumidor EXCLUYENDO margen di ganashi di importado y bendedor

- Pa un comerciante importado cumpra un producto y transporte pa Aruba e mester cambia su florin pa dollar of euro mirando cu no por paga cu florin den mercado internacional. Banco Central di Aruba ta impone un impuesto di 1,3% riba cambio di divisa agregando AWG 1,36 di gasto;
- Ora e producto yega Aruba, Douane ta cobra invoerrechten riba e balor

di producto plus CIF (cost, insurance, freight). Averahe mudial di CIF ta estima na 4,9% na 2022 y e tarifa promedio di invoerrechten ta 12% agregando AWG 12,59 di gasto;

- Douane ta cobra BBO na frontera di 7% tambe riba e balor di producto plus CIF agregando AWG 7,34 di gasto;
- E importado ta bende e producto cu bendedor (retailers) cu despues ta bende e producto cu consumidor cu ta paga BBO di 7% agregando AWG 8,32 di gasto;
- E consumidor ta paga casi 35% na impuesto acumulativo sin conta margen di ganashi di e importado, bendedor, gastonan bancario pa transferencia internacional etc. cu ta hisa e prijs mas ainda.

ELIMINA BBO/BAZV/BAVP, INVOERRECHTEN, TOURISM LEVY, ENVIRONMENTAL LEVY, CAR RENTAL TAX, GAMING TAX, DEVIEZEN PROVISIE, TRANSFER TAX

Un sistema indirecto di impuesto ta mas robusto paso gran parti di entrada di gobierno lo yega door di actividad economico manera consumo cu ta menos vulnerabel na shock externo, contrario na ganashinan di compania. ACCION21 lo simplifica y rediseña nos sistema di impuesto y introduci un BTW riba un base amplio segun recomendacionnan di IMF y CAFT. BTW no ta un impuesto acumulativo dus e no ta ocasiona un inflacion di prijs mes

halto cu nos sistema actual. E ta mehora compliance y reduci tamaño di nos economía informal cu actualmente ta calcula na mas cu 1,3 biyon anualmente. Enseñansa, servicionan medico, actividadnan deportivo, servicionan financiero y seguro, cuidado di mucha, servicio di cuidado y cuidado na cas, energia renovabel y productonan asocia y fundraising lo ta exclui di BTW.

REVERSE CHARGE BTW

Pa sigura cu rediseñamento di nos sistema di impuesto ta husto pa tur competido, lo introduci un reverse charge BTW pa servicionan di compania internacional. No por permiti cu servicionan di p.e. accounting, consulting of legal internacional ta mas competitivo paso nan no mester cobra BTW, contrario na esnan local. Asina nos ta sigura un level playing field pa negoshi local cu ta provee servicio.

ELIMINA INKOMSTENBELASTING

Nos lo elimina inkomstenbelasting cu no ta produci mucho den caha di gobierno y ta un impuesto ineficiente pa colecta. Actualmente mester procesa mas cu 40.000 aangifte pa recauda menos cu diescinco (15) milyon pa año.

AHUSTA CAPITAL GAINS TAX

Nos lo ahusta e base di capital gains tax pa inclui e.o. propiedad y ahusta e tarifa na entre dies (10) – diescinco (15) por ciento. Residencia principal cu e propietario mantiene pa mas cu cinco año lo ta exonera di capital gains tax. Compliance riba capital gains tax lo ta mas facil mirando cu tur benta di propiedad ta pasa via notario.

AHUSTA WINSTBELASTING - 'CORPORATE INCOME TAX'

Nos vision ta pa un economia dinamico y resiliente cu ta contribui na caha di gobierno mas door di impuesto indirecto. Actualmente corporate income tax ta na bintidos (22) por ciento y nos lo kier studia posibilidad pa inicia un reduccion gradual te cu diescinco (15) por ciento pa haci nos economia mas competitivo den futuro. Ta reconoce cu compliance ta keda un reto y nos lo studia tambe reemplasa corporate income tax completamente y inclui'e den BTW como parti di rediseñamento di nos sistema di impuesto.

INTRODUCI SISTEMA DI IMPUESTO TERITORIAL

Nos sistema di impuesto actual tin algun di e tarifanan mas halto na mundo y apesar di ta hopi progresivo no a logra un distribucion mas husto di entrada.

Turismo ta representa gran parti di nos economia y nan no ta contribui nan fair share na impuesto. ACCION21 lo introduci un sistema di impuesto territorial cu lo cobra impuesto riba tur ganashi genera na pais Aruba. Esaki lo facilita Servicio di Impuesto pa unicamente controla entradanan genera localmente y amplia nos base di impuesto mientras nos ta haci nos economia uno mas competitivo.

AUTOMATISACION Y DIGITALISACION DI SERVICIO DI IMPUESTO

Nos lo sigui amplia digitalisacion di nos servicio di impuesto y introduci automatizacion caminda posibel pa reduci tempo di procesamento y otro tareanan.

ELIMINA IMPUESTO RIBA NUMBER DI AUTO – ‘WEGENBELASTING’

Impuesto riba number di auto ta ineficiente pa colecta y ta rekeri hopi esfuerzo innecesario di nos ciudadanonan y servicio di impuesto. Fuera di esey, e ta un flat fee cu no ta tene cuenta cu uso di auto y caretera. Nos kier elimina impuesto riba number di auto y reemplasa e entrada cu un aumento chikito di algun cen na accijns. Esaki ta mas husto paso mas un persona haci uso di su auto, mas e lo paga den accijns riba gasolin, tambe esaki lo curasha transicion pa auto electrico.

LIBERALISA USO DI MONEDA

Un moneda tin tres funcion: mecanismo di cambio, unidad di balor y garantia di spaar. Nos kier liberalisa e mercado y permiti nos ciudadano y empresanan usa e moneda di nan escogencia pa uso diario. Nos mercado financiero actual ta desfuncional cu interes riba bononan di pais Aruba mas halto cu interes di un prestamo comercial na banco. Como un partido liberal progresivo nos kier liberalisa e mercado, empresanan cu ta haci mas negoshi cu Merca lo prefera di conduci comerci den dollar y mester tine libertad pa haci esey den tur transaccion. Ciudadanonan cu yiu ta studia na Hulanda kisas lo prefera spaar den euro y mester tin e libertad pa haci esey. E falta di un mercado internacional pa florin Arubano ta limita no unicamente acceso na plataformanan di pago pero tambe acceso na productonan financiero. Nos no kier aboli florin Arubano pero si nos kier duna tur persona y negoshi e oportunidad pa haci transaccion den e moneda di nan gusto, ta premira cu gobierno di Aruba lo sigui opera den florin.

REFORMA BANCO CENTRAL DI ARUBA

Back to Basics

Eliminacion di deviezen provisie lo rekeri un reorganizacion di Banco Central di Aruba, actualmente nos banco central ta extremadamente caro pa opera y a desvia di su metanan principal. Banco

central su rol esencial ta inclui regula banconan y industria financiero na Aruba y sigura nan estabilidad y resiliencia. Maneho monetario, emiti notanan bancario, fia otro banconan placa 'lender of last resort', sigura estabilidad di e florin y controla suministro di placa ta otro tareanan di Banco Central di Aruba. Ta importante pa e instituto mantene su independencia pero nos lo kier mira un estudio pa identifica ki tareanan ta esencial pa Banco Central mantene y ki tareanan lo ta miho sirbi pa otro instituto(nan). Introduccion di limite di termino di diesdos (12) aña pa director y directiva di Banco Central ta algo cu nos lo kier introduci y tambe sigura cu tin representacion adecua di bankeronan cu experiencia den e industria luga di solamente academico y hurista.

SISTEMA DI PAGO LOCAL

E regulador NO por ta operador

Banco Central di Aruba como regulador di industria financiero NO por tambe ta un operador manera ta e caso actualmente cu I-Pago. Ta importante pa Banco Central pasa e sistema di I-Pago pa un otro instancia pa elimina e conflicto di interes actual. E sistema di I-Pago por ser desaroya pa permiti transaccion directo entre negoshi y eventualmente inclui tur individuo y asina ofrece un sistema di pago local como alternativa na esnan internacional. Nos lo kier mira un revision di tarifanan cu actualmente ta entre 10-15 cen pa transferencia, esaki ta un bon

fuerce di entrada pa Banco Central pero e ta añadi gastonan innecesariamente halto.

INTRODUCI ARUBA FINANCIAL SERVICES AUTHORITY (AFSA)

Nos lo kier introduci un instancia nobo, independientemente financia, pa regula industria di servicionan financiero. Aruba Financial Services Authority (AFSA) lo ta encarga cu traha y emiti norma y standardnan. Haciendo uso di dato y tecnologia lo aplica regulacion proporcional na riesgo tumando na cuenta tamaño, complehidad y impacto potencial riba diferente tipo di consumo. Actualmente nos tin regulacion desproporcional na riesgo cu ta obstaculisa nos economia y detene crecemento economico.

DESAROYA UN MERCADO CAPITAL LOCAL – ARUBA STOCK EXCHANGE

Siguendo ehempel di Bermuda y Cayman Islands nos kier desaroya un mercado capital local, Aruba Stock Exchange, cu lo ta miembro di World Federation of Exchanges (WEF) y International Organizations of Securities Commissions (IOSCO). Aruba Stock Exchange lo bira un plataforma eficiente pa mercadonan global y nos lo desaroya mas riba e posibilidadnan den nos plannan pa Ministerio di Economia, Infraestructura y Medio Ambiente.

APROBA RIJKSWET – REDUCI GASTONAN DI INTERES

Actualmente tin un acuerdo gubernamental entre Aruba y Hulanda pa introduci un rijkswet (ley di Reino) pa supervision financiero. E rijkswet lo mester ser aproba pa 1 mei 2025 y una bes esey tuma luga, interes riba nos prestamo cu Hulanda di 915,5 miyon lo baha di 5,1% te cu 3,4%. Si Aruba no aproba e rijkswet interes riba nos prestamo lo subi bek te 6,9%. Gastonan di interes ta representa riba 300 miyon florin anualmente pa pais Aruba, excluyendo pagonan riba proyectonan PPP cu ta rond di 80 miyon pa año. Aruba su debe di AWG 5,6 biyon ta financia entre 5-6,5% y introduciendo un rijkswet nos por reduci nos gastonan di interes substancialmente, scapando mas cu 150 miyon florin pa año. Hulanda a muestra disposicion pa refinancia debe di Aruba cu ta madura anualmente (usualmente entre AWG 300-500 miyon) na su nivel di interes cu lo libera fondo pa otro uso. Si Aruba a drenta e rijkswet pa supervision financiero na 2010 y por a fia placa na mesun interes cu Corsou y Sint Maarten, nos lo a scapa e pagado di impuesto Arubano riba 3,2 biyon florin den ultimo 14 año. Tanten Hulanda ta provee un nivel di interes mas competitivo cu nos por haya riba mercado internacional, acepta e rijkswet pa supervision financiero ta den nos interes nacional. Tur e normanan den e rijkswet ya caba ta hancra den e LAft, landsverordening Aruba financieel toezicht, dus no por papia di entrega nos autonomia paso parlamento a aproba caba unanimamente.

REPRIORISAGASTONANDIGOBIERNO

Hisa inversion den enseñansa te cu 6% di GDP

Nos kier mira gobierno repriorisa gastonan, actualmente ta gasta rond di 4,6% di GDP riba enseñansa y recomendacion internacional ta pa gasta un minimo di 6%. Nos, ACCION21 lo hisa e suma cu pais Aruba ta inverti den enseñansa te cu 6% durante e proximo periodo di gobernacion. Esaki lo genera rond di 100 miyon florin extra pa enseñansa.

Hisa inversion den salubridad publico te cu 10% di GDP

Actualmente pais Aruba ta gastando rond di 8,4% di GDP riba salubridad y nos lo kier mira e suma subi te cu 10% durante e proximo periodo di gobernacion. ACCION21 lo repriorisa gasto di gobierno pa aloca mas fondo pa salubridad publico incluyendo cuida di nos adulto mayor. Esaki lo genera rond di 112 miyon florin extra pa salubridad y cuida cronico.

REDUCI GASTONAN DI GOBIERNO

Presupuesto 2023 tabata tin un total di 1,508 biyon den gastonan di gobierno. Presupuesto 2025 tin un total di 1,726 biyon den gastonan di gobierno. E aumento constante y structural den gastonan di gobierno no por sigui si nos kier evita mas medida. Gobierno di Aruba ta mas cu 60% mas caro pa administra cu Sint Maarten despues di ahusta pa diferencia den tamaño y Aruba su nivelnan di debe mas halto. Aruba tin mas cu 2.000

ambtenaar mas cu pais Corsou aunke nan ta mas grandi den poblacion y tamaño. Mester frena e aumento den gastonan di gobierno y cuminsa reduci nan te cu 1,500 biyon mientras Aruba su debe ta riba 50% pa GDP. ACCION 21 lo reduci gastonan total riba presupuesto di pais Aruba pa 2,5% anualmente durante e proximo cuatro año. Un reduccion di 10% di gastonan di gobierno lo scapa e pagado di impuesto mas cu 170 miyon florin pa año.

ABSORBA DEBE DI STUDIANTE

Exito di nos pais den futuro ta depende riba nos capacidad di convence nos studiantenan bolbe. Nos mester aresta e brain drain cu Aruba ta sufriendo den ultimo añanan a causa di falta di progreso profesional, salarionan mas abao, un sector publico ineficiente y domina pa patronahe politico etc. Nos pais ta keda un small island developing states (SIDS) dus dificilmente nos por competi a base di compensacion cu paisnan y ciudadnan grandi y avansa. Siguiendo modelo di Singapore, ACCION21 kier desaroya un maneho cu gobierno ta asumi pago di debenan escolar di estudiante si nan bolbe Aruba dentro di dos año di graduacion y keda residencia na Aruba pa por lo menos cinco año. Ta premira cu durante e periodo aki ta probabel cu e profesionalnan hoben lo namora, casa y haya yiu. Door di inverti mas den enseñansa nos kier percira cu bon scolnan, lasonan familiar y vivienda accesibel lo atrae e parehanan hoben keda Aruba y forma nan bida aki nan. Nos

mester ta innovativo pa sigura cu nos talentonan ta bolbe y keda, un sistema di impuesto rediseña tambe lo haci'e mas atractivo financieramente.

CUENTANAN ANUAL CONTROLA

Actualmente tin un tardansa inaceptabel den cuentanan anual, jaarrekening, di pais Aruba. Minister di Finansas a kibra tur compromiso di entrega y ultimo ciclo presupuestario cu a cera ta di año 2018. Presupuesto ta representa gobierno su plan y unicamente cu un cuenta anual parlamento por controla con gobierno a gasta e placa den presupuesto. Un cuenta anual ta ser controla pa Algemene Rekenkamer y despues Centrale Accountantsdienst(CAD)mestercontrola pa mira si e ta acopla na administracion di pais Aruba. Te ainda ningun cuenta anual di pais Aruba a ser controla pa un accountantskantoor externo, algo cu mester sosode anualmente. Proximo Minister di Finansas mester structura entregamento di cuenta anual na tempo, juni di tur año y percira cu nan ta controla pa un accountantskantoor externo.

ACCESO LIHE NA SISTEMA FINANCIERO

Banco Central di Aruba a presenta un ley cu ta garantisa acceso na un cuenta basico pa tur individuo y compania legalmente estableci na Aruba. Mester sigura cu personanan stranhero cu un propiedad na Aruba tambe tin acceso facil na nos sistema financiero. Garantisa

acceso ta e prome paso, tambe mester reduci e tempo cu ta dura habri un cuenta, specialmente pa negoshi. Actualmente comerciante y entrepreneurs ta warda seis luna of mas pa habri un cuenta comercial. Nos kier introduci regulacion cu ta reduci esaki te cu dos siman of menos door di ofrece un cuenta condicional cu limite mientras proceso di screening ta completa. Awor aki mucho persona y compania ta wordo excluidi di nos sistema financiero obligando nan di opera den sector informal. Esey ta un peliger mas grandi no solamente pa integridad di nos sistema financiero pero tambe ta dificulta servicio di impuesto di controla.

TAX HOLIDAY PA ENTREPRENEURS NOBO

Nos kier curasha entrepreneurship y kier ofrece incentivo fiscal pa personanan habriendo nan prome negoshi. ACCION21 lo brinda tur entrepreneur nobo un tax holiday (periodo liber di impuesto) di dos aña pa yuda nan ta exitoso. Comienso di un negoshi nobo hopi biaha ta e periodo mas critico y actualmente servicio di impuesto ta cuminsa cobra prome cu nan a cuminsa gana placa, poniendo hopi presion riba nan capital limita. Nos kier duna nan un espacio pa nan por crea un fundeshi solido y asina gobierno por contribui na nan exito. Tambe nos kier inclui entrepreneurship den nos sistema di enseñansa pa cultiva un mindset emprendedo den nos hobennan.

PUBLICA PRESUPUESTO COMPLETO

Pueblo tin e derecho di por controla con gobierno ta gasta su placa. ACCION21 ta kere den publica e totalidad di gobierno su gastonan riba website di gobierno pa tur ciudadano por controla con cada cen di nan placa ta ser gasta. Un ministerio di gobierno saliente a cuminsa pero e no ta hancra den ley ni tampoco riba plataforma di gobierno dus su continuidad no ta sigura. Hunto cu hancra e LIM landsverordening instelling ministeries den constitucion pa facilita comparacion, publicacion di presupuesto di pais Aruba pa ministerio y departamento lo brinda miho control no unicamente pa parlamento pero tambe pueblo en general.

SIGURA ACCESO NA SISTEMANAN DI PAGO INTERNACIONAL

Actualmente acceso na sistemanan pa ricibi pagonan internacional pa hopi profesional ta mucho dificil y caro. Plataformanan manera paypal no ta opera na Aruba, liberalisacion di uso di moneda lo haci'e mas facil pa plataformanan di pago y industria di fintech por opera na Aruba. Esaki lo crea oportunidadnan nobo pa nos talentonan local opera y ofrece servicio den mercado internacional.

***MINISTERIO DI
HUSTICIA***

POLIS

Cuerpo policial ta encarga cu ordo y siguridad, ta importante pa gobierno provee tur e hermentnan necesario pa nan por cumpli cu nan tarea importante. Inverti den ekipo y facilidadnan adecua incluyendo celnan di detencion cu ta cumpli cu normanan internacional mester ta un prioridad. Nos kier mira un estudio independiente riba e cantidad di agente policial necesario y desaroya un plan structural cu ta inclui entrenamiento (Scol di Polis) adecua pa garantiza un cuerpo completo y motiva.

Nos kier mira expansion den uso di camera, specialmente riba careteranan importante. Tambe mester inverti den innovacionnan manera uso di drones, biometrics, body and dash cameras, license plate recognition technology, predictive policing, artificial intelligence, facial recognition software, mobile fingerprinting, reporting software y thermal imaging.

BRANDWEER

Nos kier sigura cu Brandweer ta consisti di un cuerpo completo y bon ekipa. Gobierno lo mester inverti den entrenamiento di mas local y sigui inverti den nan profesionalisacion continuo. Nos lo kier mira un estudio riba e tareanan di brandweer, nan ekipo y ki tipo di incidentanan mester ser atendi y den ki volumen. Despues di e estudio ta

importante desaroya un plan cu ta sigura personal suficiente y ekipo adecua pa e incidentenan cu nan ta enfrenta.

CORTE

Introduci un director y directiva pa corte mescos cu ta existi pa HOF, pa sigura standardnan di calidad, protocolnan di organisacion y un modelo di gobernacion pa corte. Mester percura cu personal di sosten ta completo y cualifica y cu nos corte funciona cu e mesun nivel di administracion y burocracia cu Hulanda pa evita cu cinco hues ta facilmente bira esnan mas poderoso den corte sin chekeo suficiente. Mester sigura e autoridad discrecionario di huesnan pero den un comunidad chikito, mester percura cu crimennan cu ta pisa hopi, manera abuso di mucha, ta haya castigo suficiente. Actualmente e castigo maximo den Reino ta cadena perpetua pero recientemente un tata cu a viola su yiu muhe di cinco aña a keda condena na unicamente nuebe aña, esey no ta aceptabel. Aunke corte ta emiti richtlijnen, den practica esaki no semper ta wordo sigui pa huesnan. Nos lo kier studia e posibilidad di tambe introduci un Raad van Toezicht pa evalua aplicacion di nos leyman den combinacion cu un corte profesionalisa cu un director y directiva. E Raad van Toezicht por garantiza e calidad legal di huesnan mientras ta mantene husticia su independencia. Incidentenan den partinan Caribense recien ta muestra e importancia di miho

organisa nos corte. Na Aruba un reportero di corte a pasa door di documentonan relaciona cu caso di tata di su yiu, na Sint Maarten e vestigingsmanager a horta 1,2 miyon dollar y na Corsou e ex-presidente di HOF a cobra 250 mil pa aña pa sinta den directiva di Ennia. Mester sigura tambe cu procesamento di casonan ta sosode den un tempo adecua y brinda miho conocimiento di nos leyman den Papiamentu y otro idioma. Tambe nos mester mehora procesamento di casonan, husticia mester por funciona den un tempo adecua.

LEGISLACION – DIRECTIE WETGEVING EN JURIDISCHE ZAKEN (DWJZ)

Actualmente e departamento di legislacion y asuntonan huridico ta enfrenta un falta di capacidad cu dificilmente por ser yena a causa di e sistema di salario den gobierno. ACCION21 kier modernisa e sistema di salario den gobierno cu nos ta spera lo habri posibilidad pa DWJZ tin capacidad suficiente pa asumi su responsabilidadnan den un termino adecua. Den corte DWJZ no tin un bon track record defendiendo gobierno pero hopi biaha esaki ta relata na e falta di informacion adecua ricibi di hurista di respectivo departamentonan. Nos lo kier mira un evaluacion di e departamento su capacidadnan y tambe mas responsabilisacion di e huristanan den

departamentonan, no ta aceptabel cu gobierno ta perde mayoria di su casonan den corte costando pais Aruba hopi miyones.

PRISON

Nos kier mira un plan structural pa temporalmente aumenta capacidad na nos prison actual cu ta carece di capacidad suficiente y desaroya un plan pa construi un prison nobo siguiendo e ehempel di Bonaire cu tin un di e miho facilidadnan den Caribe. Nos kier instala solar panels pa introduci airco den e celnan mirando e calor intenso cu nos ta bibando algun luna di aña cu ta afecta salud di presonan.

FUSEER INMIGRACION, DOUANE Y GUARDA NOS COSTA

Nos kier fuseer Inmigracion, Douane y Guarda Nos Costa den un Customs and Border Protection (CBP) siguiendo e ehempel di Merca pa aumenta capacidad y eficiencia mirando e retonan creciente den e respectivo departamentonan.

REVISA NOS LEYNAN DI DETENCION

Nos kier mira un revision di nos leyman di detencion, actualmente hopi biaha ta detene un persona riba un diabierna sabiendo cu e no lo wordo interoga prome cu dialuna. Esaki ta un forma di

tortura psicologico cu ta mina e libertad di e ciudadano. Nos kier mira detencion y interogacion inmediato dentro di diesdos (12) ora. Nos ta mira tambe cu personanan ta ser declara sospechoso y actualmente por tarda añas prome cu nan caso yega dilanti corte. Esaki tambe ta un forma di tortura psicologico cu ta mina e libertad di e ciudadano. Si un persona ser declara un sospechoso, su caso mester tuma luga dentro di un periodo di tempo adecua, no mas cu binticuatro (24) luna despues cu su detencion inicial. Nos kier adapta nos leyman pa sigura cu Husticia por haci su trabao y garantis derechonnan basico y humano di e ciudadano.

EXPANDE ACCESO LEGAL GRATIS

Nos ta reconoce cu hopi ciudadano no tin acceso na nos sistema di husticia pa falta di recurso y conocimiento di ley. ACCION21 kier expande acceso legal gratis pa ciudadano di menos recurso y nos kier inclui trabao pro bono como parti di e formacion di abogadonan nobo.

DEPARTAMENTO DI INTEGRACION, MANEHO Y ADMISION DI STRANHERO (DIMAS)

Nos kier reorganisa e departamento y inverti den automatizacion y digitalizacion pa tur permiso ser trata den e periodo stipula pa ley cu no ta e caso actualmente. Nos kier desaroya un plan structural pa maneho di stranhero

tumando na cuenta proyecionnan demografico y e realidad cu Aruba ta sobrepopula.

Algun cambio den maneho cu nos kier implementa:

- Nos kier duna mayornan di baby stranhero naci na Aruba mas tempo pa cumpli cu e garantia pa nan recien naci. Actualmente mayornan Filipino of Chines mester paga un garantia di mas cu AWG 5.600,- ora nan baby nace pa sigura su permiso y consecuentemente acceso na AZV. Nos kier ofrece mayornan di baby stranhero naci na Aruba un periodo mas largo pa cumpli cu e pago di garantia di p.e. cinco aña cu pagonan regular cada aña te ora alcanza e suma;
- Mirando cu mas cu sesenta (60) porciento di permiso cu wordo nenga pa falta di documento of un documento incorrecto ta wordo bolbe sometí, nos kier introduci mas flexibilidad pa coregi un solicitud incompleto of incorrecto pa reduci e cantidad di aplicacion cu DIMAS mester tramita;
- Nos kier revisa e derecho di reunificacion familiar, actualmente un stranhero tin derecho riba reunificacion familiar despues di unicamente tres permiso. Mirando cu Aruba ta sobrepopula ta importante pa nos modifica esaki y restringi derecho di reunificacion familiar te despues cu un inmigrante tin firma

liber y/of elimina e derecho durante periodonan di desempleo of tanten nos ta sufri di sobrepoblacion. Ta importante desaroya un plan structural pa maneho di inmigracion cu ta incorpora necesidadnan demografico pa sigura pensioen di nos ciudadanonan, salvaguardia nos medio ambiente y fortifica crecemento economico;

- Studia expande permiso di trabao automatico pa pareha di inmigrantenan residencia na Aruba.

ADAPTA Y APLICA NOS LEYNAN DI ADMISION

Nos kier mira e siguiente cambionan y aplicacion di nos leynan:

- Un stranhero cu yega Aruba cu un permiso pa trabao domestico por unicamente eherce trabao domestico te despues cu e logra firma liber, no tin flexibilidad pa cambia pa otro tipo di permiso;
- Un persona cu viola nos leynan di admision ta ser exclui di entrada y residenciapaunperiododiminimodias (10) aña sin posibilidad di exoneracion (excluyendo ciudadanonan di Reino);
- Un persona cu aplica pa asilo no por aplica pa ningun otro tipo di permiso y si su peticion keda nenga mester bandona pais Aruba y ta exclui di entrada y residencia pa un periodo di dias (10) aña;
- Un persona cu traha ilegalmente sin

permiso of den un trabao of pa un negoshi no autorisa ta ser exclui di entrada y residencia pa un periodo di minimo dias (10) aña sin posibilidad di exoneracion (excluyendo ciudadanonan di Reino). Introduci castigonan mas pisa pa dunadonan di trabao cu ta emplea personanan indocumenta manera boet di p.e. AWG 50.000,-

REGULARISA PERSONANAN INDOCUMENTA

ACCION21 a presenta un mocion 16 april 2024 pa regularisa temporalmente personanan indocumenta cu ta cumpli cu rekisitonan dirigi riba salvaguardia y promove interes general, manera un limite di edad, limite di reunificacion familiar, certificado di buena conducta y por lo menos tres aña bibando na Aruba. Partido RAIZ tabata co-iniciado di e mocion, partido AVP a sostene e mocion mientras partido MEP, Gerlien Croes (FUTURO) y Ryçond Santos do Nascimento (LPR) a vota contra cu consecuencia e no a ser aproba. Nos ta keda comprometi na ofrece un bida digno na personanan indocumenta door di ofrece permisonan temporal cu condicion.


Empleo di personanan indocumenta ta keda un problema grandi na Aruba cu ta afecta nos ciudadanonan di menos recurso mas severamente. Un trahado

Arubano no por competi cu un persona cu ta traha pa menos cu salario minimo. E personanan aki por ta nos bisniña, nan yiunan a lanta aki y nos ta kere cu hopi ta forma un parti integral di nos comunidad. Actualmente hopi ta traha den economia informal y no ta contribui na AZV of paga AOV. Nos ta kere ta importante combati empleo ilegal, pa logra esey mester regularisa gran parti di esnan indocumenta cu permisonan temporal. Na mesun momento ta importante introduci castigonan mas pisa pa dunadonan di trabao cu ta

emplea personanan indocumenta manera boet di p.e. AWG 50.000,- Un estudio cientifico na 2022 di un muestra aleatorio di 1.200 residente Arubano cu nacionalidad Hulandes y derecho di voto a indica cu sesenticinco (65) porciento ta na favor di regularisa esnan indocumenta pa nan tambe contribui na AZV y AOV etc. ACCION21 ta na favor di regularisa esnan indocumenta bao condicionnan cu permisonan temporal.

Regularisa tur persona indocumenta pa nan tambe por contribui na AZV, belasting, SVb etc.?

65% di esnan entrevista ta na favor pa regularisa tur persona indocumenta cu obhetivonan specifico, contra di 35% cu no ta na favor.



Regularisa tur persona indocumenta pa nan tambe por contribui na AZV, belasting, SVb etc.?

	SEXO		EDAD				NIVEL DI EDUCACION							TOTAL
	Homber	Mula	18-28	29-44	45-59	>=60	Ensñansa Basico / GPE	HAVO	HAVO	VWO	HBO	HBO / Bachelor's	Ensñansa Universitario / Master's / Doctorado	
Si	64	65	70	75	61	58	67	63	63	46	56	66	63	65
No	36	35	30	27	40	42	33	36	37	54	34	34	37	35
TOTAL	100	100	100	100	100	100	100	100	100	100	100	100	100	100

APRIL 2022

ARUBA

REFUGIADONAN

Semper mester tene cuenta cu nos balornan di yuda nos bisiña y mester reconoce cu e necesidadnan na nos pais bisiña Venezuela a causa un crisis humanitario cual ta afectando nos den hopi sector. Nos ta na favor di un sistema humanitario pa trata esnan cu ta pasando necesidad pero sin cu esey ta crea necesidad pa nos mesun poblacion. Nos mester establece convenio cu otro paisnan manera Canada, Australia, Merca y paisnan Europeo pa acepta sikiera parti di e poblacion di refugiado actualmente na Aruba paso nos no tin e capacidad di absorbe tur.

Ta estima cu tin mas o menos entre 10.000-20.000 refugiado Venezolano na Aruba y ainda no tin un registracion di nan cu ta preveni nos pidi fondo di ayudo di UNHCR y otro instancianan internacional pa nan cuido. Aruba tin obligacion bao di e Convencion di Ginebra pa cu refugiado pero nos no tin e conocimiento ni e recursonan pa procesa e aplicacionnan di asilo y tampoco e infraestructura pa carga e cantidad di persona cu ta aki nan. Un inventario lo ta necesario pa establece cuanto nan ta, den ki condicion nan ta biba y ki talento nan por tin pa nos economia. Mirando cu nos ta un isla chikito caminda desaroyo ya caba a destrui nobenta (90) porciento di nos naturalesa, comunidad internacional mester reconoce cu nos capacidad pa acepta refugiado ta limita.

MINISTERIO DI BIENESTAR HUMANO

ACCION21 kier uni enseñansa, salubridad, asunto social, labor, cultura y deporte den un solo ministerio pa desaroya un maneho integral pa nos recurso di mas importante, nos capital humano. Aruba ta bendiciona cu capacidad y talento excepcional den enseñansa, salubridad y cultura. Mas cu un minister individual pa carga un vision, mester fondonan di inversion. Cada ministerio ta costa entre 10-20 miyon anualmente, uni dos of tres ministerio ta libera entre 20-40 miyon adicional cu por ser inverti den e respectivo carteranan. Nos kier brinda nos profesionalnan capacita di e veld e recursonan necesario pa por ofrece nos ciudadanonan e miho nivel di enseñansa posibel, e miho nivel di cuida posibel, e miho oportunidadnan posibel, pa nos tur por BIBA MIHO.

ENSEÑANSA

ENSEÑANSA 2050

Aruba a stipula un vision den su Plan Educacion Nacional 2030, caminda a establece varios meta y a defini di ki forma lo kier realisa e metanan den Enseñansa. Faltando 6 aña pa e plan aki caduca, e momento a yega pa nos para keto y hunto evalua unda nos ta, kiko nos a logra y kiko falta. E resultado di e analisis aki mester sirbi como base pa asina defini e plan di accion pa e vision Enseñansa 2050.

Educacion ta un derecho humano fundamental y e fundeshi pa paz y desaroyo sostenibel di un pais. ACCION21 ta consciente di su responsabilidad pa garantiza e derecho fundamental aki di tur ciudadano di pais Aruba. Den su vision pa Enseñansa 2050, ACCION21 ta boga pa modificacion y adaptacion continuo di e sistema y su procesonan cu ta genera y garantiza e derecho fundamental di e siñado y ekipa cada cuidadano pa e retonan cu nos pais y mundo ta enfrenta den siglo 21. Enseñansa 2050 mester bira un contrato social caminda di un forma participativo cada miembro di Aruba ta uni na e esfuerzo colectivo y contribui cu conocimiento y innovacion necesario pa duna forma na un futuro sostenibel hancra den husticia social, economico y medioambiental.

Nos di ACCION21 ta enfoca riba Enseñansa 2050 cu ta CONECTA, EMPODERA y TRANSFORMA nos comunidad pa asina cada ciudadano BIBA MIHO!

CONECTA

Como ser humano nos ta diseña biologicamente y socialmente pa conecta cu otro loke ta esencial pa nos sobrevivencia. Educacion tampoco ta un proceso aisa, sino e ta hopi liga na nos relacion cu tur aspecto di bida. Siñamento ta un proceso continuo di baby te adulto mayor. Enseñansa di 2050 mester ta un ecosistema cu ta:

- Organisa pedagogia ariba principianan di cooperacion, colaboracion y solidaridad;
- Desaroya curiculo cu e enfasis ariba siñamento ecologico, intercultural y interdisciplinario di un forma mas practico;
- Fomenta y stimula scolnan como centronan educativo protegi pa inclusion, equidad y bienestar individual y colectivo;
- Facilita tur oportunidad pa desaroya y stimula siñamento pa bida largo y no solamente den scol;
- Stimula investigacion y generacion di data pa promove renobacion continuo di e sistema y procesonan di Enseñansa na un forma efectivo, eficiente y sostenibel;
- Conecta na nivel di organizacion,

interdisciplinario, inter social y cultural pa facilita un transicion fluido y eficaz pa e siñado y e maestro .

TRANSFORMA

E forma con nos a bin ta organisa enseñansa a hunga un rol fundamental den transformacion continuo di nos sociedad. UNESCO den su rapport “Reimagining our futures together: a new social contract for education” (2021) ta reconoce e poder di enseñansa pa sigui stimula cambio profundo y transformativo den e sociedad di siglo 21. Como pais nos ta enfrenta e reto di keda cumpli cu e promesa di garantia e derecho na educacion di calidad pa tur mucha, hoben y adulto, y probecha plenamente di e potencial transformador di enseñansa como vehiculo cu ta hiba nos na un futuro colectivo sostenibel. Pa logra e vision aki, ACCION21 ta boga pa un contrato social renoba caminda enseñansa y derechonan humano ta forma e fundeshi pa por atende cu inhusticia, desigualdad y inequidad y na mes momento transforma e futuro di Aruba di un forma integral. Enseñansa no solamente mester brinda conocimiento y habilidad, pero mas cu tur cos mester genera transformacion profundo, continuo y perdurabel di e siñado como hende den un comunidad di siglo 21. E mester bira e simiya cu ta nace, crece y duna fruta cu ta sirbi

e necesidadnan individual y di un comunidad cu ta biba miho y den harmonia cu otro.

EMPODERA

Den Enseñansa 2050 e siñado y e maestro mester forma un ekipo empoderador cu ta busca y construi conocimiento continuamente hunto. Enseñansa 2050 mester desaroya ciudadanonan participativo y responsabel pa e bienestar di nan mes y di Aruba. E siñado ta wordo stimula pa tin mas participacion y control den su proceso di educacion, desaroyando habilidadnan di pensamiento critico y bira mas independiente. E siñado no ta solamente wordo prepara pa un profesion pero pa enfrenta bida y e retonan su dilanti como ciudadano responsabel di pais Aruba den e realidad di siglo 21.

E rapport di United Nations hunto cu International Labor Organization ‘Transforming the teaching profession’ (2023) ta reafirma ACCION21 su vision caminda e maestro ta keda e factor central pa transformacion di sistema y procesonan di enseñansa. Pa por logra esaki e profesion di maestro mester wordo rebalorisa y redifini di un forma colectivo, responsabel y sostenibel pa atende cu e necesidadnan di e siñado di siglo 21. ACCION21 den su vision kier stimula tur scol, nan directiva,

comunidad, familia y instancianan den comunidad, incluyendo politica partidista, pa uni di un forma solidario rond di e maestro. Nos kier reconoce den accion y decision, e importancia di su trabao y crea condicionnan continuo cu ta permiti'e eherce su trabao di un forma exitoso y sostenibel. Esaki na su turno por pone cu e maestro ta empodera e siñado di siglo 21.

E SIÑADO

Ken ta un siñado? Den enseñansa formal nan ta participante di Enseñansa preparatorio te Enseñansa profesional (intermedio of halto) y Enseñansa universitario. Sinembargo, un siñado su proceso di siñamento ta sigui despues di su enseñansa formal. Siñamento ta un proceso continuo di un ser humano durante e diferente etapanan di su bida, di baby te adulto mayor. Considerando e puntonan menciona, ACCION21 ta boga pa un maneho nacional cu ta stimula siñamento pa bida largo.

ACCION21 kier sigura cu e desaroyo educacional di e siñado ta crea un ciudadano di Aruba y di mundo responsabel y empodera pa conhuntamente crea un Aruba y Mundo MIHO PA BIBA. Pa soluciona e retonan nos dilanti, ta necesario pa tin habilidadnan pa funciona optimalmente den siglo 21 y haya caminda den e mundo compleho existente. Por identifica e siguiente habilidadnan cu mester ser

stimula, desaroya y sosteni:

- Pensa critico;
- Pensa creativo;
- Soluciona problema;
- Habilidad computativo (un manera practico y creativo pa atende problema usando instrumentonan digital);
- Habilidadnan basico di ICT;
- Sabiduria di medianan di comunicacion;
- Colabora y traha den ekipo;
- Habilidadnan cultural y social (ciudadania);
- Auto-regulacion.

Cu e metodo didactico actualisa y eficaz por logra siña e habilidadnan menciona. Pa desaroya e habilidadnan di siglo 21 di e siñado, e maestro mester adapta su rol y didactica. E curiculo mester wordo modernisa pa crea un ambiente cu ta stimula habilidadnan di siglo 21.

Siña e habilidad y actitudnan rekeri ta exige primordialmente conocimiento y experticio di e disciplina (materia). Ta importante pa conscientisa e siñado di e forma con nan ta studia y con nan ta procesa informacion pa adkiri conocimiento. E ta yuda pa stimula un actitud curioso y conecta cu ta influencia e motivacion intrinsico pa siñamento.

E desaroyo di e habilidadnan di siglo 21 por ser mehora door di ofrece Enseñansa 'significativo di bida real,' p.e. door di integra materianan den disciplinanan amplio.

ACCION21 ta boga pa duna poder na nos siñadonan pa ta exitoso den siglo 21 door di:

- Ehecuta un midimento di base 'nulmeting' pa determina cuanto habilidadnan di siglo 21 nos ta ofrece actualmente na tur nos scolnan;
- Adapta e norma pa financiamiento/ 'normbedrag' na locual realmente ta e necesidad di e diferente tipo di enseñansa;
- Actualisa y desaroya e curiculo riba tur nivel di Enseñansa formal pa asina nos siñadonan por crece y sobresali;
- Incorpora conscientisacion di bestia y medio ambiente den e curiculo di scolnan preparatorio y basico;
- Un maneho di idioma 'taalbeleid' mas flexibel;
- Introduci e materia Desaroyo Propio riba tur nivel di scol den e curiculo. Desaroyo Propio ta ekipa e alumno cu habilidadnan riba nivel social emocional. E materia aki ta traha preventivo door cu e alumno ta siña hermentnan pa por maneha retonan di bida;
- Provee material di scol di siglo 21 den e sentido mas amplio dje palabra;
- Haci posibel actividadnan extra curricular na tur scol (preparatorio, primario y secundario). Siñadonan despues di orario di scol, por keda eynan pa siña habilidadnan (enfoca riba esnan di siglo 21). Ofrece deporte, expresionnan creativo, debati, programanan di computer,

- plantamento y mas te cu 6.00 pm. E actividadnan extra curricular ta ser ofreci (gratis of prijs simbolico) door di fundacion, compania priva, departamento di gobierno (e.o. Sta. Rosa/IBISA/DCA/BNA). Edificionan escolar despues di 1.30 pm (primario) of 3.30 pm (secundario) ta bashi. Mediante actividadnan extra curricular e edificionan lo ser uza optimalmente;
- Ofrece den tur nivel di educacion y pa comunidad formacion civico e.o. door di brinda informacion di Aruba su organonan di estado, sistema parlamentario y politico;
- Promove conocimiento di derechonan humano den scol y pa comunidad general. Tur miembro di nos sociedad mester por haya e informacion y instrumentonan pa tin un bon comprension di con nos pais ta funciona y ta ser maneha. ACCION21 ta kere sagradamente den sostene y aporta na e desaroyo di ciudadanonan bon informa;
- Miho guia pa scoge pakete educacional/'profielen';
- Miho guia pa siñado durante e proceso di investiga y scoge un estudio y carera;
- Maneho integral di enseñansa informal y adulto continuo pa stimula siñamento pa bida largo.

STRUCTURA DI CUIDO

Sentimento di seguridad durante e proceso di siñamento ta instrumental pa logra participacion y resultadonan maximo di participantenan y maestro-/educadornan. ACCION21 kier garantiza esaki door di:

Un estructura di cuidado (cu ta optimal y sostenibel) pa tur scol den enseñansa formal. Entre otro door di duna entrenamiento na tur maestro pa reconoce e pasonan cu mester ser tuma den señala problema-/situacionnan social di siñado;

E trabou di consehero/'counselor' mester ta uno tempo completo 'fulltime' na cada scol;

Un protocolo pa atende intimidacion 'bullying' cu ta actualisa y cu ta funciona optimalmente;

Un consejo studiantil y consejo participativo (medezeggingschapsraad) pa tur scol. Esaki pa stimula participacion di siñado, personal y mayornan pa haci'e scol un miho comunidad;

Mas trahado social y maestro mediador pa tur scol. Na e momento aki, p.e. pa tur scol di SKOA (46) tin solamente 3 trahado social den servicio;

Disponibilidad di guia psicologico pa maestro y participante. Actualmente pa 1.500 maestro na Aruba tin solamente un psicologo disponibel;

Maneho integral social-emocional pa tur personal di tur scol na Aruba.

E MAESTRO

Pa por desaroya e habilidadnan di siglo 21 di e siñado, e maestro tin cu incorpora nan den e curiculo y percursa cu conscientemente ta traha riba nan. Siña habilidad y actitud ta rekeri primordialmente conocimiento y experticio di un disciplina. Ta importante pa conscientisa e siñado di e forma con nan ta adkiri conocimiento y con nan ta procesa informacion pa conocimiento. Ta yuda pa stimula un actitud curioso y responde riba e motivacion intrinseco pa siña.

Nos maestronan mester ser sosteni y haya training/upgrading pa por haci esaki. Den consulta cu e veld di Enseñansa a identifica algun punto di enfoke pa por logra esaki.

ACCION21 ta sostene e siguiente puntonan di accion:

- Adapta maneho di tarea (taakbeleid) cu ta resulta den mas espacio pa profesionalisacion;
- Evalua y expande curiculo di IPA;
- Introduci e posibilidad pa por studia tempo parcial na Aruba (MBO, HBO y WO). Esaki ta haci'e atractivo pa studia banda di bo trabou (salario ta necesario pa mantene bo famia y bo mes) y sigui desaroya bo mes, pero tambe ta stimula enseñansa pa bida largo;
- Haci salario di maestronan y di personal di apoyo competitivo;
- Maestronan ta haya anualmente un 'promocion di experticio' activo door di introduci un ciclo (di tres aña) di progreso, funcionamiento y

evaluacion. E promocion aki ta ser duna a base di e shete competencianan di e maestro. Mediante e introduccion di promocion di experticio, e sostenibilidad y calidad di e maestro ta ser garantisa;

- Cuido y sosten social-emocional pa maestro. Un ehempel ta introduci un persona di confiansa pa maestro;
- Asistente di maestro, banda di asistente di maestro tecnico, pa tur scol;
- Un miho guia pa maestro y refresca su conocimiento anualmente tocante estudionan nobo y/of opcion pa estudio adicional pa apoya e siñado. Esaki por apoya e decano pa guia y conseha siñadonan.

Den e vision di Enseñansa 2050, ACCION 21 tambe ta mira e importancia di:

- Adapta pedagogia y haci reforma di curiculo hunto cu e maestro como parti integral di e proceso;
- Fortalece iniciativanan pa stimula enseñansa pa e no keda limita den e cuatro murayanan di un local;
- Defini y renoba descripcion di funcion y tarea den taakomschrijving pa maestro y empleadonan di apoyo den Enseñansa pa trece esaki mas na e realidad y necesidadnan actual;
- Stimula oportunidadnan pa e maestro of scol por experimenta cu diferente tiponan di conceptonan di educacion den les;
- Maneho structura y integral pa combati embebecimento ‘vergrijzing’

y retencion di maestronan cualifica.

MINISTER DI BIENESTAR HUMANO Y DEPARTAMENTO DI ENSEÑANSA

Aruba ta conta cu mas o menos 22.000 siñado cu ta studia na diferente scol y instituto. Minister ta responsabel pa e calidad di Enseñansa na Aruba conhuntamente cu Departamento di Enseñansa, Inspectie Onderwijs, Bureau Leerplicht y directivanan escolar. Ministerio tambe ta responsabel pa e calidad di infraestructura, proceso y sistema di tur scol y instituto.

DEPARTAMENTO DI ENSEÑANSA

- Adapta y/of cambia e leyman necesario pa asina Enseñansa por desaroya;
- Inventarisacion di e necesidadnan financiero di tur nivel escolar pa tin un bista concreto di e situacion actual;
- Introduci un mecanismo di financiamiento pa busca financiamiento internacional y/of subsidio;
- Percura pa profesionalisa maestro riba presupuesto, ‘budget professionalisering’;
- Desaroya un curiculo cu ta garantisa habilidadnan di siglo 21 pa tur nivel escolar. Modernisa y optimalisa e kerndoelen pa siglo 21;
- Revisa, adapta y innova e metodonan

pa scol special (primario y secundario). Es decir actualisa y modernisa esaki pa asina e siñadonan por ta miho prepara pa mercado laboral;

- Percura pa tin control (contenido) di nivel pa examen escolar (SE) y examen central (CE) cu ta ser traha na Aruba. Esaki ta posibel via un laso di cooperacion cu CITO;
- Traha un plan a largo plaso/multi-annual pa innovacion di tur nivel di Enseñansa.

DIENST INSPECTIE VAN HET ONDERWIJS

Por haya e tareanan central di Inspectie Onderwijs riba www.ea.aw

- Percurapacumplicueprescripcionnan legal relaciona cu Enseñansa;
- Raporta y conseha e Minister y otro stakeholders tocante desaroyonan señala;
- Evalua e calidad di Enseñansa;
- Stimula e scolnan pa traha riba nan propio calidad di cuida.

Den transcurso di añanan e tareanan a keda basta negligisha. Un inspeccion cu ta funciona optimal lo contribui pa e nivel di Enseñansa sobresali na Aruba. ACCION21 kier facilita Inspectie Onderwijs pa alcanza e tareanan aki door di:

- haci un nulmeting pa constata tur e retonan cu tin den Inspectie Onderwijs;
- optimalisa Inspectie Onderwijs door di traha hunto cu Inspeccion di Hulanda.

BUREAU LEERPLICHT

Na Aruba nos tin e ley di leerplicht. ACCION21 kier modernisa e ley aki pa asina e siñado por saca lo maximo di su mes. Pa logra esaki ta necesario pa e leerplicht (cu ta cuminsa desde Enseñansa primario te ora un siñado tin 16 año) ser modernisa y adapta pa un startkwalificatie. Un startkwalificatie ta un diploma di HAVO, VWO, MBO nivel 2 (basisberoepsopleiding di Hulanda) of mas halto.

Cu un startkwalificatie bo tin mas oportunidad pa haya un trabao. Pa e motibo aki ACCION21 ta boga pa adapta leerplicht pa un startkwalificatie. Asina mas siñado tin un miho oportunidad riba mercado laboral y nan por crea un miho bida pa nan mes y nan famia.

Nos tin e siguiente puntonan di accion pa Bureau Leerplicht:

- Adapta e ley di leerplicht pa startkwalificatie;
- Un control y mantencion funcional di e startkwalificatie;
- Un miho fluho y conexion entre tur nivel di educacion.

DIRECTIVA ESCOLAR

- Establece lasonan formal di cooperacion cu institucionnan educacional;
- Haci posibel e participacion di sector priva pa por inverti den educacion profesional (beroepsonderwijs);
- Educa lidernan institucional tocante

- manejo di presupuesto;
- Conecta necesidadnan presupuestario na e Plan Educacion Nacional (PEN 2030);
 - Inventarisa continuamente riba tur nivel kico e necesidadnan di e specialistanan ta, incluyendo p.e. suficiente personal di ICT. Momentaneamente digitalisacion di Enseñansa ta ser prepara, pero no tin suficiente personal pa ehecuta esaki debidamente;
 - Haci uzo di institucion y expertonan local (e.o. IPA y UA);
 - Informa docente kico e posibilidadnan ta di trekkingsrecht y presupuesto di formacion (transparencia);
 - Anualmente liderazgo mester discuti y stimula promocion di experiencia (deskundigheidsbevordering) cu maestro;
 - Inclui dia di estudio (studiedagen) obligatorio den e programa anual. Na Hulanda, p.e. na MBO, gobierno ta duna cincuentinuebe (59) ora anualmente na un maestro pa e por uza pa promocion di experiencia. Maestronan mester sinti cu nan por y mag di profesionalisa legitimamente sin sinti nan mes obstaculisa;
 - Un cultura di cooperacion ta promove y stimula intercambio di conocimiento;
 - Facilita otro forma di 'Enseñansa tradicional,' pensa riba Enseñansa basa riba proyecto of estilo 'Dalton' y 'Montessori' etc.

INFRASTRUCTURA, PROCESO Y SISTEMA

- Gasto pa mantencion di facilidad, mueble, diseño y instalacionnan (digital) mester ser traslada pa e ministerio responsabel pa infraestructura;
- Decentralisa scol di ministerio pa asina e directivanan escolar por tin mas control riba kico ta pasa na scol;
- Aboli nombramentonan politico;
- Introduci norma cu ora ta yena tur vacatura, mester sigui un procedura di solicitud transparente y husto;
- Crea un plataforma cu ta stimula intercambio y comunicacion entre tur stakeholder di Enseñansa. Dos ehempel di plataforma cu ta haci esaki ta Erasmus+ y eTwinning;
- Expande y mehora infraestructura pa digitalisacion den Enseñansa.

EPB Y EPI (PROYECTONAN DI INCLUSION)

Nos di ACCION21 kier traha, den cooperacion cu EPI y EPB, riba mas inclusion di e calidadnan di nos siñadonan pa asina nangana experiencia. Esaki nos kier logra e.o. desaroyando proyecto:

- Un kinderverblijf subsidia pa fondonan y/of sector priva. Pa asina mayornan hoben por sigui nan estudio na EPI sabiendo cu nan yiunan ta sigur. Un bentaha adicional

di esaki ta cu studiantenan di EPI di e sector di 'Cuido y Bienestar' por sigui nan pasantia na e kinderverblijf aki;

- Un oficina di administracion subsidia pa fondonan y/of sector priva. Asina siñadonan di EPI/EPB di e sector 'Administracion' por ofrece nan servicio na un prijs atractivo pa negoshi chikito y mediano. Mediante e proyecto aki lo crea luganan di pasantia pa siñadonan di EPI/EPB;
- Un espacio di exhibicion subsidia pa fondonan y/of sector priva. Asina siñadonan di EPI/EPB di sector 'Ciencia y Tecnologia' ta haya e espacio pa exhibi nan proyectonan. Empresarionan por bishita e centro aki y hiba proyecto (contra pago) den nan propio desaroyo, pensa riba mueble diseña, desaroyo tecnico etc. E siñadonan ta ser exponi cu consecuencia mas facilmente un negoshi por ofrece nan un luga di pasantia.
- Tayernan subsidia pa fondonan y/of sector priva. Esaki por inclui p.e. 'con bo ta come saludabel.' E sector 'HORECA', door di nan cushina extenso, ta ofrece posibilidad pa duna tayer na e Arubano cu mester ayudo pa cushina un plato saludabel pa su famia. Asina tambe luganan di pasantia pa siñadonan di EPI/EPB ta ser crea.

ACCION21 ta convenci cu nos scol y siñadonan tin hopi talento. Facilitando e tipo di proyectonan aki pa medio di adaptaley y crea fondonan, nos siñadonan

ya durante nan estudio por duna un aporte valioso na nos sociedad. Ademas nan ta traha riba nan habilidadnan di siglo 21. Haciendo e proyectonan aki posibel, bo ta percursa pa mas inclusion, di scol, siñado y negoshinan di Aruba.

CONSCIENTISACION - PA TUR SCOL

Enseñansa mester kier haci di su siñadonan ciudadanonan di mundo consciente. Un instrumento pa forma ciudadanonan di mundo ta pa tin conscientisacion como un punto di agenda. Conscientisacion por stimula y pa e motibo ey nos kier pa scolnan duna mas atencion n'e contenido di conscientisacion:

- Desaroya un maneho integral y sostenibel nacional di inclusion y diversidad den enseñansa pa tur scol na Aruba incluyendo p.e. Dia Internacional di Salud Mental (october), Dia Internacional di Derecho di Mucha (november), Diabierna Biña, LGBTQ awareness (december) etc.

E tipo di programanan aki hopi biaha por ser desaroya cu asistencia di instancianan cu hopi biaha por provee materialnan pa nan ehecucion.

ENSEÑANSA CONTINUO

Enseñansa pa adulto lo ta diferente na 2050. Segun economia mundial y sociedad ta cambiando enseñansa pa adulto lo mester transforma den mas cu

un proceso pa duna competencia laboral. E realidad ta cu nos ta un comunidad chikito cu un problema creciente di vergrijzing. Pero bira grandi y avansa di edad no kiermen bira inutil. Segun nos ta move den siglo 21, e maneho nacional di enseñansa den practica mester enfoca mas riba e ciclo di bida completo di e individuo y pone atencion special na e adulto y e adulto mayor. ACCION21 ta comprometi pa defini di ki forma enseñansa por brinda diferente oportunidad pa fortalece enseñansa pa bida largo caminda tur ciudadano sin distingui unda nan ta den edad por tin acceso igual na educacion.

ENSEÑANSA Y OTRO TERENO DI DESAROYO

Nos di ACCION21 ta reconoce e importancia di educacion y su relacion cu otro terenonan di desaroyo.

- Mercado laboral, p.e. actualmente tin un necesidad pa 1.000.000 programmers den Latino America y Caribe y 1.200.000 na Norte America. E demanda lo sigui crece cu desaroyo di inteligencia artificial y su aplicacionnan. Actulamente nos sistema di enseñansa formal no ta ofrece niun curso den programming. Esaki ta un oportunidad perdi mirando cu hopi di e trabao nan aki por ser haci remotely habriendo posibilidad pa nos siñadonan local;
- Salubridad;
- Fortificacion di sentido comunitario;

- Cuido y formacion di mucha, formacion pre-escolar ta duna participantenan un fundeshi y bentaha den Enseñansa;
- Sosten adicional pa siñadonan den situacion economico desbentahoso.

FINANCIAMIENTO DI ENSEÑANSA

ACCION21 lo repriorisa gastonan di gobierno y hisa inversion den enseñansa te cu seis (6) porciento (actualmente rond di 4,6%) di GDP durante proximo periodo di gobernacion. Esaki lo nifica un aumento di rond di 100 milyon florin extra pa Enseñansa cu lo ser introduci den fase cu 25 milyon adicional tur año durante cuatro año.

METODONAN PA FUTURO

Enseñansa mester alinea miho cu desaroyonan moderno y adapta metodonan ta un enfoque di ACCION21.

- Enseñansa no ta berdaderamente amistoso pa e siñado. Tin masha poco papiamento cu siñado den scolnan. Hopi ta imponi riba siñadonan pa maestro, comunicacion ta di un banda so. Con esaki ta pone e siñado sinti? Nan opinionan riba klas, scol y actividadnan escolar ta ser scucha y balora? Si siñadonan ta gusta bay scol ta ser considera importante? ACCION21 ta kere cu siñadonan mester gusta bay scol y nan opinion y sentimentonan mester conta.
- Enseñansa no mester ta laf y

monotono. Actualmente tin poco variacion den e trabao cu siñadonan mester haci na scol. Enseñansa mester ta mas desafiante y cosecha fantastia pa hisa compromiso di e siñado y mayornan.

Kiko mester cambia?

- Cada scol mester haya mas responsabilidad pa enseñansa na scol y desaroya su mesun plan pa logra e metanan;
- E punto di salida di Enseñansa mester ta desaroyo total, desaroyo di e personalidad di un siñado;
- E rol di maestro mester evoluciona. Nan tarea principal mester bira provee un ambiente agradabel caminda e siñado ta tribi expresa su mes y sinti su mes comodo. Tambe tin un cambio di maestro pa facilitado. Maestro mester tin un rol importante den e composicion di curiculo na scol;
- Departamento di Enseñansa ta provee preconditionnan pa bon Enseñansa y ta mete menos cu e contenido di Enseñansa;
- Directivanan ta provee e facilidadnan necesario pa un scol desaroya y implementa su mesun ruta na metanan di Enseñansa;
- Instituto Pedagogico Arubano (IPA), mas seleccion di maestro cu curason pa e ofishi y conexion cu metodonan nobo;
- Inspectie Onderwijs controla, guia, curasha y crea oportunidadnan nobo.

Con?

Door di instruccion tematico. Material

di materianan di geografia, historia, conocimiento di naturalesa, trafico, estudionan social, religion etc. ta ser converti den temanan, caminda lineanan di desaroyo continuo ta decisivo. Uso di hermentnan moderno di Enseñansa ta excelente pa esaki.

Enseñansa tematico ta basa riba tres necesidadnan hopi importante pa e siñado. Prome, tin e necesidad pa relacionnan. Un siñado kier sinti su mes confortabel. Pesey brinda siguridad ta un prerequisite pero adicionalmente un siñado kier sinti acepta, pa ta parti di un grupo y pa sinti bon bini.

Segundo, siñadonan mester sinti cu nan ta desaroyando. Nan mester reconoce cu nan sa y por haci mas y mas.

Tercero, siñadonan mester experiencia un cierto libertad. Nan mester reconoce cu e desaroyo cu nan ta experencia ta parcialmente determina pa nan mes, cu nan mes ta un enlace den e proceso di siñamento educativo.

E metodo aki ta produci siñadonan completamente diferente. Den areanan social, oral y skirbi nan tin hopi mas experticio y nan desaroyo cognitivo ta hopi mas halto paso nan ta involucra den loke nan ta siña. Adicionalmente ta haci un yamada na nan talentonan existente, riba nan imaginacion y tin hopi variacion den e metodonan cu nan ta traha.

E siñadonan aki ta gusta bay scol.

CaracteristicanandieformadiEnseñansa aki:

- Siñadonan ta disfruta un experiencia di enseñansa primario hopi mas agradabel;
- Siñadonan ta creativo den haci y pensa;
- Siñadonan ta hopi mas firme den nan sapato;
- Siñadonan ta experiencia hopi menos cijferdruk;
- Siñadonan ta siña traha riba nan mes y den grupo;
- Siñadonan y mayornan ta hopi mas involucra;
- Maestronan ta asumi un rol diferente cu ta curasha nan pa ta mas comprometi cu nan scol;
- E ta ofrece hopi mas oportunidad pa actualisa curiculo;
- Mas y miho uso di ICT;
- Talento presente den siñadonan ta mas reconoci y por wordo desaroya miho;
- E nivel di comprendemento di lesa ta hopi mas halto.

ACCION21 lo kier introduci estudionan regular y structural di nos siñadonan.

SALUBRIDAD

Aruba ta enfrenta diferente retonan den cuidado cu mester di atencion urgente. Mientras tin lista di espera largo den hopi area di cuidado, nos profesionalnan tambe mester di mas ayudo y sosten. Falta di personal ta un tema persistente

y ACCION21 kier mira renumeracion competitivo (cu otro partinan di Reino) pa por atrae mas profesionalnan medico bin traha na Aruba. Nos vision ta crea un estructura di cuidado cu ta inclui cuidado preventivo caminda e pashent ta central.

CUIDO PREVENTIVO

Nos kier expande mision y meta di AZV cu un proposito mas amplio y cambia e landsverordening zieke-en ziektekostenverzekering pa sigura cu AZV por ofrece cuidado preventivo y no solamente curativo. Esaki lo inclui examinacion regular di pashentnan asina facilitando diagnostico mas temprano y te hasta por yuda preveni desaroyo di malesanan. Examinacion regular dental pa persona di tur edad tambe lo ta parti di expansion di cuidado preventivo. ACCION21 ta di opinion cu a largo plazo esaki lo reduci e gastonan di AZV y mehora cuidado pa nos poblacion.

FORTIFICA AZV Y DVG

Nos ta kere cu e siguiente departamentonan mester di fortificacion sea door di mas fondo y/of personal.

- Gele Koorts en Musketien Bestrijding (GKMB);
- DVG – Department of Food and Consumer Product Inspection and Hygiene ta encarga cu tur control na hotel, restaurant etc. y nos kier fortifica e toezichhouders den forma di

bijsholing. Asina nan lo por desplega nan trabao di un forma responsabel segun standard internacional;

- Servicio Veterinario lo mester evalua si nan lo kier keda den servicio di DVG of si nan lo kier habri nan practica pa elimina cualkier conflicto di interes;
- Servicio di registracion di personal medico lo mester keda actualisa mas regularmente pa garantiza un miho bista di kende ta trahando;
- Evalua Kwaliteitsinstituut Aruba cu of bao supervision di Ministerio di Salud y Inspeccion Hulandes;
- Separa Inspeccion di Remedi for di Inspeccion di Salud Aruba (IVA) manera tabata stipula den e Ordenanza Inspeccion di Remedi prome cu IVA a keda funda;
- Fortifica Inspeccion di Salud Aruba (IVA) pa por tin un miho bista riba calidad y siguridad di henter sector di cuidado, cu a cuminsa funciona desde 1 januari 2017;
- Nos mester mas handhaving, mester acredita toezichthouders pa asina por mihor controla unda fondonan ta bay, fortifica manehonan existente y introduci esnan cu falta.

GASTONAN DI AZV

Nos ta kere cu sigura un maneho mas eficiente posibel di AZV lo provee miho cuidado pa nos ciudadanonan y garantiza e fondo pa futuro generacionnan.

- Adkision conhunto di medicamento, recurso, material y ekipo (cu hospitalnan den territorio Caribense di Reino);

- Capacitacion regional y planificacion di capacidad di personal di cuidado;
- Inventarisa gastonan di salario dentro di AZV;
- Fortifica prome linea di cuidado y introduci mas oficina di dokter di cas combina pa aumenta eficiencia y expande orarionan di servicio pa reduci presion y cuidado mas costoso na hospital;
- Mehora comunicacion entre dokternan local y introduci un plataforma nacional pa informacion medico cu ta conecta tur proveedor;
- Mehora comunicacion entre dokternan local y dokternan den exterior ora ta manda pashent pa tratamiento afor. Sigura cu nan behandelingsplan ta continua despues di nan regreso;
- Mehora control door di introduci un behandelingsovereenkomst pa pashentnan cu bay den exterior cu boet si e hospital y dokter den exterior no cumpli dentro di e tempo acorda;
- Establece un Call Center cu ta na altura di pashentnan den exterior y un estado actualisa di nan tratamiento;
- Conscientisa pueblo tocante e costo di nan cuidado door di comparti recibonan;
- Desaroya un plan structural cu por sigura continuidad di AZV den futuro sin corta den e basispakket;
- Mehora educacion tocante alimentacion saludabel.

SALUD MENTAL

Na Aruba actualmente unicamente rond di binticinco (25) por ciento di esnan den necesidad di cuidado pa salud mental ta haya tratamiento. Demanda ta hopi mas grandi cu capacidad y mayoria di casonan lo por wordo trata pa psicologo. Nos ta kere ta importante:

- Profesionalisa loke nos tin;
- Alcansa pashentnan acute;
- Apoya dokternan di cas.

Aworaki ta inaceptabel cu 7-8k hende tin derecho di cuidado pero no ta ricibi'e y cu te hasta den casonan di mucha e lista di espera ta demasiado largo.

Percura cu gobierno su 'Flexible Assertive Community Treatment (FACT)' team ta bon ekipa cu personanan capacita pa atende cu e retonan den cuidado di salud mental.

Mester mehora e compartimento di data entre e diferente instancianan incluyendo dokternan di cas, Respaldo y Stichting Hunto. Tambe mester mehora e facilidad pa dokternan di cas por transferi pashent pa Respaldo.

Studia e posibilidad di centralisa cuidado pa salud mental y combina Respaldo y Stichting Hunto.

Profesionalisa estudio pa cuidado di salud mental na Aruba y hisa e cantidad di p.e. GZ psicologo.

Reestablece e proyecto di entrena

suficiente GZ psicologo pa ofrece cuidado pa salud mental na tur oficina di dokter di cas un dia pa siman.

ADICCION

Nos lo kier inverti mas den centro di rehabilitacion pa mehora cuidado pa nos adictonan. Adiccion ta un sintoma y como parti di cualkier programa di rehabilitacion mester inclui tratamiento psicologico. Tambe nos kier sigura cu tin suficiente 'halfway house' pa brinda adictonan den recuperacion un stap intermediario pa nan saneamento y eventual reintegracion den sociedad y mercado laboral. Nos kier mira mas programa di educacion como parti di nos curriculopaconscientisamuchanandesde un edad jong di comportamentonan adictivo y recursonan di ayudo manera gruponan di auto-ayuda.

EUTANASIA

Den discusion tocante eutanasia mester considera pashentnan cu ta terminal y tin e deseo pa termina nan bida pa por mitiga mas sufrimento. Nos ta kere cu despues di restructuracion di nos sistema di salubridad publico, lo ta apropiado pa studia e tema di eutanasia y con miho por estructura esaki hunto cu guia y sosten pa famia.

Un estudio cientifico di un muestra aleatoria di 1.529 hende na Aruba cu nacionalidad Hulandes y derecho di voto na 2021 a demostra cu cuarentitres (43)

porciento di nos poblacion ta di opinion cu eutanasia ta hustificabel, trintiun (31) porciento ta contra y bintishete (27) porciento no tin opinion. E siguiente pasonan ta:

- Haci un estudio pa determina e demanda pa eutanasia;
- Crea un concepto di ley cu lo por keda introduci pa establece y regula e procedura.

PERMITI REMEDINAN ALTERNATIVO

Como partido liberal progresivo nos ta kere firmemente den brinda e libertad na e individuo pa por explora tratamentonan alternativo bao guia di un profesional. Nos ta kere den ampliacion di remedinan disponibel pa no solamente uso di p.e. CBD Oil y otro productonan manera remedinan natural. Por ehempel, den caso di un persona cu un solo riñon ta importante incorpora mas remedi natural cu ta posibel pa salvaguardia su sobrevivencia.

Na Aruba antes tabata tin un cultura grandi di curandero cu tabata haci uso di mata y otro remedi natural pa sana y sosten e personanancu resultado positivo. Na Reino Unido e National Health Service ta inclui e posibilidad di tratamiento segun medicina Chines tradicional. Na Cuba ta utiliza acupuntura como parti di nan sistema nacional di salud. Nos ta kere si AZV cubri cierto tratamentonan alternativo cu a demostra di funciona y tambe remedinan natural wordo miho controla por tin beneficio holistico pa nos pashentnan.

DERECHO DI MUHE PA SCOGHE

Nos ta kere cu termina un embarazo ta un di e decisionnan mas dificil cu un hende muhe mester contempla, pero nos ta kere e ta un decision cu e mester tuma den meditacion cu su creado y den consulta cu su famia. Nos no ta kere cu gobierno tin un rol den e decision, gobierno mester purba evita terminacion di embarazo door di educacion sexual y no prohibicion. Nos ta kere cu e individuo mester tin autonomia riba su mesun curpa y mester existi un sistema di control cu ta garantisa siguridad di e pashent pero tambe regulacion cu ta haci e procedura castigabel despues di p.e. 16 siman pa tanto profesional medico, como pashent.

Un estudio cientifico di un muestra aleatoria di 1.529 hende na Aruba cu nacionalidad Hulandes y derecho di voto na 2021 a demostra cu cuarenta (40) porciento di nos poblacion ta di opinion cu termina un embarazo ta hustificabel, cuarentitres (43) porciento ta contra y diesshete (17) porciento no tin opinion. Como un partido liberal progresivo nos ta kere den libertad di e individuo pa haci su mesun escogencia di kiko ta lo corecto pe. Si un dia yega na legalisa terminacion di embarazo, e lo mester wordo combina cu un estructura di cuida social pa brinda e pashent tur guia y sosten pa por tuma e decision corecto pa su persona. E estructura di guia y sosten mester continua despues di e proceso pa tanto e pashent y su famia si nan ta desea.

INTRODUCI UN 'PATIENT BILL OF RIGHTS'

Nos ta kere den haci e pashent central y kier introduci un 'Patient Bill of Rights' manera ta existi na Merca pa sigura cu tur cliente di AZV ricibi:

- Informacion tocante nan tratamiento;
- Acceso na servicionan di emergencia;
- Respet y ningun discriminacion;
- Confidencialidad;
- Espacio pa haci keho, y caminda apropia cuminsa un investigacion;
- Responsabilidadnan di pashent.

INTRODUCI UN 'PATIËNTENRAAD'

Nos kier introduci un Patiëntenraad pa sigura cu e pashent por ricibi tur informacion y tambe haci keho confidencialmente den casonan caminda cos no a cana manera debe ser. Un instancia separa di AZV lo por prepara un analisis di e nivel di cuidado, sugerencianan pa mehora y tambe investiga kehonan.

ACREDITA MEDICONAN

E meta di ACCION21 ta pa facilita tur hoben Arubano practica nan carera incluyendo personanan cu a studia medicina den region. Pa logra esaki nos kier reforma ARUBIG cu ta evalua e cualificacionnan di e individuo pa sigura un continuidad of mehoracion den cuidado. Pa introduci esaki mester:

- Lanta un Instituto di Calidad, pa por

registra hobennan cu ta estudiando of a studia den region cu kier ehersenan carera na Aruba;

- E Instituto di Calidad lo traha hunto cu otro paisnan den Reino y internacional pa bin cu normanan di best practices pa mehora e calidad di cuidado medico y acreditacion;
- Institui un comision pa investiga mas posibilidad pa facilita acreditacion;
- Cera acuerdonan cu universidadnan y facilidadnan local pa Arubananan gradua den region por logra cualkier calificacion necesario localmente;
- Nos lo kier regla cu banda di e registro BIG di Hulanda, Aruba ta reconoce mediconan cu a studia den otro sistemanan.

CUIDO PA NOS ADULTONAN MAYOR

Expansion di AZV pa inclui cuidado preventivo lo ta instrumental den mehora cuidado pa nos adulto mayornan. Den nos seccion di asunto social nos ta detaya con nos kier percursa un nivel minimo di cuidado incluyendo p.e. limite ariba cuanto persona pa m² den casnan di anciano. Den nos seccion di salubridad nos ta detaya con nos kier expande AZV pa cuidado preventivo incluyendo chequeo dental.

Mester reduci e presion ariba eerste hulp door di ofrece cuidado na cas y expande orario di atencion pa inclui despues di 3:00 pm y den weekend cual Wit Gele Kruis no ta cubri.

Pensionando mester wordo exclui di cualkier recorte den cubrimiento di remedi.

Gasto di cuidado di adulto mayor ta creciendo 5% anualmente, esey ta mas cu nos crecimiento economico, ta importante pa busca eficiencianan den e sistema incluyendo:

- cuidado pa un adulto mayor mester inicia na cas y esey mester wordo mehora;
- expansion di cuidado na cas, pa hospital no keda pega cu hende cu mester bay cas pero pa falta di cuidado ta keda interna;
- na Aruba 1/3 di poblacion ta haña dementia mientras na mundo ta 7%, mester evalua ki cambionan den nos estilo di bida por trece saneamento y reduci e incidencia local;
- EPI mester yuda mehora cuidado di hendenan cu malesanan cronico;
- Fortifica SABA su esfuersonan pa traha cu HOH Academy y haci e shift di MBO 4 pa HBO;
- urgent care pa 65+ mester sosode na cas;
- reconoce cu SABA ta ofrece un nivel di cuidado mas similar cu un hospital chikito y mester fondo stabiel;
- miho cuidado pa adulto mayor cu limitacion;
- limita capacidad na casnan di adulto mayor chikito na p.e. 35 persona;
- miho regularisacion di casnan di adulto mayor.

Crea condicion digno tambe pa e casnan di adulto mayor y percura cu Inspectie

Volksgezondheid ta haci inspeccion regularmente pa asina nos tin un miho bista encuanto e situacion di cuidado.

REDUCI PREMIE DI AZV PA PENSIONADONAN

Actualmente un grupo di pensionado mester paga un premie halto pa AZV. Nan ta cu contribui tanto e werknemersdeel como tambe e werkgeversdeel y esaki nos ta considera in husto. Nos lo reduci premie di AZV pa pensionadonan te cu unicamente e werknemersdeel, usando parti di e surplus di AZV pa financia e reduccion.

CUIDO CRONICO

Actualmente nos tin un capacidad di 200 cama pa cuidado cronico, e necesidad actual ta pa 550 cama dus mester inverti den aumenta capacidad urgentemente. Tambe mester introduci ley pa regula cuidado cronico siguiendo e ehempel di Hulanda pa sigura cu tur nos grandinan por biba den dignidad y ricibi e cuidado cu nan merece.

IMSAN

Nos ta aplaudi e desaroyonan tumando luga na ImSan cu ta e prome hospital na Aruba y un di poco nan den nos region cu acreditacion JCI. Nos ta kere cu ImSan lo por complementa operacion na HOH den cierto area y competi cu HOH den otro. Ta importante pa AZV brinda e posibilidad pa pashent scoge

nan hospital di preferencia caminda ta posibel. Nos kier mira e sistemanan digital di e dos hospitalnan wordo conecta pa comparti dato y sigura cu no tin duplicacion di esfuerzo. Tambe nos kier mira ImSan sigui desaroya y expande, specialmente den tratamiento cu actualmente pashent ta wordo manda afo. Nos ta kere cu ImSan por hunga un rol importante den desaroyo di turismo medico y ACCION21 kier desaroya un plan structural pa facilita esaki.

INNOVACION

- Nos kier cuminsa pa cera acuerdo cu universidadnan Hulandes pa estudio di medicina pa reserva un cierto cantidad di espacio pa Aruba mescos cu nan ta haci pa Curaçao;
- Nos kier introduci mas conscientisacion ariba e importancia di alimentacion, cuminsando cu programanan na scol di nutricion;
- Nos kier desaroya p.e. un diabetes center pa pashentnan y usando tecnologia monitorea nan cuidado propio;
- Nos kier expande digitalisacion den cuidado medico y sigura cu e diferente sistemanan ta conecta y comunica cu otro.

MAS FONDO PA SALUBRIDAD Y CUIDO CRONICO

ACCION21 lo kier repriorisa gasto

di gobierno pa aloca mas fondo pa salubridad publico incluyendo cuidado di nos adulto mayor. Actualmente Aruba ta gastando rond di 8,4% di GDP riba salubridad y nos lo kier mira e suma subite cu 10% durante e proximo periodo di gobernacion. Esaki lo genera rond di 28 miyon florin extra anualmente pa e proximo cuatro añanan pa salubridad publico y cuidado cronico.

ASUNTO SOCIAL

Nos vision ta pa brinda segundo oportunidad na cada ciudadano y un estructura di cuidado y guia pa atende cu e crisis social cu ta asotando nos pais. Kamer van Koophandel a declara cu bintishete (27) por ciento di hogarnan na Aruba ta biba cu gastonan mas halto cu nan entrada. Nos tin un economia di mas di shete (7) biyon florin anualmente pa un poblacion oficial di 107.000, no tin pakiko tin pobreza na pais Aruba y combati esaki lo ta prioridad number uno pa ACCION21. Nos ta un partido liberal kier men nos no ta kere cu ta gobierno su trabao di distribui recurso, ta gobierno su trabao di crea un sociedad caminda e ciudadano por ta exitoso den crea su mesun recurso. Como un partido progresivo nos nunca lo permiti niun ciudadano fracasa, introduci un sociaal vangnet ta keda importante y ACCION21 lo completa e proceso cu a inicia como parti di landspakket.

DECLARA ASUNTO SOCIAL UN EMERGENCIA NACIONAL

E ta importante pa cuminsa na declara asuntonan social como un emergencia nacional. Esaki kier men inicia un proceso di inventarisacion profundo cuminsando cu leyman hopi anticua cu mester keda adapta of ahusta. Esaki ta inclui un evaluacion di e Social Crisis Plan pa wak unda fondonan a bay y kico ta e resultado. E ta cuminsa cu un nulmeting basa ariba e condicion social cu nos ta reparti den diferente grupo:

- Pre-natal y infantil;
- Mucha;
- Hoben;
- Adolescente;
- Adultonan;
- Pensionadonan;
- Adulto Mayor;
- Personanan cu limitacion;
- Indocumenta.

E enfoke di e nulmeting ta pa por haci un estudio of combina estudionan ya haci den pasado pa por brinda un bista di e situacion actual. Esey lo ta instrumental pa forma un plan di accion integral tumando na cuenta cada un di e gruponan den nos comunidad. E ta importante pa por ta transparente y cuminsa e creacion di nos Social Progress Index. Mientras cu tin un inventarisacion tumando lugar ta un necesidad cuminsa cu un plan di accion inmediato. Ta importante cuminsa na crea un sistema cu ta brinda guia y sosten na cada ciudadano di pais Aruba. Nos kier transforma e nocion di trahado social pa un success coach pa curasha

mas hende den necesidad busca ayudo pa ta exitoso.

CENTRO DI BARIONAN

Nos ta cuminsa inmediatamente cu un plan pa haci uso di locual nos tin caba. Esaki ta pa fortifica e Centro di Barionan, actualmente nos tin nuebe: Oranjestad, Noord, Tanki Leendert, Ayo, Sta. Cruz, Brasil, San Nicolas, Savaneta y Dakota.

Cu reintroduccion di OSEBA por cuminsa na brinda un fondo mas sostenibel na cada centro di bario. Esaki lo prepara nan pa bira e prome instancia di contacto pa sector publico y su respectivo servicionan. Door di un inventarisacion profundo den e barionan lo crea y update un sociale kaart di Aruba cu ta un rapport di tur e retonan social cu tin den e barionan.

Lo studia e posibilidad di expande e infraestructura di e centro di barionan pa por inclui mas servicio y mihor sirbi nan comunidad. Tambe ta importante reconoce cu trahadonan social y opbouwwerkers lo por asisti den brinda un miho servicio di cuidu y sosten mas local na e centro di barionan. Nan lo por p.e. conecta e residentenan cu ayudo publico of asisti nan den busca empleo. Den combinacion cu un sociaal vangnet nos por sigura cu ningun hende keda atras. Usando e centro di barionan, lo construi un banco di data social. Teniendo na cuenta e data social lo desaroya un masterplan a base di principionan di social cohesion intergra cu otro areanan di atencion nacional.

INTRODUCI UN DATABASE SOCIAL

Nos kier introduci un database social unda cu tur informacion importante regardando retonan social ta keda registra den un base di dato central. E instancianan concerni mester por haya acceso pa por añadi y ricibi informacion pa asina ofrece nan clientenan un miho servicio. Asina nos ta percura pa stimula y mehora e cooperacion y lo kier mira acceso comparti cu Departamento di Labor pa ofrece un miho bista di e situacion di cliente. Esey lo facilita miho control si e persona lo mester keda introduci den e social vangnet pa despues wordo reintegra bek den mercado laboral caminda posibel. E database social tambe lo ser usa pa e centro di barionan pa asina duna un bista ariba e sociale kaart di Aruba.

MAMANAN HOBEN - TIENER MOEDERS

Creando un plan integral cu enseñansa ta importante pa por establece un estructura unda mamanan hoben por ricibi e guia y sosten necesario. Den combinacion cu un espacio pa por sigui scol y asina no pone nan enseñansa un banda. Ademas di esaki mester haci un inventarisacion di e tiener moederhuis. Asina nos por haya un miho idea di kico e retonan ta y mas importante kico ta e recursonan cu falta pa por percura cu e sosten necesario keda brinda. Introduci tambe e zorgstructuur pa percura cu e mamanan hoben aki por haya oportunidad den nos comunidad.

PERSONANAN CU LIMITACION

Introduci reglamento cu cada edificio nobo y tur cu ta operacional na Aruba ariba un cierto tamaño mester cumpli cu normanan di e Arbowet pa persona gehandicapt y/of invalido den rolstoel manera:

- Parkeer blauw;
- Rampa;
- Baño cu espacio y infraestructura unda un persona cu limitacion por yuda su mes.

Tambe den caso cu tin un luga cu mas cu un piso mester por tin sea un lift of un lift special pa rolstoel pa asina percura cu e persona cu limitacion tambe por haci su compras y diligencianan.

E ta importante pa nos cuminsa crea un sociedad mas inclusivo mirando cu e comunidad di persona den rolstoel ta sigui aumenta. Pesey nos tin cu cuminsa crea e infraestructura fisico cu ta brinda movilidad pa tur.

RECLASSERING

E ta importante pa desaroya un plan hunto cu Ministerio di Husticia pa haci un inventarisacion di e situacion actual. Nos meta ta pa reduci nivelnan di recidivismo door di crea mas oportunidad pa reintegracion despues di sirbi nan condena. Mirando cu hopi di esnan actualmente encarcela mester di ayudo psiquiatrico, nos kier inverti mas den brinda ayudo pa salud mental. Nos kier expande oportunidadnan di Enseñansa

incluyendo programanan manera EduCampus cu ta permiti estudio individual pa facilita nan reintegracion den sociedad. Empodera esnan encarcela cu herment pa crea un bida nobo ta e miho siguransa cu nan no lo bolbe na comportamiento anti-social of criminal. Sin un alternativo realistico, nos ta condena nan na bolbe ripiti e mesun comportamiento.

ABUSO GENERAL

E ta importante pa fortifica Departamento di Asuntonan Social pa por brinda atencion, ayudo y guia na ciudadanonan cu ta bira victima di abuso verbal y/of fisico inmediatamente. Mester digitalisa e procesonan hudicial pa acumula dato pa maneha e problematica den nos comunidad. E victima semper mester haña prioridad pero un berdadero saneamento ta inclui e agresor tambe. Si e no ricibi ayudo y sosten pa e tambe recupera, e comportamiento lo sigui. Reintegracion den sociedad di un manera sano mester ta e resultado di intervencion.

VIVIENDA SOCIAL

E ta importante pa por sinta cu FCCA y inventarisa e situacion di vivienda social y desaroya un plan structural pa acomoda demanda. Crea mas vivienda, specialmente den centronan di ciudad mester bira un prioridad pa brinda nos hendenan oportunidad di nan mesun cas. Nos lo kier studia con por combina expansion di vivienda social cu

revitalisacion di nos centronan di ciudad door di introduci incentivo pa propietario modifica y dividi nan propiedadnan pero lo expande mas den nos seccion di economia. Futuro desaroyo di nos pais mester tene cuenta sostenibilidad, naturalesa y medio ambiente. Ta importante pa persona cu ta bibando den mondi sin domicilio permanente tambe wordo integra den e social vangnet pa asina cuminsa e proceso di nan reintegracion den sociedad y mercado laboral.

ABUSO SEXUAL

Un tema increíblemente importante cu no a haña su debido atencion. Nos ta kere den bin cu un meldpunt central cu e infraestructura adecua:

- Verhoorkamer;
- Onderzoekskamer.

E facilidad mester inclui herment special pa mucha y traha 24/7 den forma di shift y incorpora:

- Un agente policial;
- Un psicologo;
- Dokter di confiansa (vertrouwensarts);
- Trahado social;
- Asistencia medico capacita pa administra p.e. un rape kit.

Por medio di esaki nos ta crea un ambiente mas sigur ora ta trata mucha y tambe ofrece inmediatamente e guia y sosten necesario. Ta importante pa tambe ofrece guia y sosten a traves di slachtofferhulp na miembro di famia.

Mester entrena mas personal medico den e administracion di rape kits pa por acumula evidencia y asina percura cu e abusadonan wordo cera. Pa combati abuso sexual sigur nos tin cu crea un plan di accion den combinacion cu Ministerio di Husticia y Gemeenschappelijk Hof pa sigura cu nos por garantiza husticia como proceso di saneamento di victima. Na mes momento e ta importante pa crea un plan di tratamiento pa e acusado cu na momento cu e keda encarcela na KIA e por haya ayudo psicologico. Nos kier haci castracion kimico un condicion, pa esnan cu a comete abuso sexual contra menor di edad, pa ser libera despues di a sinta condena pa reduci e probabilidad cu abusadonan bolbe ofende.

Haci un inventario di locual gobierno a introduci caba pa no duplica esfuerzo y evalua si esaki ta un comienso ariba cual por expande. Tambe nos kier introduci un halfway house y mentorship pa asisti hobennan transiciona di Orthopedagogisch Centrum pa bida riba nan mes.

FORTIFICA E VEILIGHEIDSHUIS

Un task force a ser crea y nos ta kere cu e structura aki lo ta uno cu por brinda seguridad despues cu un grupo di diferente departamento sinta cu otro pa hunto crea un plan preventivo pa combati retonan di husticia. Nos ta premira cu conhuntamente lo por reduci e retonan social cu un plan preventivo formula a base di dato comparti cu otro departamento.

BIJSTAND Y ONDERSTAND

Nos ta kere ta importante pa analisa con e sistema ta funciona y con nos lo por implementa un structura mas eficiente y husto. E mision di nos partido ta pa reduci e necesidad pa bijstand y onderstand a traves di un sociaal vangnet cu lo empodera persona pa reintegra den mercado laboral y sociedad di un manera constructivo.

INTRODUCI UN CAS DI DIVERSIDAD (LGBT CENTER)

Nos ta kere ta importante pa desaroya un Cas di Diversidad pa comunidad LGBT. E facilidad lo fungi como un espacio multi-funcional pa brinda recurso na grupo y persona di minoria sexual. E iniciativa lo brinda:

- Un espacio sigur pa persona LGBT por reuni;
- Un plataforma cu ta uni e esfuerzo di e diferente organisacionnan;
- Un shelter pa persona LGBT cu ta enfrentando rechazo na cas, scol y/of misa;
- Ofrece servicionan medico na comunidad LGBT cu personal capacita pa cu nan necesidad particular p.e. incluyendo PrEP; test pa malesa conduci sexualmente; atencion, guia y sosten di salud pa comunidad trans; recursonan pa cuido di salud mental; number di telefon di sosten 24/7;
- Celebracion anual di Pride;
- Apoyo y guia pa famia gay;
- Enseñasa sexual inclusivo pa hoben

LGBT den scolnan;

- Elimina discriminacion laboral y den vivienda;
- Miembro(nan) di cuerpo policial dedica na abuso, asalto y asunto relaciona cu comunidad LGBT;
- Programa di coscientisa docente y otro persona encarga cu cuidado di mucha y con pa brinda sosten na esnan LGBT y preveni bullying.

LABOR

ACCION21 lo continua cu proyectonan cu a inicia como parti di landspakket incluyendo:

- Realisa un schema pa desempleo;
- Mehora y modernisa procedura pa kita un trahado y derecho;
- Actualisa y modernisa bijstand; Fortifica aplicacion di leyman laboral;
- Fortifica job placement;
- Introduci un arbowet;
- Maximalisa compensacion pa kita aduhtonan mayor.

DESAROYA UN CENTRO DI OPORTUNIDAD

Siguiendo ehempel di 'Keith Bell Opportunity Central,' www.theoc.net, nos kier crea un centro di oportunidad den forma di un campus multifuncional cu ta sirbi den progreso profesional, acceso na Enseñansa, participacion comunitario y oportunidad pa tur. ACCION21 su compromiso pa no laga niun hende fracasa ta tuma forma den crea un centro di oportunidad pa

complementa y fortalece recursonan existente y brinda un plataforma pa tur ciudadano por alcanza nan potencial maximo.

INTRODUCI UN ARBOWET

Nos kier introduci un Arbowet cu lo tin tres meta principal:

- Salvaguardia e salud di cada empleado;
- Promove bienestar di e empleado;
- Brinda siguridad na e empleado.

Introduci un Arbowet ta finalisacion di e dialogo social-laboral tripartiet unda tur partido a acorda cu nan kier mira introduccion di e ley. Esaki lo brinda un estructura cu ta apoya tanto e trahado y e dunado di trabao y ta premira cu su implementacion lo tuma lugad en fase. Pa e trahado y dunado di trabao e lo provee un inventarisacion di riesgo, despues di cual por introduci medidanan pa mitiga e situacion den posibel consulta cu sindicato. Aumenta siguridad na trabao tin bentaha pa ambos trahado y dunado di trabao, e ta reduci malcontento y hisa productividad.

Introduccion di un Arbowet lo reemplasa e veiligheidsverordening 1 & 2 cu ta leyman anticua y percira cu Aruba ta cumpli cu normanan internacional di International Labor Organization (ILO). Introduci un Arbowet ta trece Aruba den cumplimiento cu acuerdonan C155 y C187 cu ta trata futuro di labor y flexibilisacion laboral y crea oportunidad pa ricibi fondonan di ILO pa su implementacion.

AMPLIACION DE LEY LABORAL CU SECCION PA HOBEN

E ta importante pa nos sigura cu hoben tambe keda protegi, nos kier amplia e arbeidsverordening su articulonan cu ta combati labor di mucha pa por cumpli cu e tratado di derechonan di mucha. Nos ta kere cu estudiante y hoben tambe merece e oportunidad pa por traha y ricibi e experiencia necesario. Actualmente hopi no por keda contrata pa falta di experiencia y kier aumenta e posibilidad pa estudiante por core stage.

SINDICALISMO AUTOMATICO PA TRAHADO DI NEGOSHI GRANDI

ACCION21 ta reconoce e importancia y balor di e trahado. Actualmente hopi trahado no conoce nan derechonan y tin negoshi cu no ta sigui nos leyman existente. Nos ta kere ta importante pa tur trahado di negoshi grandi manera hotelnan ser automaticamente registra como miembro di un sindicato. Trahadonan di negoshinan cu mas cu cien (100) trahado lo mester provee miembresia automatico na un sindicato pa nan trahadonan. Respet pa nos leyman di parti e dunado di trabao como e trahado lo sigura un ambiente di trabao armonioso.

FLEXIBILIDAD LABORAL

Introduccion di e Arbowet y un sociaal vangnet mester sosode prome cu

nos por flexibilisa nos leyman laboral. Actualmente tin un acuerdo bipartiet entre sindicato y gremionan comercial cu ACCION21 lo kier mira implementa. Mirando e escasez di trahado actual, nos ta kere cu mas flexibilizacion laboral ta importante pa brinda mas espacio pa studiantenan, mamanan soltero y otronan traha di e forma cu nan por acomoda. Mas flexibilidad lo empodera mas persona e oportunidad di participa den mercado laboral y reduci e cantidad di persona riba bijstand.

INTRODUCI LEY DI INCLUSION (GEHANDICAPTEN VERORDENING)

Nos kier amplia inclusion pa cada ciudadano por ricibi oportunidad igual pa desaroya nan habilidad y asina alcanza nan potencial maximo. Esaki mester conta tambe pa persona cu limitacion fisico pa nan tambe por ricibi un espacio digno den nos mercado laboral. Introduccion di un gehandicaptent verordening lo preveni discriminacion contra persona cu limitacion fisico of otro limitacion. Tambe ta importante pa garantiza acceso na tur instituto di enseñansa.

INVENTARISACION LABORAL

Nos ta kere ta importante pa haci un inventarisacion di mercado y suministro. Asina nos por percura pa ofrece un miho guia pa estudiante na momento di scoge

nan estudio y futuro carera. Tambe nos kier enfoka ariba persona cu ta sinti nan mes stagna y introduci e concepto di enseñansa continuo lifelong learning. Siglo 21 mester incorpora e posibilidad pa un persona sigui desaroya su mes continuamente y logra su potencial maximo. Introduccion di bijscholing y herscholing lo sigura cu cada ciudadano por mehora su preparacion profesional y existencia di un sociaal vagnet lo facilita nan recapacitacion. Tambe nos kier studia e posibilidad di ofrece reconocemento di proficiencia segun experiencia.

REDUCI MERCADO INFORMAL

Ta importante pa reduci e mercado informal pa salvaguardia derecho di tur trahado. E cantidad grandi di trahado den mercado informal ta afecta nos Arubanonan di menos recurso mas severamente. Trahadonan local no por competi cu un persona dispuesto pa traha pa menos cu salario minimo. Den nos seccion Ministerio di Husticia nos ta propone solucionnan pa trata mercado informal laboral y especificamente trahado indocumenta. Tambe nos kier mira mas entrenamiento di trahado local y un inventarizacion di con DPL ta otorga aprobacion pa asina crea mas incentivo pa entrena nos mesun hende nan.

OULDERSCHAPSVERLOF

Den nos seccion Parlamento di Aruba, un di e leyman pendiente pa aprobacion

di ACCION21 ta un expansion di ouderschapsverlof (liber pa embarazo y mayornan nobo) cu ta trece nos leyman pa mayornan nobo den concordancia cu Hulanda y BES. Ta importante pa Aruba keda na vanguardia di avancen den derecho di trahado y nos ta comprometi cu sigui modernisa nos leyman pa e trahado Arubano no keda atras. Nos concepto di ley ta inclui e siguiente cambianan:

- Extende liber pa mamanan nobo di 12 pa 16 siman;
- Reduci e tempo di notificacion cu un empleado embara mester duna su dunado di trabao pa liber prome cu nacemento pa 6 siman luga di dos luna actualmente;
- Si un baby wordo hospitalisa durante e periodo di liber, e dianan hospitalisa no ta conta den dianan liber;
- Si e mama fayece durante parto, su tempo liber ta pasa pa su casa/pareha of e persona cu tabata biba cu e mama of cu a reconoce e baby como di nan;
- Liber pa tata ta subi for di 2 dia te cu 5 dia pa parehanan registra y personanan cu ta bibando cu e mama, of persona cu a reconoce e baby como di nan;
- Tatanan/parehanan ta haya oportunidad pa tuma cinco (5) siman adicional liber durante e prome seis lunanan despues di nacemento cu setena (70) porciento di nan salario.

UNIVERSAL BASIC INCOME (UBI)

Automatisacion lo reemplaza mita di nos trabaonan pa 2050. E modelo socio-economico di ultimo siglonan cu bo mester un trabao pa sobrevivi y hiba un bida digno no lo ta posibel mas pa tur hende den e decadanan nos dilanti. Ta importante pa nos cuminsa prepara den ofrece nos ciudadanonan un universal basic income. Nos vision a largo plasota pa garantiza sobrevivencia di tur ciudadano door di un universal basic income. Esaki lo cambia e relacion entre e dunado di trabao y empleado. Si su sobrevivencia basico ta garantiza pa estado, e dunado di trabao lo mester motiva e trahado pa drenta mercado laboral. Preparacion pa un futuro cu no lo tin trabao pa tur hende mester cuminsa awor cu creacion di un fundeshi pa den futuro ofrece tur Arubano un entrada basico universal.

CULTURA Y DEPORTE - YABINAN PA UN ARUBA SANO Y SOSTENIBEL

Cultura y Deporte ta dos instrumento cardinal cu por ser uza pa e desaroyo di un ser humano desde infancia te adulto mayor. Nan ta aporta na e formacion personal di cada ciudadano y ta crea e identidad di un pais.

Cada ciudadano mestertin e oportunidad maximo pa por studia y eherce esakinan y tin e posibilidad pa por engrandecenan mes riba e terenonan aki.

Cultura y Deporte especialmente ta dos

area hopi importante pa e formacion di hubentud di bo pais y alabes por aporta na un miho calidad di bida pa sernan di 60+ aña.

Cultura y Deporte no ta sectornan cu ta para ribanan mes. Pa un bon maneho, uzo y desaroyo di esakinan ta imperativo pa tin un maneho integral, inter-ministerial y inter-departamental, ya cu nan ta alabes directamente liga na Salubridad Publico, Enseñansa, Infraestructura y e desaroyo Socio-Economico di un pais. Den e programa di partido di ACCION21 nan tin un rol den cada un di e sectornan ariba menciona.

Den e vision y mision di Deporte y Cultura mester tene cuenta cu Aruba ta un Small Island Developing State (SIDS) y semper mester ta positivamente liga na metanan di desaroyo sostenibel.

CULTURA

Cultura ta un area hopi subestima den politica. Un dje motibonan ta cu cultura no ta ser bon comprendi. Aunke tin hopi diferente forma con a trata di describi kico cultura ta, p.e.:

“Cultura ta e caracteristicanan y conocimiento particular di un grupo di persona, incluyendo idioma, religion, cushina (gastronomia), custumbenan social, musica y artenan.”

E definicion di UNESCO (2001) ta:

“Cultura ta un set di diferente característica spiritual, material, intelectual y emocional di un grupo social cu ta inclui no solamente arte y literatura, pero formanan di biba, formanan di biba hunto, sistemanan di (norma y) balor, tradicion y creencia”.

E palabra cultura ta bin di e palabra Latino “colere”, locual ta ser defini como “cultiva” y “tendencia”: “e tendencia pa cuida e tera (planeta/mundo) y crece, of cultiva y aprecia”.

BENEFICIONAN SOCIO-ECONOMICO

Cultura ta provee beneficinan social y economico importante. Cu miho prestacion di studia y di salud, un aumento di tolerancia y oportunidad pa uni cu otronan, Cultura ta engrandece nos calidad di bida y ta incrementa e bienestar general di ambos e ser individual y comunidad.

Alabes Cultura ta influencia nos creencia relaciona cu kico ta corecto y incorreto, nos actitud incluyendo kico nos ta gusta y kico no, nos balornan REGARDANDO kico ta bon y malo, y nos comportacion. Di e influencia cultural aki, nos identidad ta ser forma.

Si pa logra sostenibilidad ta primordialmente haci uzo di recursonan di nos planeta, cultura mester ta central den nos strategianan di desaroyo, ya cu culturanan ta marca relacionan

humano cu otronan den sociedad y e mundo na nan alrededor, incluyendo e ambiente natural y ta condiciona nan comportacion. Ademas, como sectornan di actividad, patrimonio y industrianan creativo ta contribui significativamente: desde “trabounan berde” y patronchinan di consumo y produccion mas sostenibel, hasta comunidadnan resiliente cu ta capaz pa confronta desastrenan miho y tin acceso na awa y e alimentonan, reduciendo e desekilibrio y pobreza den e regionnan y fortaleciendo e sostenibilidad.

MANEHO INTEGRAL Y SOSTENIBEL

- Cultural Governance Code¹
- Inter-ministerial
- Inter-departamental
- Multi-disciplinario

Ta importante pa implementa e Cultural Governance Code (i.e. Corporate Governance Code) na e institucionnan subsidia pa gobierno, cual ta trata e maneho y control interno riba esaki y responsabiliza plan y actividad (checks and balances).

Mescos cu Deporte, cultura tin di haber cu diferente sector y area di Aruba, cual ta rekeri un maneho integral (conhunto).

Riba nivel gubernamental, cultura, mescos cu deporte, mester forma parti di un maneho inter-ministerial riba un nivel multi-disciplinario pa por yega

¹ Cultural Governance, Kwaliteit van Bestuur en Toezicht in de Culturele Sector, Stichting Kunst en Zaken (2000)

na un calidad progresivo maximo di e ramo aki, ya cu tin diferente ministerio, departamento y disciplina involvi.

PRESERVACION DI NOS PATRIMONIO CULTURAL Y NATURAL

- Legislacion
- Conservacion
- Documentacion y Estudio
- Educacion/Conscientisacion di nos Herencia Cultural
- Promocion

Cultura ta e fundeshi di un sociedad. E fundeshi mester ta solido y na Aruba nos herencia cultural ta carece masha hopi di legislacion adecua. Hopi ley ta anticua of simplemente no tin ley. Pa e fundeshi por ta solido, mester update leynan anticua y percura pa tin legislacion unda cu falta. Aruba ta miembro di tratadonan internacional, pero hopi biaha no tin ley di implementacion na nos isla. Den extremo por yega na un “Ley General di Cultura” den cual tur e diferente areanan cultural ta protehi (e.g. Ley General De Cultura di Colombia unda cultura a ser reconoci como e wortel/rais, e base of razon di e nacion Colombiano). DWJZ² ta crucial den esaki.

Conservacion di nos patrimonio cultural y natural ta sumamente importante y mester ser trata adecuadamente. Nos tin e parti di nos herencia cultural tangibel (material), cu ta encera nos herencia cultural movibel (pintura, escultura, moneda, manuscrito), nos herencia inmovibel (monumento, sitionan arkeologico etc.), nos herencia subacuatico (naufragio/wrak, ruinan bou awa etc.) y nos tin e parti di nos herencia cultural intangibel (inmaterial) cu ta regarda nos tradicionnan oral, performing arts, ritualnan etc. Nos patrimonio natural ta encera sitionan natural cu aspectonan cultural (paisahe cultural), formacionnan fisico, biologico of geologico.

Ta importante pa nos herencia cultural ser documenta y studia. Ambos GO's³ y NGO's⁴ cu ta traha riba tereno cultural of tin di haber cu esaki, mester ser stimula y sosteni. DCA⁵ na Aruba ta crucial den esaki, banda di MANA⁶, ANA⁷, BNA⁸, UA⁹ y otronan.

Ta importante pa educa y conscientisa nos pueblo di e importancia di nos herencia cultural. Esaki ambos por medio di educacion formal y informal.

2 Directie Wetgeving en Juridische Zaken

3 Government Organization

4 Non-Government Organization

5 Directie Cultuur Aruba

6 Museo Arqueologico Nacional Aruba

7 Archivo Nacional Aruba

8 Biblioteca Nacional Aruba

9 Universidad di Aruba

Nos herencia cultural mester ser promoviden tur sentido di palabra pa fortificanos identidad unico como Arubiano.

PAPIAMENTO

- Rol Central di Papiamento
- “Camber di Papiamento”

Boidiomata fundamental pa boidentidad cultural. Ora un idioma desaparece, e cultura ta muri. Idioma ta un dje partinan mas importante di cultura. E ta e forma con bo ta comunica cu otro, construi relacionnan y ta crea un sentimento di comunidad. Papia, skirbi y lesa ta partinan integral di bida diario, unda idioma ta e instrumento primordial pa expresa y comunica. Aunke Papiamento ta existi pa mas di 300 aña y na Aruba desde 1976 e tin su ortografia, desde 2009 su vocabulario oficial y desde 2010 e tin su manual di gramatica (morfologia). Papiamento mester tin un rol central na Aruba y mester conscientisa e Arubano y stranhero pa su uzo corecto.

Idiomanan ta dinamico y ta cambia durante tempo. Na diferente pais tin linguista cu ta dedica nan mes na cambianan den uzo di idioma y cada pasa tanto aña (dos aña na Hulanda) ta publica tur cambio oficial den su uzo. Ta imperativo pa na Aruba bin un “Camber di Papiamento” cu ta enfoca pa studia

nos idioma y percura pa e influencia- y cambianan ser oficialisa y haci publico pa nos idioma ser uza corectamente.

CULTURA Y ENSEÑANSA

- Educacion Cultural den Curiculo Escolar
- Educacion Cultural den Tra’i Merdia/ Actividadnan Extra Curricular
- Cultura den Centronan di Bario
- Estudio den Ramo Cultural
- Rietveld Academie

Por medio di educacion cultura ta ser comunica na un mucha/hoben, door di cual e ta custumbra cu tradicion, custumber, balor y patronchi di comportacion cu ta reina den su grupo. E conocimiento aki ta permiti’e pa adapta na su alrededor social pa asina e por logra su socialisacion. Educacion ta hunga un rol crucial den transmision di cultura; esaki ta ser logra ora preservacion ta ser haci di un generacion pa un siguiente. Cultura por ser desaroya via Enseñansa. Educacion ta trece e cambio desea den ambos e balornan cultural pa progreso y desaroyo di un sociedad.

E teoria di Multiple Intelligences¹⁰ (Howard Gardner [Harvard Professor], 1988) ta diferencia e inteligencia humano den “modalidadnan di inteligencia” specifico, na luga di defini inteligencia como un solo habilidad en general. Un

¹⁰ Inteligencianan Musical-ritmico y harmonica, Visual-espacial, Linguistico-verbal, Logico-matematico, Corporal-kinestesico, Interpersonal, Naturalista, Existencial, inteligencia adicional (inteligencia docente-pedagogico y inteligencia digital).

dje areanan defini ta Musica (expresion cultural), cu ta e area di inteligencia cu sensibilidad pa zonido, ritmo y tono di musica. E personanan cu inteligencia musical normalmente tin un bon tono of por posee un tono absoluto y tin e capacidad pa canta, toca instrumento musical y compone musica. Nan tin e.o. sensibilidad pa ritmo, tono y melodia. Musica como un dje actividadnan cultural ta sumamente importante pa ta den Enseñansa.

E funcion di Centronan di Bario mester ser restaura unda ciudadanonan di tur edad y sexo por participa na actividadnan cultural.

E sector cultural falta hopi specialista den e ramo aki, pa cual motibo ta importante pa stimula studiantenan pa escohe un carera den e ramo aki (profesionalisacion). Importante ta pa tin un bista riba e vacaturanan/profesionnan cultural necesario actualmente, como tambe ki nivel di estudio secundario mester pa esakinan.

Rietveld Academie tabatin un impacto positivo pa Aruba y studiantenan interesa den un estudio cultural unda na Aruba mes nan por a haci (parti) dje estudio aki. Esaki tambe dentro di e contexto di desaroya e Knowledge Economy como catalisado pa desaroyo socio-economico den e “Sistema di Innovacion” na Aruba.

FONDONAN

- Gobierno/GO's (incluyendo DCA)
- Fundacionnan (e.o. UNOCA, Prins Bernhard Fonds)
- Crea un Fondo Cultural
- Engrandece Participacion di Sector Priva

Parti di e fondonan pa cultura ta bin di gobierno. DCA (GO) tambe tin cierto fondo cu por ser uza cu un peticion adecua y segun cierto criterio. Semper cultura su porcentahe riba nos presupuesto nacional tabata hopi abou. Algun aña pasa e tabata 0.6% y lo ta bon pa sondea e posibilidad pa hisa esaki cu p.e. 1%.

Tin diferente fundacion cu ta subsidia proyectonan cultural, pero no ta facil pa logra esaki, como cu pa skirbi un peticion ta rekeri cierto conocimiento cu por forma un obstaculo, mientras cu tin basta actor den e mundo cultural cu ta trata di haya subsidio of sosten financiero dje mesun fondonan limita.

Den pasado a pensa pa crea un “Fondo Cultural.” Mas di 10 aña pasa a pensa riba e posibilidad pa LOTTO aporta cu un cierto suma (“LOTTO pa Cultura”), mientras cu recientemente un idea tabata pa designa \$1 di e tax di entrada (turistanan crucero) pa cultura. Lo ta bon pa sondea si tin posibilidad pa por crea mas fondo pa cultura.

Den e sector cultural semper pa yega

na fondo ta forma un reto. Involucrando e sector priva mas activo den e mundo cultural y proyectonan cultural (creativo), por crea un synergy entre e dos sectornan aki unda cu por cristalisa sosten financiero pa proyectonan cultural.

CULTURA Y DESARROYO ECONOMICO

- Cultural and Creative Industry (+ Knowledge Economy + Innovacion)¹¹
- Nation building
- Nation branding
- Producto Turistico
- Crea Experiencia Cultural
- Turista Cultural
- “Capital Cultural di Aruba – San Nicolas”
- Pilot Project CCI

Diversificando e economia Arubano desaroyando un Cultural & Creative Industry (CCI) (Industria Cultural y Creativo), ta toca temanan manera crea cupo di trabou, preservacion sostenibel di nos herencia y cohesion social. Pa prome biaha CCI por crea cohesion den desaroyo socio-economico di nos isla basa riba e aceptacion genuino di un identidad cultural inclusivo. E lo por inicia miho comprendemento pa e necesidad pa rehobenecemento cultural tumando e contexto multicultural Arubano na cuenta. Lo ta e prome “industria” cu lo

genera entrada, mientras ta atende cambionan social den e economia Arubano. Den e situacion financiero y social actual di Aruba, cu e desaroyo di e CCI, nos isla por ta sigur cu esaki lo aporta positivamente na un desaroyo sostenibel pa nos sociedad, incluyendo tur ciudadano. Cultura y Creatividad mester ta e curason di nos desaroyo sostenibel.

Nation Building ta e proceso activo elaborando un identidad nacional cu simultaneamente ta reconoce ambos e diversidad cultural y “sincretismo”. Ta importante pa reconoce tur nacion na Aruba (Aruba globalisa: mas di 100 nacionalidad) unda cultura ta hunga un rol cardinal. Na nos isla nos herencia indigena ta central den e proceso aki, aunke na prome bista esaki no ta visibel.

Nation Branding ta enfoca riba midi, construi y maneha e reputacion di un pais. E ta e aplicacion di concepto- y tecnicanan di mercadeo corporativo pa otro pais, cu e meta pa mehora su reputacion den relacionnan internacional. Hopi biaha e meta ta pa crea relacionnan entre actornan cu no ta limita na nacion. E ta extende pa e sectornan publico y priva y ta yuda cu nacionalismo. Alabes nan kier participa na proyectonan multi-lateral. Un forma

¹¹ E necesidad pa reconoce e rol di innovacion, conocimiento y creatividad pa expande potencial economico pa desaroyo socio-economico sostenibel ta inevitabel. Aruba tin un Creative Industry poco desaroya y ainda esaki no ta stabil, locual ta haci'e dificil pa wak e synergy entre e Creatividad, Conocemento y Innovacion (Creativity, Knowledge and Innovation). Pa e motibo aki ta importante pa stimula e synergy aki acelerando innovacion na Aruba den tur nivel durante e siguiente añanan. Esaki ta inclui atencion na areanan manera Educacion, Strategianan di Innovacion Nacional, desaroyo di Derecho di Propiedad Intelectual y Inversion Stranheria Directo, creando un ambiente economico apto pa e economianan aki, reforsando e espirito empresarial (entrepreneurship), e talento y desaroyo di habilidadnan y innovacion social.

ta incrementa e importancia di e balor simbolico di productonan cu ta enfatisa e caracteristicanan unico di un pais y ta mesun importante cu locual nan ta produci y bende realmente (country of origin effect). E imagen y reputacion di un pais por dramaticamente influencia su vitalidad economico. Nan ta trata di atrae turismo y capital di inversion, incrementa exportacion, atrae un forsa laboral talentoso y creativo, y mehora su influencia cultural y politico den mundo. Na Aruba nos iconografia di biyete bancario (moneda), nos herencia indigena, idioma y Parke Nacional ta caracteristicanan unico di nos pais cu por y ta ser uza pa e meta di Nation Branding.

Nos potencial cultural ta sumamente grandi, no solamente pa su indole unico, pero tambe pa e creatividad Arubano y alabes diversidad cultural di nos isla. E producto turistico aki no ta completo sin cu e bishitante (incluyendo e propio Arubano) por experiencia cu tur su 5 sentinan na un forma personal con unico e cultura di nos pais ta.

Aruba por bira un centro cultural den Caribe uzando e.o. Nation Branding y percurando pa trece eventonan cultural di importancia na nos isla. Ta comproba cu leisure tourists di Norte America cu ta participa na actividadnan cultural Arubano of di nos herencia, di averahe ta gasta 63% mas cu otro leisure tourists.

A cuminsa un desaroyo pa haci di San Nicolas e “Capital Cultural di Aruba”. E idea aki no tabata malo y lo ta importante pa finalisa y/of sigui cu e desaroyo aki, teniendo na cuenta cu e CCI lo aporta na e desaroyo socio-economico di San Nicolas.

Lo bin cu un Pilot Project CCI pa por yuda un 600 artista cu tin problema pa por traha of haya trabou den un forma similar na FASE. Akinan por ricibi un suma mensualmente, bou di e condicion cu pa luna ta crea un obra di arte cu lo ser evalua pa un Quality Control Committee. Lo huur e obranan na empresanan cu lo expone esakinan.

DUNA BALOR NA NOS PASADO Y NOS DIVERSIDAD CULTURAL

Ta duna prioridad na:

- Logra pone Aruba riba e Lista di Patrimonio Mundial (World Heritage List -y fiha sitio(nan) di Consenshi segun criterianan di UNESCO;
- Promove mas conocimiento di y duna sosten na cultura y deporte di Aruba;
- Reconoce diversidad di culturanan na Aruba y promove inclusion di cada habitante.

E enfoke riba e 3 puntonan indica aki riba ta promove construccion di un nacion (nation building) y desaroya Aruba como marca (nation branding).

Pa traha pa un futuro sostenibel y duradero di Aruba, conocimiento di e

efecto material y mental di ‘Colonialismo’ ta instrumental. Den dominio colonial e efectonan di sclavitud indigena y sclavitud Transatlantico ainda ta presente den nos comunidad, Caribe y otro parti di mundo.

Un parti importante pa Nation Branding, pa nos producto Arubano y pa nos propio identidad, ta pa cierto aspecto di nos herencia material y inmaterial por ser reconoci pa UNESCO. Cierta aspecto di nan tin un balor universal y una bes acepta, e lo ser poni riba e asina yama World Heritage List cu ta un boost enorme pa e cohesion socio-economico y identidad di nos pais. Den pasado a trata di yega na esaki, pero no a entrega e peticionnan na e forma mas fuerte, pero sigur p.e. cierto area cu sitionan di Dibuhonan/Pinturanan Riba Baranca (un parti importante di nos prehistoria y patrimonio cultural arkeologico), tin tur característica pa por ser poni riba e World Heritage List.

Ta sumamente importante pa pone atencion na e aspecto di ‘Colonialismo’. E ultimo dos pa tres aña, den Reino tin un ‘hype’ relaciona cu e tema di sclavitud. Esaki tin hopi di haber cu e sclavitud transatlantico (Afro-Caribense), mientras cu no por lubida cu tambe tabata existi sclavitud indigena.

Relaciona cu esakinan, ta importante pa educa tocante colonialismo, en especial cierto tema y nificacion di terminologia, p.e. colonialismo, post-colonialismo, neo-colonialismo, decolonizacion, rectificacion, apropiacion y Eurocentrismo.

Durante e historia humano di Aruba cu ta encera 3.500 aña, hende di diferente pais a impacta nos isla, pero mayoria a ser lubida. Atencion mas tanto ta bay pa nos historia recién (despues di 1900). Un ehempel ta Andres Tromp, e prome fiscal di Misa Santa Ana (1777/1778), cu tabata alabes e Capitan dje Indjannan Arubano y a encabesa e prome revolucion indigena contra e opresornan Europeo na 1795. Un estatua/monumento pa reconoce e personahe aki ta hopi importante pa demarca e suceso historico aki, pa conscientisa Aruba di nos pasado y pa fortifica nos identidad (otro ta p.e. Virginia Dementricia cu ta e esclavo mas rebelde den nos historia).

Pa logra esaki, ta importante pa usa e concepto di creacion di Sitionan di Consenshi (Sites of Conscience¹²) segun e International Coalition of Sites of Conscience (ICSC)¹³. Esaki entre otro lo engrandece e esfuersonan di nation-building y nation-branding di Aruba, den un intento pa altera e ‘Narativanan

12 Esakina ta p.e. museo, sitio historico, memorial, of iniciativa di memoria cu ta confronta ambos e historia cu a pasa y su legadonan contemporaneo. E sitionan aki ta interpreta historia mediante un sitio, ta involucra publico den programanan cu ta stimula dialogo riba temanan social cu ta pressing, comparti oportunidad pa publico participa y e accion positivo relaciona cu e temanan plantea na e sitio, y alabes promove husticia y culturanan universal di derechonan humano. Sitionan di Consenshi ta enfrenta tur aspecto di nos historia, esta historianan di gran crueldad, gran corahe y bida diario, y ta activa e perspectiva historico cu un dialogo publico dinamico relaciona cu temanan similar cu nos ta enfrenta awendia y kico por ser haci al respecto.

13 <https://www.sitesofconscience.org/>

Grandi” di colonialismo Europeo. Meta tambe ta pa mira con y pakico Sitionan di Consenshi di Aruba lo por bira miembro di e ICSC.

Un otro parti importante pa Nation Building ta pa crea sincretismo entre e diverso culturanan unda nan ta incluso den nos identidad actual, reconociendo nan aporte na nos cultura y dunando nan e homenahe cu nan merece.

DEPORTE

Deporte hopi biaha tin un posicion clave riba agenda personal di hopi persona, pero tambe riba esun social. Riba nivel personal e ta liga cu emocion y ta un guia importante den bida. Deporte tambe tin un balor social. E ta percura pa integracion y socialisacion y por refleha proporcion/relacion social. Alabes e ta duna hobennan e posibilidad pa haya nan caminda den un sociedad. E ta crea un network, confiansa den su mes y den otronan, locual ta conduci na un capital social, ambos riba nivel individual como tambe riba nivel social. Tur miembro di nos sociedad, di mucha te na esnan riba 60 aña, mester por tin e oportunidad pa por practica deporte.

AREANAN DI ATENCION: PIRAMIDE DEPORTIVO

- Deportenan Masivo
- Deportenan Recreativo
- Deportenan Escolar (wak punto H)
- Topsport/Elite (wak punto I)

Ta importante pa stimula/motiva, promociona, engrandece y enrikece tur e diferente areanan deportivo di e Piramide Deportivo.

Alabes mester crea conscientisacion di e importancia cu deporte tin relaciona cu nos salud, ambos fisico y mental.

IBISA¹⁴ mester tin un rol central den esaki.

Federacionnan, ambos miembro y no-miembro di sea Aruba Sport Unie (ASU¹⁵) of Comite Olimpico Aruba (COA¹⁶), mester por haya e sosten maximo pa por desaroya e practica di nan deportenan.

GRUPONAN DI ENFOKE

- Tur Edad
- Tur Sexo
- Tur Deporte na Aruba

Esaki ta inclui nos deportistanan cu limitacionnan fisico y/of mental.

Un grupo cu mester di atencion special

14 Instituto Biba Saludabel y Activo

15 Aruba Sport Unie

16 Comite Olimpico Aruba

ta esun di 60+, cu pa e estado fisico y mental ta hopi importante pa por tin acceso na practica deporte y cu esaki ta ser brinda na nan.

Esaki nifica tur deporte existente na Aruba, sea cu e deporte ta reconoci of no pa Comite Olimpico Internacional, ta miembro di ASU y COA (sportvereniging), pero tambe esnan cu no ta afilia na esakinan (p.e. fundacionnan cu no a ser acepta ainda of ta recreativo y hasta competitivo, pero cu no por of no ta interesa pa ta miembro di ASU of COA);

E deportenan por ser dividi den esnan cu ta ser practica den forma “individual” y esnan cu ta ser practica den “conhunto”. E practica di ambos tipo di deporte tin beneficio specifico den e desaroyo y bida di un individuo; Alabes e deportenan por ser dividi den esnan Fisico y esnan Mental.

PROFESIONALISACION SECTOR DEPORTIVO

- Capacitacion/upgrading Dirigentenan Deportivo
- Estudio pa Deporte como Profesion

Ta importante pa capacita mas dirigente deportivo (p.e entrenador, arbitro, scorer, ehecutivo) posibel relaciona cu e diferente deportenan dje Piramide Deportivo. Hopi biaha ta trata di boluntarionan cu ta traha duro, pero falta conocimiento deportivo, teoretico y didactico/pedagogico.

Mester stimula pa involucra y recluta boluntario, ya cu hopi biaha tin escasez di dirigente.

Formacion di “agentenan” deportivo pa guia deportista di “alto rendimiento” ta un area cu poco interes a haya den pasado, pero e ultimo añanan mas y mas hoben ta hayando oportunidad pa studia cu beca of tin potencial y mester di haya guia adecua.

Banda di por haya un carrera profesional como deportista, esaki tambe por como docente deportivo (gymleraar).

FACILIDADNAN DEPORTIVO

- Facilidadnan Deportivo y Unda por Entrena (includi edificio, tereno, club y aire liber)
- Complehonan di Federacionnan (incluyendo particular/priva)
- Complehonan Deportivo Maneha pa FFD¹⁷
- Centronan di Bario
- YMCA

E calidad di facilidadnan deportivo mester atencion continuo. Facilidadnan deportivo mester di mantencion, ekipo di entreno y upgrading. Esakinan mayoria biaha ta depende di subsidio (via ASU, COA, Ministerio di Deporte, fondonan internacional y fundraising), mientras un parti ta cay bou maneho di FFD.

E funcion di Centronan di Bario mester ser restaura unda ciudadanonan di tur edad y sexo por practica deporte.

Tin dos YMCA (fundacion) cu ta brinda diferente actividad deportivo y ta importante pa sostene y promove nan unda cu por.

No tin un Centro di Deportenan Mental na Aruba, aunke clubnan ta existi, pero mester carga gastonan di huur y no semper tin lug a adecua pa esakinan. Centronan di Bario den pasado tabata ser uza pa e deportenan aki, pero no ta un lug a largo plazo cu ta duna siguridad pa por sigui practica.

Crea canchanan deportivo den nos barionan di p.e. mini-futbol, mini-baseball, beach tennis. Tin algun cu via fondonan di organisacionnan internacional a ser subsidia.

FONDO/SUBSIDIO

- LOTTO (via ASU y COA)
- Crea un Fondo pa Deporte
- Stimula Sector Priva pa ta Involucra cu Deporte

Tin hopi aña caba cu e Fundacion LOTTO pa Deporte tin problema interno y hopi metemento di politica cu no ta beneficia e mundo deportivo. Lo ta importante pa trata di renegocia na un forma diplomatico pa LOTTO ser sana y fungi segun e Code Corporate Governance.

Den pasado diferente partido politico a vocifera cu kier crea un Fondo pa Deporte, cual te awe no a sosode. Ta importante pa sondea e posibilidad aki cu por aporta grandemente na mehora nos pais uzando deporte como instrumento (den pasado tabatin e idea pa fiha un porcentahe di e casino drop tax pa un “Fondo pa Deporte”).

Placa semper ta un reto den deporte y ta importante pa involucra e sector priva activamente den eventonan/ actividadnan deportivo, ambos riba nivel nacional y internacional. Esaki ta beneficioso pa e deportista, como tambe pa e sector priva.

DEPORTE Y DESARROYO ECONOMICO

- Nation Building
- Nation Branding
- Centro/Hub Deportivo den Caribe

E sentimento di nacionalismo ta directamente liga na Nation Building. Banda di religion, deporte ta e unico “hilo” cu ta uni hende y ta yuda desaroya e sentimento di patriotismo y unidad. E ta construi y defini e caracter di un nacion y ta yuda cualidadnan manera disciplina, determinacion, teamwork y un pasion pa fitness den e psyche (“totalidad di e mente humano”) di un nacion. E ta yuda guia e hubentud den e direccion adecua, ta yuda den construi infraestructura y ta crea un comunidad global.

Nation Branding ta un proceso unda e imagen di un pais por ser crea, monitoria, evalua y proactivamente maneha pa mehora of engrandece e reputacion di un pais na un publico (di enfoke) internacional. Esaki por ta un reto pa paisnan den desaroyo (p.e. SIDS). Deporte ta ser mira como un instrumento pa Nation Branding. Esaki especialmente pa deportenan den cual e pais ta resalta y ta saca bon resultado. E por bira e imagen di un pais, sea un deporte specifico, of (un) individuo(nan) cu ta resalta internacionalmente den un ramo di deporte.

Aruba tin e infraestructura presente pa por organisa eventonan deportivo grandi (proyectonan innovativo y hasta Mega-Events) cu por aporta na nos desaroyo economico (e.o. turismo) y na e concepto di Nation Branding. Aruba tin un bentaha grandi riba otro paisnan den Caribe relaciona cu su accesibilidad aereo facil, un clima favorabel henter aña, criminalidad abou, y estabilidad politico.

DEPORTE Y SALUBRIDAD PUBLICO

- Curpa (fisico) sano
- Mente sano
- Nutricion

Deportenan fisico tin un influencia directo riba salud fisico di e ser humano. (p.e. nan ta combati enfermedadnan cronico).

Deportenan mental tin un influencia grandi riba bo desaroyo cognitivo cu

ta preveni y alivia cierto malesa (p.e. demencia, ADD/ADHD, depresion y adiccion).

Deportistanan en general tin bon bista riba nan nutricion, aunke tin un diferencia entre deportenan fisico y mental, mientras hopi biaha e disciplina dietario ta liga na si bo ta practica un deporte riba nivel recreacional of competitivo.

DEPORTE Y ENSEÑANSA

- Curiculo
- Tra'i merdia/Actividadnan Extra Curricular
- Olimpiada Escolar
- Estudio pa Deporte como Profesion

Deporte mester tin un luga importante den programa y curiculo di scolnan basico y secundario pa motibonan trata den e puntonan anterior. Parce cu no ta semper gymleraartaduna gymnastiekles y alabes un cantidad substantial di scol na Aruba no tin un edificio/area adecua pa haci gym (deporte). Ta importante pa esakinan ta presente y pa hendenan capacita guia e hobennan riba tereno deportivo y pa e ramo aki haya e luga cu e merece den nos sistema di enseñansa.

Dentrai'i merdia deporte ta ser duna, pero no ta prominente den su programanan y alabes no semper ta ser duna pa especialista di deporte – actividadnan extra curricular tin deporte inclui.

Olimpiada Escolar ta importante pa keda den programa anual di enseñansa. Lo ta

interesante si por rebiba e torneonan inter-insular entre e campeonan di e islanan di Reino Hulandes Caribense.

CENTRO DI ALTO RENDIMIENTO – TOPSPORT

- Compleho Multi-Funcional
- Acuerdo cu Scol
- Acuerdo cu Trabou
- Acuerdo cu Mundo Medico (Salubridad Publico)

Aruba tin un gran potencial den hopi deporte unda talentonan grandi a demonstra esaki riba nivel internacional, sigur durante e ultimo 10 aña. Lamentablemente den nos sistema escolar deporte no tin e luga prominente cu e tin na otro pais. Tampoco ta existi un structura permanente cu ta duna e talentonan aki e posibilidad di ser guia den un forma profesional pa yega nan top. Mayoría pais tin asina yama “Centronan di Alto Rendimiento” unda segun e criterio dje pais, cierto deporte y deportista ta ser selecciona y ta cay den un programa di Alto Rendimiento. Hopi biaha e Centro di Alto Rendimiento ta ubica den un compleho multi-funcional y aunke na Aruba no tin uno moderno suficiente grandi, si tin un infraestructura existente cu por ser uza pa un programa pa atletanan di alto rendimiento.

Pa talentonan/deporstistanan di Alto Rendimiento por eherce nan deporte na un forma profesional, mester tin

e espacio y tempo pa por haci esaki debidamente. Por medio di acuerdonan cu scol y trabou, por brinda e espacio aki unda na un forma adapta, por eherce deporte y alabes sigui scol y/of trabou.

Acuerdonan cu e mundo medico (Salubridad Publico) ta importante pa asina e deportista por tin guia y tratamiento adecua relaciona cu e deporte cu e ta eherce.

Diferente partido politico den pasado a papia di e tema aki, incluyendo pa aloca fondonan pa por duna beca na deportistanan cu hopi potencial, pero esaki nunca a cristalisa. Regularmente deportistanan Arubano di diferente ramo di deporte ta haya beca pa bay studia, pero esaki ta ser duna pa e College of Universidad na cual e persona aki ta bay studia.

Tin hopi evento nacional y internacional na cual nos talentonan mas grandi por competi y cualnan ta ser subsidia pa LOTTO pa Deporte. Un evento internacional cu ta ser subsidia pa gobierno ta e Weganan di Reino cu pa hopi aña a fungi como un plataforma di indole internacional y ta importante pa sigui organisa nan, ya cu un tempo a cancela esaki.

MANEHO INTEGRAL Y SOSTENIBEL

- Corporate Governance Code
- Inter-Ministerial
- Multi-Disciplinario

Como cu deporte ta un ramo cu tin di haber cu diferente area y sector di nos isla, mester maneha esaki di un forma integral (conhunto).

Den pasado ambos GO's y NGO's ta ser uza negativamente pa politico, a conoce interferencia politico of ta carece di profesionalismo den nan organisacion of departemanto. Pa e motibo aki ta hopi importante pa nan cumpli cu e Corporate Governance Code.

Riba nivel gubernamental, deporte mester forma parti di un maneho inter-ministerial riba un nivel multi-disciplinario pa por yega na un calidad progresivo maximo di e ramo aki, ya cu tin diferente ministerio, departamento y disciplina (profesion) involvi.

MINISTERIO DI ECONOMIA, INFRASTRUCTURA Y MEDIO AMBIENTE

Un economia resiliente ta rekeri un infraestructura moderno. E pilar mas importante di nos economia, turismo, ta depende riba un medio ambiente sano. Nos a dicidi di uni e tres carteranan bao un solo ministerio mirando nan inter-dependencia.

ECONOMIA

Aruba a conoce un crecimiento economico impresionante desde su inicio como pais na 1986. Nos a transiciona pa un economia cu ta depende primordialmente riba turismo. Esaki tabata un escogencia delibera di nos prome gobierno pa reduci desempleo (cu tabata rond di 30%) y persigui desaroyo no structura den un industria caminda nos tabata tin bentaha competitivo. Nos a logra y awe Aruba ta conta cu un industria turistico cu ta envidia di nos region, cu e cantidad mas halto di bishitante cu ta bolbe.

Sin embargo, nos ta den peliger di bira victima di nos mesun exito, introduci un maneho structural pa turismo cu ta limita cantidad di bishitante ta e reto mas importante di proximo gobierno. Segundo nos mester intensifica esfuersonan pa diversifica nos economia.

Nos meta mester ta pa crea un pais cu ta dushi pa biba aden y cu hende kier bin bishita, luga di un pais cu ta dushi pa bishita y dificil pa biba aden.

UN ECONOMIA DINAMICO Y RESILIENTE

Den nos plan di Finansas nos ta detaya un plan di reforma fiscal comprehensivo cu lo hiba na un economia mas dinamico. Nos mester sigui reduci red tape den forma di ley y regulacionnan cu ta obstaculisa mercado liber. Historia mundial ta demostra cu mercadonan liber cu competencia husto ta e miho catalisado di crecemento economico y prosperidad. Un economia mas resiliente ta depende riba diversifica actividad economico. Tin hopi posibilidad pa diversifica Aruba su economia, di industrianan prometedor, pa proyectonan di infraestructura y integracion vertical. ACCION21 ta comprometi cu principionan capitalista di comercio liber y regulacion proporcional na riesgo como e base pa crecemento economico den siglo 21.

TURISMO

Turismo lo keda nos industria principal y nos no ta premira un futuro caminda e ta representa menos cu cincuenta (50) por ciento di nos economia. Aruba Tourism Authority (ATA) su Carrying Capacity Report 2019 ta indica cu nos a surpasa nos capacidad den tur diesnuebe (19) indicado socio-economico. Desafortunadamente gobierno a scoge pa purba sconde e rapport y sigui persigui cantidad record di bishitante, kisas un logro a termino cortico, pero uno cu ta pone den peliger

nos prosperidad continuo a termino mediano y largo. ACCION21 lo tuma pasonan decisivo pa limita e cantidad di bishitante pa salvaguardia e mesun industria di cual nos tur ta biba.

INTRODUCI UN MAXIMO CANTIDAD DI BISHITANTE

Actualmente Aruba ta ricibi rond di 2.000.000 bishitante pa aña, mas o menos 1.200.000 ta keda un of mas anochi na un hotel of otro acomodacion mientras mas o menos 800.000 ta yega riba crucero y ta bishita nos pais pa algun ora. Nos kier mira un estudio urgente riba ki cantidad di turista ta optimal, tanto den bishitante stayover y esnan di crucero. Una bes completo nos lo modifica maneho y impone un limite riba e cantidad di bishitante cu por bishita Aruba anualmente y conecta esaki cu administracion di p.e. 'Aruba Online ED Card.'

TURISMO BALOR HALTO IMPACTO ABAO ('HIGH VALUE LOW IMPACT')

Nos lo redobla ATA su esfuersonan pa introduci un modelo di turismo di balor halto y impacto abao. Actualmente tin bishitante cu ta gasta \$850,- pa dia y otronan cu ta gasta \$250,- pa dia. Nos mester sigui transiciona na esnan cu ta gasta mas pa nos por sigui saca mas placa di nos industria turistico pero cu menos bishitante.

CUSTOMER EXPERIENCE IS THE NEW BRAND

Mirando e importancia continuo di turismo pa nos economia, ta importante pa nos keda e destinacion preferi den Caribe pa repeat visitors. Pa logra esaki den siglo 21 nos mester:

- Ofrece un producto mas autentico cu ta diferencia Aruba di otro destinacion, desaroya orange economy (seccion Cultura – Cultural and Creative Industries) ta un parti grandi di esaki;
- Conserva y mehora e calidad di nos producto, sigura cu tin incentivo pa hotelnan renoba y reduci cantidad di camber na fabor di mas suites;
- Preserva nos naturalesa cu ta e motibo principal pakico nos bishitantenan ta bin Aruba.

ARUBA AIRPORT AUTHORITY (AAA)

Nos kier mira Aeropuerto Internacional Reina Beatrix (AUA) sigui crece den cantidad di operador y ruta. Introduccion di un cantidad maximo di bishitante lo rekeri un cambio di modelo caminda nos airport lo mester cuminsa fungi como un hub airport pa sigura futuro crecimiento luga di depende primordialmente riba trafico aereo point to point. Siguiendo e ehempel di Milan Malpensa (MXP) despues cu Alitalia a cera su hub na e aeropuerto, AAA mester hunga un rol proactivo den posiciona nan mes como un hub airport y sigui nan crecimiento

den ruta pa miho conecta pasaheronan biahando pa region. Nos lo kier reduci landing fees pa buelonan regional entre e islanan di Caribe Hulandes pa reduci costo y curasha mas conectividad.

REGULA VACATION RENTALS

Actualmente tin riba 5.040 propiedad (cas y condominium) den e industria di vacation rentals cu capacidad pa acomoda 23.850 persona pa anochi. Den comparacion industria di hotel y timeshare por acomoda 24.100 persona pa anochi dus actualmente casi cincuenta (50) porciento di nos bishitante ta keda den acomodacion alternativo. Entre cincuenta (50) pa setenta (70) porciento di vacation rentals no ta paga impuesto debido representando un perdida di mas cu AWG 100 miyon anualmente pa gobierno. Tin esfuerzo pa registracion pa sigura cu nan ta cumpli cu standards minimo di siguridad y higiena pero un maneho structural ta keda falta.

Den consulta cu stakeholders nos kier desaroya un maneho pa vacation rentals cu ta salvaguardia derecho di nos localnan pa participa den e industria bao condicionnan y cumpliendo cu nan obligacionnan di impuesto, cu ta garantisando vivienda pagabel pa nos ciudadanonan.

DUTY-FREE PORT

Nos plan di reforma fiscal y rediseñamento di nos sistema di impuesto lo elimina invoerchten, convirtiendo Aruba den un duty-free port cu consecuencia hopi positivo pa nos industria di bendedo 'retailers.' Nos kier curasha nos turistanan pa haci compras den tiendanan local, esey ta aumenta ora nos tiendanan por ofrece productonan mas barata cu nan pais di origen. Eliminacion di invoerchten y nan incorporacion den BTW lo reduci costo di bida pa nos localnan tambe paso e no ta un impuesto acumulativo manera BBO. Haci Aruba un duty-free port ta un stap importante den diversifica nos economia cu nos lo elabora mas ariba den otro seccion.

HUB LOGISTICO PA CARGA

Nos plan pa converti Aruba den un duty-free port combina cu desaroyo di un waf multifuncional na San Nicolas (nos lo elabora mas abao) lo crea e posibilidad di converti Aruba den un hub logistico cu por absorbe parti di e sobre-demanda cu Panama ta enfrentando actualmente. Den pasado sesenta (60) porciento di carga cu tabata yega Aruba tabata pa re-exportacion bahando gastonan di un forma significativo. Cu dos waf, facilidadnan apto y eliminacion di invoerchten nos lo ta competitivo pa desaroya Aruba como un hub logistico.

ARUBA STOCK EXCHANGE

Nos ta kere den desaroya un mercado capital local, Aruba Stock Exchange, cu nos a detaya den nos plan di Finanzas. Den nos region tin varios mercado capital exitoso, esun di Cayman Islands a keda funda na 1996 y ta un lider specialisa den intercambio di productonan sofisticada globalmente. Actualmente nan tin mas cu 8.000 securites y un capitalisacion di riba \$863 bion. Nos ta kere cu Aruba tambe por desaroya un mercado capital specialisa mirando nos lasonan mas estrecho cu Hulanda y Union Europeo (despues cu Reino Unido a sali fe Union Europeo). Nos lo introduci incorporacion di un cuenta di intercambio trading account pa Aruba Stock Exchange liga na cuenta di banco di tur adulto bao supervision di Aruba Financial Services Authority (seccion Finanzas).

DUNA PUEBLO COMPANIANAN PUBLICO

Gobierno no ta un bon administrado di capital publico, pueblo su capital inverti den mayoria di e companianan publico a ser destrui cu excepcion di Aruba Airport Authority (AAA) y Setar. Asina mes Setar su return on capital ta unicamente cuatro (4) porciento, aunke e tin un monopolio den varios mercado, mientras den sector priva lo spera un rendimiento hopi mas halto. Ta demostra cu gobierno no por maneha pueblo su capital di un

manera eficiente y lucrativo, ACCION21 kier haci pueblo directamente doño di e companianan publico.

Nos lo kier mira e companianan publico ser registra riba Aruba Stock Exchange cu cada Arubano ricibiendo un accion cu nan por maneha liga na nan cuenta di banco. Nos lo kier mira modificacion di e statuut di companianan publico pa den futuro nan emiti un accion pa tur Arubano dia nan haci binticinco (25) año. Sacando sector publico di administracion di companianan publico lo haci nan mas eficiente y pueblo lo ricibi parti di nan ganashi directamente. Pa sigura cu p.e. WEB sigui produci awa y coriente na un prijs rasonabel ta introduci regulacion cu ta garantiza esey. Tambe ta imponi limitacion inicial riba benta di accion pa duna e companianan espacio pa reorganisa sin presion di especulacion.

HACI LANTA NEGOSHI MAS FACIL – ONE-STOP SHOP

Nos kier haci e proceso di lanta un negoshi y introduci un one-stop shop pa emprendedonan siguiendo e ehempel di Singapore. Pa logra esaki ta importante pa tur minister concerni bay acuerdo pa cede autoridad necesario pa haci e one-stop un exito. Nos kier reduci obstaculonan pa haci negoshi, elimina red tape pa facilita crecimiento economico semper teniendo cuenta cu comunidad, durabilidad y medio ambiente.

Nos vision lo trece lo siguiente hunto:

- Registra un negoshi (Kamer van Koophandel en Nijverheid);
- Copyright, Patent y/of Trademark (Bureau Intellectuele Eigendom);
- Registra pa persoons nr. (Servicio di Impuesto);
- Aplicacion pa permiso of licencia (DEZHI Directie Economische Zaken, Handel en Industrie);
- Aplicacion pa permiso pa impacto na medio ambiente (DNM – Directie Natuur en Milieu);
- Aplicacion pa permiso di construccion (DOW – Dienst Openbare Werken);
- Aplicacion pa permiso laboral (DPL – Departamento di Labor y/of DIMAS – Departamento di Integracion, Maneho y Admision di Stranhero);
- Aplicacion pa financiamiento (Banconan, Companianan di Seguro, Micro-finance etc.);
- Conecta cu asociacion y gremionan (AHATA, ATIA, CU etc.);
- Conecta cu comunidad (Centro di Barionan etc.).

ORANGE ECONOMY – CULTURAL AND CREATIVE INDUSTRIES

Nos tin un sector creativo floreciente y nan merece nan debido atencion y aprecio di tanto gobierno, pueblo y nos bishitantenan. Cultural and Creative Industries tin potencial grandi pa desaroyo y diversificacion di nos economia, den seccion cultura nos ta detaya nos programanan pa yuda

catalisa e industria. Nos ta comprometi cu nan exito pa e balor cu nan ta agrega den fortifica nos identidad y haci nos producto turistico uno mas autentico.

FONDO DI DESAROYO DI INNOVACION (FDI) – ‘INNOVATION DEVELOPMENT FUND’

Aruba su economia ta depende hopi di turismo, haciendo nos vulnerabel na shock externo. Diversificacion pa industrianan sostenibel ta crucial pa logra resiliencia, estabilidad economico y sostenibilidad medio ambiental. Door di enfoca riba principianan di economia circular y economia blauw (blue economy), Aruba por probecha su recursonan unico pa construi un base economico mas innovativo y diversifica.

Nos ta logra esaki cu un plan di implementacion:

- Establece un Fondo di Desaroyo di Innovacion (FDI) cu lo sostene proyectonan cu un potencial halto pa sostenibilidad y impacto. E fondo lo consisti di:
- Seed and Research Grants: Financiamiento pa investigacionnan y startups, enfocando riba proyectonan cu ta sostene diversificacion di nos economia door di enfoca riba nos fortalesanan (p.e. investigacion basa riba isla of oceano, desalinacion, biento, energia solar etc.);
- Acuerdonan entre Sector Publico y Priva: Atraendo inversionista

internacional door di oportunidadnan di inversion comparti, incentivo fiscal y modelonan di comparti ganashi;

- Financiamiento basa riba incentivo: Provee prestamonan di interes abao y/of subsidio na innovadornan local comprometi cu sostenibilidad, eficiencia y creacion di empleo.

Ehempel di proyectonan cu FDI por sostene:

- Sistemanan di microrednan di energia renobabel (Renewable Energy Microgrid systems): Aruba por establece microrednan cu ta combina energia solar y di biento hunto cu sistemanan pa almacenamiento di energia pa sigura acceso na energia decentralisa y sigur. FDI lo provee capital pa proyectonan piloto di microrednan den area rural of areanan off-grid, demostrando e factibilidad di solucionnan renobabel. Colaboracionnan entre sector publico y sector priva por ser curasha door di oportunidadnan pa inversion comparti y reduccion den tarifanan pa proyectonan renobabel;
- Refinamento di magnesio fe desalinacion salmuera (Magnesium Refining from Desalination Brine): E iniciativa innovativo lo reduci desalinacion salmuera mientras ta crea un producto valioso. Den produccion di awa, WEB ta produci desalinacion salmuera cu actualmente ta simplemente ser manda den lama. Financiamiento

di FDI por wordo usa pa conduci estudionan di factibilidad, establece un programa piloto y atrae inversion pa aumenta e proceso di refinamento di magnesio;

- Sistemanan di Refrigeracion di Distrito di Awa-Hundo (Deep-Seawater District Cooling Systems): Usando awa di lama hundo pa aircondition, Aruba por reduci su gastonan di energia y carbon footprint di manera significativo. FDI por provee fondonan di inicio pa estudionan di factibilidad, proyectonan di piloto inicial den areanan turistico y programanan di capacidad pa entrena talentonan local;
- Agricultura Avansa y Integracion Energia Renobabel (Advanced Agriculture & Renewable Energy Integration): FDI lo facilita permiso nan pa tereno pa agricultura, ofrece financiamiento pa proyectonan cu ta involucra metodonan di agricultura avansa manera hydroponics y sostiene solucionnan energetico cu ta reduci gastonan operacional. Colaboracion entre sector publico y priva por provee acceso na experticio internacional y tecnologia pa mehora resiliencia di agricultornan local.

Implementacion di FDI lo yuda Aruba transiciona sistematicamente pa un economia diversifica, reduciendo dependencia riba turismo y adopta industrianan innovativo y sostenibel.

REFINERIA DI ARUBA (RDA)

Nos no ta mira un futuro pa refineria pero nos kier revitalisa e tank farm petrolero. Investigacionnan a conclui cu e tankinan di petroleo mester un renobacion di fundeshi y tapa. Conhunto cu rehabilitacion di waf pa carga y descarga di petroleo, partinan di loke antes tabata refineria por cuminsa produci entrada.

WAF MULTIFUNCIONAL SAN NICOLAS

Nos kier rehabilita e facilidadnan di waf na San Nicolas y converti'e den uno multifuncional segun deseo di San Nicolas Business Association. Un waf multifuncional lo trece actividad economico bek pa un distrito cu a keda negligha durante e ultimo trintiocho (38) añanan di Status Aparte. Nos lo kier mira carga/descarga di petroleo pa consumo local y tambe operacion di e tank farm petrolero cu nos kier rehabilita. Nos kier mira e waf funciona como un hub logistico pa carga marino hunto cu esun di Oranjestad pa nos por asumi parti di e sobredemanda cu ta existi actualmente na Panama.

DESMANTELACION DI REFINERIA

Desaroyo di San Nicolas ta depende riba desmantelacion di e restonan di refineria, nan benta como scrap metal y un saneamento di e tereno pa otro uso. Actualmente tin rond di 750.000 mil bari di petroleo bao tera caminda antes

tabata refinaria. Ta importante extrae e petroleo y mira si e tin balor comercial of organisa su exportacion como sushi. Nos ta estima cu e balor di scrap metal hunto cu cualkier posibel balor di e petroleo bao tera por cuminsa financia saneamento di e tereno cu ta calcula di costa entre \$33 milyon te cu un posibel \$250 milyon dependiendo riba futuro uso di e tereno y con profundo e saneamento bay.

SECTOR PRIMARIO

Nos kier mira un aumento den nos produccion alimentario local sin cu esaki ta hisa costo pa pueblo. Ta importante pa Aruba desaroya un nivel di produccion strategico pa food security. Nos ta sostene e plan di Santa Rosa pa haci esaki den combinacion cu Bonaire y Corsou cu cada isla specializando. Bonaire tin amplio tereno y por enfoca riba cria, Corsou riba agricultura den tera y Aruba riba agricultura vertical usando p.e. hydroponics. Como un partido liberal nos no kier crea obstaculo na mercado liber cu ta hisa prijs pa consumo, pero cu avancen den tecnologia agricultor nos ta kere den desaroya un plan strategico inter-insular pa garantiza acceso na alimentacion pa nos hendenan. Entre e tres islanan lo por comparti un vee dierenarts y e gobiernonan lo por inverti den un catamaran pa transporta carga entre e islanan. Ta importante pa nos proteha nos produccion local di importacion subsidia cu medidanan apropia.

Na Aruba mester facilita un laboratorio den combinacion cu WEB y/of Universidad di Aruba pa por controla e calidad di awa di dam pa wak si e por wordo usa den agricultura paso e ta sigui ta mas barata cu awa di WEB. Mester bin reglamentonan mas severo pa salvaguardia cu nos damnan no lo contamina y exige di tur construccion nobo instala un regenbak pa colecta awa cu nan por sea usa den nan cura of bende cu cunukeronan na un prijs mas barata cu WEB. E produccion di productonan di agricultura local lo fortalece nos turismo y ofrece mas posibilidad pa farm to table den restaurant.

INFRASTRUCTURA Y TRANSPORTE

Bon funcionamiento di economia di un pais ta depende hopi riba e bon funcionamiento di su infraestructura. Un bon infraestructura ta hunga un rol hopi importante pa facilita transaccionnan empresarial, aumenta eficiencia y mehora calidad di bida.

Tin un corelacion entre e crecemento di e Producto Interno Bruto (PIB) y estado y condicion di infraestructura nacional. Falta di mantencion di nos careteranan y otro infraestructura publico a resulta den un decadencia.

Nos estudionan cientifico di problematicanan na Aruba a señala cu na nivel di distrito, infraestructura ta e preocupacion principal di nos poblacion.

ACTUALISA MANTENCION DI CARETERA

Departamento di Obran Publico (DOW) ta calcula cu actualisa mantencion riba nos red di caretera lo costa rond di AWG 350 milyon y gobierno ta gastando un averahe di menos di AWG 10 milyon anualmente. E sistema ta kibra y nos kier bin cu un plan structural pa actualisa mantencion.

EXPANSION DI INFRASTRUCTURA

Nos lo kier mira un plan structural cu no ta unicamente actualisa mantencion pero tambe expande nos infraestructura publico:

- Asfalta cayanan di santo;
- Expande acera pa peaton y haci nan mas accesibel pa personanan cu limitacion;
- Traha mas caya pa bicicleta fietspad segun estudionan haci;
- Traha mas parkeerplaats den centronan di ciudad;
- Mehora siguridad, amplia iluminacion y vigilancia digital via camera CCTV;
- Re-dirigi trafico pa mehora fluho;
- Mas estimulacion pa vehiculonan electrico, amplia stacionnan di recarga, parkeerplaats preferencial.

INTRODUCI CODIGONAN DI CONSTRUCCION SOSTENIBEL

Nos kier introduci codigonan di construccion mas sostenibel pa nos

clima y miho pa medio ambiente. Nos kier mira edificionan mas sostenibel cu ta cumpli cu certificacion LEED (Leadership in Energy and Environmental Design). Tin hopi cambionan incluyendo rekeri regenbak, daknan blanco, solar panel etc. cu por reduci nos consumo di awa y coriente.

RESTRUCTURA DEPARTAMENTO DI OBRA PUBLICO (DOW)

Nos kier mehora servicionan di Departamento Publico di Obra (DOW) via restructuracion di e departamento. Aruba ta enfrenta peticionnan creciente pa infraestructura miho, maneho ambiental y mehora mantencion di edificionan publico. Restructura e departamento cu e siguiente obhetivonan principal:

- Mehora Eficiencia;
- Mehora Calidad di Servicio;
- Sostenibilidad.

Beneficionan pa Pueblo:

- Construccion di careteranan nobo, drechamento di caminda y mehoracion di infraestructura mas eficiente y lihe.

MANTENCION Y COMERCIALIZACION DI EDIFICIONAN PUBLICO

Nos kier privatisa e maneho di facilidadnan y edificionan publico, incluyendo scol, oficina di gobierno, y centronan social recreativo. Un

compañía privada lo tiene control y la mantención de edificios a base de contrato público y convenio de un modelo basado en resultados (Pay for Success Model) de colaboración entre sector público y privado. El servicio de mantención incluye limpieza, paisajismo, seguridad, recolección de residuos, mejora de eficiencia energética y aumento de reciclaje. Otro servicio incluye el alquiler de espacios comerciales y alquiler de salas.

Beneficiarios Públicos:

- Servicio de mantenimiento más ágil sin burocracia;
- Ahorro de costos mediante el uso de contratos competitivos;
- Calidad de servicios públicos para el usuario incluyendo empleados del gobierno, estudiantes y pueblo.

MANTENCIÓN DE ÁREA VERDE Y SERVICIOS AMBIENTALES (LANDSCAPE MANAGEMENT)

Se puede privatizar el mantenimiento de parques públicos, áreas verdes y plazas. El empresario privado lo maneja y ofrece oportunidades adicionales para el turismo y alquiler de espacios para eventos y recreación. El contrato se otorga después de un proceso público transparente con penalidad por incumplimiento.

Beneficiarios Públicos:

- Áreas públicas más atractivas, que contribuyen a la calidad de la recreación;
- Oportunidad de negocios locales

que utilizan espacios públicos para eventos, estimulando la cultura y el arte;

- Prácticas sostenibles para preservar la naturaleza y reducir el impacto ambiental.

PLAN DE IMPLEMENTACIÓN

Consulta pública transparente:

- Realizar consulta pública y sindical para recibir input y atender preocupaciones de la comunidad;
- Garantizar transparencia y comunicación pública de los servicios que se privatizan y cómo se beneficiarán de la calidad del servicio y la eficiencia.

REGULACIÓN Y SUPERVISIÓN

- Establecer dentro de DOW un cuerpo regulador para supervisar y gestionar y propiedad privada, asegurando que se cumplan los estándares de servicio que se acordaron, con facturación de tarifas que sean transparentes y se cumplan;
- Introducir mecanismos de responsabilidad clara para la empresa privada, incluyendo penalidades por retraso del servicio o fallos.

PROYECTO PILOTO

Existen suficientes ejemplos en otros departamentos gubernamentales que se han privatizado y que se pueden usar como ejemplos para adaptar.

- Lansa proyectonan piloto modifica pa demostra beneficianan di privatisacion, manera mantenimiento di caminda of maneho di edificio publico;
- Usa e exito di e proyectonan piloto pa crea confiansa y sosten den pueblo pa implementacion mas amplio di e otro servicionan privatisa.

TRANSPORTE PUBLICO

Nos ta presenta un plan renoba pa transporte publico na Aruba, enfoca riba e beneficianan economico, di salud, ambiental y social. E plan aki ta basa riba eventonan cu a demostra su efectividad na otro paisnan.

BENEFICIO ECONOMICO

Un sistema di transporte publico eficiente ta stimula economia. Pa cada florin inverti, comercio ta gana tres florin den benta, productividad di pasaheronan y gasto reduci den mantencion di caretera. Nos lo introduci subsidionan pa e sector di transporte publico pa sigura un servicio accesibel pa tur hende.

BENEFICIO PA SALUD

Uso di transporte publico ta promove un estilo di bida mas saludabel. Usuario di transporte publico ta cana mas y ta sinti miho. Nos lo introduci programanan di bienestar pa pasaheronan incluyendo actividadnan fisico y educacion di salud.

BENEFICIO AMBIENTAL

Un sistema di transporte publico eficiente ta reduci aglomeracion di trafico, contaminacion di aire y sonido y uso di combustibel. Nos lo introduci un plan pa transiciona pa busnan electrico y solar (carga exclusivamente pa energia solar) pa reduci e impacto ambiental y importacion di gasolin.

BENEFICIO SOCIAL

Transporte publico ta brinda movilidad pa esnan vulnerabel, ta reduci soledad social y ta ofrece un costo fiho pa biahe, no afecta pa aumento di prijs di gasolin. Nos lo introduci tarifanan faborabel pa esnan vulnerabel economicamente y socialmente.

SIGURIDAD Y CONFIABILIDAD

Transporte publico ta mas sigur cu menos accidentnan. Nos lo introduci un sistema di monitorea pa sigura e exactitud di e orarionan y pa haci keho si no ta cumpli cu orario corecto.

ARUBUS

Falta di un transporte publico cu ta funciona bon ta un di e motibonan principal cu a hiba na nos crisis ecologico. Nos sistema di transporte publico no a crece cu e necesidadnan di nos poblacion. Nos kier modernisa y restructura Arubus completamente incluyendo:

- Introduci busnan mas chikito y flexibel;

- Rutanan subsidia;
- Integracion di red di busnan chikito;
- Introduci mas tecnologia;
- Rediseña tarifanan subsidia;
- Rediseña rutanan y orario;
- Enfoca riba fiabilidad;
- Introduci servicio 24/7;
- Introduci un parada na aeropuerto;
- Expande y mehora paradanan di bus.

MEDIO AMBIENTE

E ciudadanonan di Aruba, su yiunan y nietonan tin derecho pa biba den un ambiente limpi, sigur y saludabel. Un ambiente cu ta sostene especienan y biodiversidad di ecosistemanan. Un ambiente cu ta conserva su herencia cultural y natural y na unda desaroyo economico ta den balans cu e bienestar di tur ser y medio ambiente.

Actualmente nos ta enfrentando un crisis ecologico y nos medio ambiente ta den un estado critico, e proximo gobierno lo mester tuma nada menos cu accion decisivo pa salvaguardia nos medio ambiente. Nos ta duna atencion na e cuatro puntonan treci pa e medio ambientalistanan.

HOTELNAN DEN CONSTRUCCION (PUNTO UNO)

Medio ambientalistanan a pidi pa cera tur hotel den construccion pero esaki ta algo cu ACCION21 no ta kere ta deseabel ni factibel sin cu e ta costa pais Aruba hopi cien di miyones den daño y perhuicio. Propiedadnan nobo

ta mehora e marca Aruba, hopi biaha nan facilidadnan ta superior y nan ta contribui na mehora nos producto turistico. Sin embargo, nos ta premira cu limita e cantidad di bishitante lo afecta con rendabel propiedadnan existente, bao construccion y den planificacion lo ta den futuro. Probablemente esaki lo tin como consecuencia cu algun di e propiedad den planificacion kisas lo no ser desaroya.

ARESTA SOBRE-CAPACIDAD TURISTICO

Den nos seccion di Economia nos a detaya cu nos kier introduci un limite riba e cantidad di bishitante. Aruba a sobrepasa su capacidad riba tur indicado socio-economico y a yega ora pa tuma accion decisivo pa salvaguardia loke a resta di nos naturalesa y permiti su regeneracion. Nos lo cuminsa na limita e cantidad di bishitante y desaroya maneho pa den futuro reduci e fluho di turista mientras nos ta transiciona na bishitantenan cu ta gasta mas, asina sigurando entradanan creciente di nos industria turistico.

DECLARA UN CRISIS ECOLOGICO, MEDIO AMBIENTAL Y CLIMATICO (PUNTO DOS)

Nos lo honra peticion di e medio ambientalistanan pa declara Aruba den un crisis ecologico, medio ambiental y climatico. Nos prome paso pa atende cu e crisis ecologico, medio ambiental y climatico lo ta expande Parke Nacional Aruba pa inclui tur e territorio di Aruba,

henter e zona maritimo y riba tera. Nos tur lo transiciona pa biba den un parke nacional cu miho maneho y preservacion di nos recursonan natural. Actualmente Aruba a destrui mas cu nobenta (90) porciento di su naturalesa y nos mester introduci maneho cu ta cuminsa permiti su regeneracion den ekilibrio cu crecemento socio-economico.

STIMULA MAS PROPIETARIO LOCAL (PUNTO TRES)

Un otro punto di e medio ambientalista ta prohibi stranhero di compra propiedad y/of tereno na Aruba. Nos constitucion ta prohibi discriminacion a base di origen nacional dus esaki no ta posibel. Nos ta reconoce cu vivienda a bira impagabel pa nos localnan y den nos seccion Economia nos ta elabora riba con nos kier regula industria di vacation rentals. Siguiendo e modelo di Suiza nos lo kier introduci un maneho cu ta distingui entre propiedadnan destina pa local y esnan destina pa stranhero. Nos lo kier desaroya un maneho cu ta destina area y/of proyectonan pa benta cu stranhero introduciendo necesidad di un permiso pa dicho benta.

RECUPERA NOS TERA CU PARTI DI ATA SU DIVIDEND

Nos lo kier destina parti di e dividend cu gobierno ta ricibi di Aruba Tourism Authority (ATA) pa recupera nos tera door di crea un fondo publico pa compra bek propiedadnan turistico ora nan derecho

di erfpacht vence. Destina dividendnan di ATA y otro fondonan publico pa un fondo pa compra bek nos tera lo contra-aresta e benta di gran parti di nos isla cu consecuencia e no ta disponibel pa uso di nos localnan.

RE-URBANISA ORANJESTAD Y SAN NICOLAS

Nos ta kere pa preveni mas perdida di mondi, futuro desaroyo residencial mester ta concentra den centro di Oranjestad y San Nicolas. FCCA mester cuminsa enfoca riba desaroya edificionan di vivienda economico pa nos ciudadanonan den centronan di ciudad como parti di nan reurbanisacion.

Tin hopi edificio bashi of cu no ta wordo usa optimalmente cu lo por wordo usa pa p.e. vivienda pa den centro di ciudad. Esaki nan por ta vivienda pagabel cu lo trece bida bek den e centronan di ciudad. Por pensa na p.e. muda edificio di postkantoor y re-usa esaki como vivienda pa estudiante mirando e parkeo grandi, pero tambe su cercania na Universidad di Aruba. Asina tin hopi otro areanan na Aruba cu por wordo utiliza pa vivienda, particularmente si considera e scarsedad di tereno. Nos lo studia posibilidad di introduci incentivonan fiscal pa curasha propietarionan renoba y transforma nan edificionan pa uso multifuncional.

INTRODUCI Y IMPLEMENTA UN MILIEUWET

Pa por crea un isla dushi pa biba pa

nos ciudadanonan, nan yuinan y nan nietonan mester percura pa finalisa y introduci un ley marco di medio ambiente di Aruba, pa asina frena desaroyo descontrola. Di e forma aki lo por regula y crea e condicionnan necesario pa por realmente tin desaroyo responsabel, sostenibel y duradero. E ley aki lo ta un punto di atencion urgente mirando cu Aruba ta un di e paisnan mas popula den region y e uso di espacio mester wordo bon regula. E ley lo inclui tambe sancionnan pa infraccionnan cu keda haci.

INTRODUCI Y IMPLEMENTA PARKE MARINO

Revisa y implementa e ley di Parke Marino pa asina tambe por proteha bida maritimomaneraentreotro nos coralnan, rifnan, mangroves, pisca, turtuga y tur otro bida maritimo. Financiamiento sostenibel por wordo genera por medio di por ehempel Blue Finance, Carbon Credit Off-set, fondonan Europeo, pero tambe tur esnan cu ta haci uso turistico di e zonanan aki (divers marine tag). Declara full e zona maritime di Aruba parke nacional lo tin bentaha tambe pa regulacion di actividad marino y lo hiba na un miho maneho.

MEHORA E CALIDAD DI NOS AIRE

Stimula mas plantacion di mata local cu ta duna sombra por ehempel den ciudad y barionan. E matanan lo duna mas cu sombra, ya cu nan lo percura pa

un miho calidad di aire como resultado. Introduci tambe regulacion pa por midi polucion den aire di proyectonan cu tin uitstoot directo den aire liber pa asina percura cu nan ta atene na normanan reconocimundialmente. Nos kier studia e posibilidad di haci un limpieza di lagoen (Oranjestad) y embeyece su alrededor como extension di proyectonan den Wilhelminastraat y Caya Grandi.

MANEHO DI DESPERDICIO RESPONSABEL

Pa por logra un miho solucion pa desperdicio mester bay pensa den termino di economia circular. Esaki kiermen cu lo mester evalua e tipo di desperdicio cu ta wordo produci y con esaki por wordo sea recicla, re-usa of reduci. E ciudadano, pero sigur e sector comercial tin nan responsabilidad den esaki pa por yega na solucionnan duradero. Den termino corto mester haci un cambio drastico den e sistema y separa e recoleccion y e procesamento di sushi.

EXPORTA NOS DESPERDICIO

Durante contactplan entre parlamentonan di Aruba, Corsou, Sint Maarten y Surnam, nos coleganan di Surnam a propone pa desaroya ruta di carga entre e islanan y Surnam. Nan ta mira hopi oportunidad pa exporta alimentacion mas barata y pa e barco nan no navega bashi pa Surnam, nan a sugeri pa e islanan exporta nan desperdicio. Nos ta kere esaki ta un

sugerencia cu mester ser investiga, establece un centro di desperdicio y reciclahe na Surnam pa e islanan por ta un solucion pa nos problemanan di desperdicio. Saba ta exporta tur su sushi y no tin e mesun problema di desperdicio cu ta caracteriza Aruba, Corsou y Sint Maarten.

CAP PARKIETENBOS Y ENFOCA RIBA REDUCI, RE-USA Y RECICLA

Nos kier cap e area pa asina por usa esaki pa otro proposito duradero manera por ehempel un parke solar, of cualkier otro proposito na beneficio di e bario. Lo evalua diferente forma di deshaci di diferente tipo di desperdicio unda cu reduci, re-usa y recicla lo ta central. Aki por pensa por ehempel riba:

- Re-introduccion di statiegeld pa boternan di glas of blekinan;
- Recicla y re-usa tur tipo di desperdicio;
- Un incinerator chikito special pa desperdicio medico na hospital mes;
- Un incinerator pa cadaver di animal na abattoir (manera tin na moratorionan);
- Usa foyonan di mata pa crea compost pa sigui planta.

MIHO COORDINA Y HACI MAS EFICIENTE E RECOGEMENTO DI SUSHI

- Concesion di rutanan di recogemento di sushi lo ta duna via un bidding process pa distrito, companianan mester percura pa tur e barionan ta

limpi (incluyendo terenonan bashi);

- Introduci mini-caya di medio ambiente den tur bario;

CONSTRUI PLANTA NOBO NA RWZI BUBALI PLAS

Priorisa construi un planta nobo na RWZI Bubali Plas cu ta data desde 1975 y cu ta trahando dobel su capacidad, esaki mester wordo drecha cu urgencia. Nos no ta kere den gobierno saliente su plan di AWSS bao di utilities. E costo pa un planta nobo ta alrededor di 60 mion florin y lo por wordo financia por medio di privatisa e planta, y unda lo inverti, opera y haci e mantencion di e planta. Esaki lo wordo haci por medio di un destaho publico siguiendo un mecanismo di modelo RAB (Regulated Asset Base model), e mecanismo aki ta implementa exitosamente caba na Boneiro den e regulacion di utilities. Gobierno saliente a fracasa den construi un planta nobo y te cu awor a unicamente purba preveni lo peor den caso di un desaster di desperdicio.

BAHA CONSUMO DI COMBUSTIBEL FOSIL – ENERGIA SOSTENIBEL

Mirando cu Aruba ta un isla bendiciona cu biento y solo tur dia, pero tambe ta rondona pa lama, nos tin condicionnan faborabel pa sondea posibilidadnan pa por utiliza energia renobabel y di e forma aki reduci nos dependencia riba fossil fuels. Energia renobabel ya caba ta mas

barata cu fossil fuels y nos kier desaroya un plan pa transiciona na energia renobabel, manera ta existi na BES cu lo produci nobenta (90) por ciento di nan energia di metodonan renobabel.

INVENTARISA COSTO DI AWA Y CORIENTE

Haci un inventarisacion di nos plantanan nacional di awa y electricidad, como tambe e estructura di Utilities y diferente directiva, pa wak con por streamline procesonan y reduci gasto di operacion pa asina por pasa e reduccion aki pa e consumo. E intencion di e plantanan nacional semper tawata pa por duna awa y coriente na un prijs pagabel pa e ciudadano.

TRANSICION PA AUTONAN ELECTRICO OF DI LPG/GAS NATURAL DEN SECTOR PUBLICO

Converte e flota di auto di sector publico pa autonan electrico usando charging stations solar. Di e forma aki duna ehempel di con por contribui na uso di energia renobabel y reduci emision di CO2 riba nos isla. Busca manera di reduci costo di vehiculonan pisa (manera Trucks y Vans) cu posibilidad di converti nan na gas natural of LPG. ACCION21 ta kere cu nos mester tambe prepara regulacion adecua pa no perde posibilidadnan cu otro fuentenan di energia por brinda nos isla.

INCREMENTA POSIBILIDADNAN DI PRODUCCION DI ENERGIA RENOBABEL

Aumenta 'distributed generation' bahando algun di e restriccionnan riba net metering pa cantidad di solar panels ariba daknan y aumenta facilidadnan pa financiamiento di solar panels pa tur Arubano por beneficia di e innovacionan global den energia. FCCA lo por instala parke solar den forma di carports den un cooperacion cu habitantenan di casnan social pa yuda baha gastonan di coriente. ACCION21 lo haci un evaluacion habri di e rol di gobierno den habri un utility nobo pa maneha un sistema District Cooling pa e area di hotel y asina baha drasticamente e cantidad di petroleo cu nos ta importa. Gobierno mester habri e posibilidad di niche-nan di innovacion den energia pa stimula capital priva pa tuma risico den instalacionnan innovativo.

DESAROYO SOSTENIBEL Y DURADERO

Pa por garantiza un isla dushi pa biba pa nos ciudadanonan, nan yiunan y nietonan, nos mester pone enfoke pa crea desaroyo sostenibel y duradero. Esaki lo rekeri regulacion di parti di gobierno, pero sigur tambe participacion di comunidad.

MIHO CONTROL DI PROYECTONAN DI INFRASTRUCTURA

- Introduccion di un Comision M.E.R.: Na e momentonan aki un di e rekisitonan pa proyectonan nobo ta pa entrega un m.e.r. rapport (environmental impact assessment) pa por evalua e efectonan medio ambiental di e proyecto riba e area unda kier construi of desaroya. Actualmente Aruba no conoce un comision di experto independiente (manera na Hulanda) cu ta determina e rekisitonan pa e rapportnan aki, ni tampoco cu ta controla e contenido di dicho rapport. Esaki ta causa cu hopi biaha e desaroyado di e proyecto ta laga traha e rapport aki, pero realmente e lo no haña resistencia, pasobra e no ta wordo debidamente controla. Den cuadro di desaroyo sostenibel y duradero lo evalua si lo introduci un comision m.e.r. pa Aruba of busca colaboracion cu esun existente na Hulanda pa crea un comision pa Caribe;
- Actualisa tur contract di infraestructura cu un enfoke ariba mantencion adecuado di instalacionnan (scolnan, instalacion RWZI, sistemanan di procesa desperdicio, sistemanan di energia etc).

TRIPLE HELIX APPROACH: GOBIERNO LO PERCURA PA SUBI COLABORACION CU SECTOR ACADEMICO Y SECTOR CIVIL

Hunto cu e facultad di SISSTEM di

Universidad di Aruba y otro NGOs gobierno lo por haci sondeo den naturalesa mirando nos clima. Esaki lo brinda e universidadnan un espacio pa haci nan investigacionnan, pero tambe lo por sigui brinda nos studiantenan oportunidadnan na Aruba mes den ramo di sostenibilidad. Enfoca ariba e eliminacion di contaminantenan riba tera, incluyendo un inventario y regulacion di fertilisante y pesticida.

CITY INSPECTOR

City Inspector ta hunga un rol importante den mantencion di nos medio ambiente. Nan ta e frontline workers pa nos medio ambiente. ACCION21 lo desea di wak e peso di ley ta un tiki mas pisa pa esnan cu ta comete destruccion y polucion di medio ambiente. ACCION21 lo cambia e nomber di City Inspector pa Inspector Ambiental pa preveni e percepcion cu su responsabilidad ta unicamente den stad.

- Cambio den Ley pa facilita otorgamento di boet y e pruebanan necesario pa duna nan lo ta un prioridad halto;
- Durante 5 te cu 10 aña ta reforsa Dep. City Inspector cu mas personal cu autoridad policial, training y ekipo pa reorienta riba ley hinderverordering;
- Lo controla den oranan iregular tambe manera anochi y den weekend pa delitonan di medio ambiente, molester y abuso di bestia (di cas);
- Lo evalua si lo lanta un bureau di recherche di medio ambiente pa investiga delitonan ambiental;

- Introduci un sistema di permiso anual pa vehiculo of machine of otro instalacion bandona cu no ta cuadra cu e bestemmingsplan di tereno;
- Lo midi e efectividad di 'Milieu Samenwerkingsteam;'
- Lo incorpora City inspector den Departamento di Naturalesa y Medio Ambiente;
- Incorpora Arubus parkeerwachters den Dept. City Inspector.

BIENESTAR DI NOS ANIMALNAN

Nos mester forma un team consistiendo di CCC (Centro Control di Cacho) y un BOA (buiten gewoon opsporings ambtenaar) cu ayudo di polis si mester, pa sigura cu tur esnan cu comete abuso contra nos animalnan haya un boet of mester aparece dilanti un officier van justitie pa algun tipo di castigo. Castigo mester ta proporcional na e crimen.

UN SOLO DATABASE

Urgentemente sigura cu registracion di tur mascota aparece den un solo database. E database mester ta accesibel pa tur veterinario, indica cuanto animal tin riba nos isla y cuanto ta sterilisa.

NO MAS TRATO ILEGAL

No mas trato ilegal di nos animalnan. Si bo ta rasa cacho bo mester ta registra na Kamer van Koophandel. Regula breeding cu no mas cu un cama pa aña

pa e mesun cacho y no mas cu tres cama pa un cacho durante su bida.

No mas pelea ilegal di cacho of otro actividad cruel pa nos animalnan, actonan asina mester ta castigabel pa ley.

INCORPORA DEN CURICULO

Bukinan a ser parti na scolnan pero mester incorpora den nos curiculo pa maestronan haci'e parti di nan lesnan pa splica e generacion hoben con pa trata nos animalnan cu compasion. BOA mester ta den e barionan sigurando cu doñonan di mascota compronde con pa trata nan animalnan y ofrece guia caminda ta necesario.

DOÑONAN RESPONSABEL

Construi un localidad nobo pa acomoda tur animal no desea ta muestra nos isla cu ta aceptabel deshaci di nan bestianan. BOA mester traha cu e NGOs pa educa y ofrece ayudo caminda ta necesario. Mester haci doñonan di mascota mas responsabel.

STERILISACION GRATIS

Provee sterilizacion gratis durante cuatro aña den barionan pa por controla e cantidad di animalnan cu ta nace. Eutanasia di animalnan agresivo cu ta un menasa pa sociedad mester wordo cubri financieramente pa e sosode mas lihe prome cu daño wordo haci. (Actualmente hopi animal ta keda un peliger pa falta di fondo).

STACION DI CRIA PROTEHI

Hopi ta cria cacho y haci nan vulnerabel na otronan cu kier haci nan daño. Cria cu un meta y na un luga caminda niun hende ta protesta of contra. Ofrece un stacion di cria protehi den tur barío. E mester ta un stacion na rand of net pafó di barío cu ta supervisa pa BOA y NGOs por yuda cu provee cuminda.

CHIP OBLIGATORIO Y GRATIS

Chip (microchipping) ta posibel pero e mester bira obligatorio y gratis. Tur animal cu yega un oficina di veterinario mester wordo chip y registra, te hasta si e no ta sterilisa. Mientras BOA ta sondea den e barionan nan mester por registra tur e animalnan (nos ta cuminsa cu cacho pa awor) cu nan mira riba propiedad di hende.

PUNTO CENTRAL PA DENUNCIA

Mester introduci un punto central pa denuncia abuso di bestia. Esaki no mester ta KPA mas, mester un number fiho cu ta habri semper y tur denuncia ta ser traspa pa e team di BOA. Team di BOA ta traha den shift y mester ta disponibel den weekend tambe.

ACCION 21 
PLAN DI
PARTIDO
2025 - 2029

#BanBibaMiho
WWW.ACCION21.COM